

三通考輯要

第十一函  
第十冊

馬序曰古之教者家塾黨庠序國學所謂學校至不一也然惟國學有司樂司成專主教事而州閭鄉黨之學則未聞有司職教之任者及考周禮地官黨正各掌其黨之政令教治州長掌其州之教治政令然後知黨正卽一黨之師也州長卽一州之師也下之爲比長閭胥上之爲鄉遂大夫莫不皆然蓋古之爲吏者其德行道藝俱足以爲人師表故發政施令無非教也使民興賢出使長之使民興能入使治之役之則爲民教之則爲士官之則爲吏鈞是人也秦漢以來儒興吏始異趨政與教始殊途於是曰郡守曰縣令則吏所以治其民曰博士官曰文學掾則師所以教其弟子二者漠然不相爲謀所用非所教所教非所用士方其從學也曰習讀及進而登仕版則棄其詩書禮樂之舊習而從事乎簿書期會之新規古人有言曰吾聞學而後入政未聞以政學者後之爲吏者皆以政學者也自其以政學則儒者之學術皆筌蹄也國家之學宮皆芻狗也民何由而見先王之治哉又況榮途捷徑旁午雜出蓋未嘗由學而升者滔滔也於是所謂學者姑視爲粉飾太平之一事而庸人俗吏直以爲無益於興衰理亂之故矣作學校考第十

學校考

太學

王制有虞氏養國老於上庠養庶老於下庠夏后氏養國老於東序養庶老於西序殷人養國老於右學養庶

老於左學周人養國老於東膠養庶老於虞庠虞庠在國之西郊米廩有虞氏之庠序夏后氏之序瞽宗殷學  
類宮周學夏曰校殷曰序周曰庠學則三代共之 禮書曰上庠東序右學東膠太學也故國老於之養焉下  
庠西序左學虞庠小學也故庶老於之養焉記曰天子設四學蓋周制也辟雍卽成均東膠卽東序瞽宗卽右  
學明之以法和之以道則曰辟雍成其虧均其過不及則曰成均以習射事則曰序以糾德行則曰膠以樂祖  
在焉則曰瞽宗以居右焉則曰右學蓋周之學成均居中其左東序其右瞽宗此太學也虞庠在國之西郊小  
學也夫天子視學則成均也命有司行事祭先聖先師焉卽祀先賢於西學也祀先賢於西學則祭於瞽宗也  
有司卒事適東序設三老五更之席卽養國老於東膠也養國老於東膠卽食三老五更於太學也然則商之  
右學則周謂之西學亦謂之瞽宗夏之東序在周謂之東膠亦謂之太學蓋夏學上東而下西商學下右而上  
左周之所存特其上者耳則右學東序蓋與成均並建於一邱之上而已成均頌學政右學祀樂祖東序養老  
更有學東序不特存其制而已又因其所上之方而位之也夫諸侯之學小學在內太學在外故王制言小學  
則宮南之左太學在郊以其選士由內以升於外然後達於京故也天子之學小學居外太學居內故文王  
世子言凡語於郊然後於成均取爵於上尊以其選士由外以升於內然後達於朝故也 江陵項氏松滋縣  
學記曰學制之可見於書者自五帝始其名曰成均說者曰以成性也然則有民斯可教有教斯可學自開闢  
則既然矣有虞氏始卽學以藏彙而命之曰庠又曰米廩則自其孝養之心發之也夏后氏以射道士如行葦

瞿相之所言而命之曰序則以檢其行也商人以樂造士如夔與大司樂所言而命之曰學又曰瞽宗則以成其德也學之音則校校之義則教也蓋倣於商人先王之所以教者備矣周人脩而兼用之內卽近郊並建四學虞庠在其北夏序在其東商校在西當代之學居中南面而三學環之命之曰膠又曰辟廱郊言其地曠言其象皆古人假借字也其外亦以四學之制參而行之凡侯國皆立當代之學而損其制曰泮宮凡鄉皆立虞庠凡州皆立夏序凡黨皆立商校

司徒脩六禮以節民性明七教以興民德齊八政以防淫一道德以同俗養耆老以致孝恤孤獨以逮不足上賢以崇德簡不肯以紕惡命鄉簡不率教者以告耆老皆朝於庠元日習射上功習鄉上齒大司徒率國之俊士與執事焉不變命國之右鄉簡不率教者移之左命國之左鄉簡不率教者移之右不變移之郊不變移之遂不變屏之遠方終身不齒命鄉論秀士升之司徒曰選士司徒論選士之秀者而升之學曰俊士升於司徒者不征於鄉升於學者不征於司徒曰造士樂正崇四術立四教順先王詩書禮樂以造士春秋教之以禮樂冬夏教之以詩書王太子王子羣后之太子卿大夫元士之適子國之俊選皆造焉凡入學以齒將出學小胥大胥小樂正簡不帥教者以告於大樂正大樂正以告於王王命三公九卿大夫元士皆入學不變王親視學不變王三日不舉屏之遠方西方曰棘東方曰棗終身不齒 禮書曰鄉簡不率教者至於四不變然後屏之不變王簡國子之不帥教止於二不變則屏之者先王以匹庶之家爲易治齊梁之性爲難化以其易治故鄉

遂之所考常在三年大比之時以其難化故國子之出學常在九年大成之後 又曰古之六卿其分職也未嘗不通其職事也未嘗不分司徒掌邦教司馬掌邦政未嘗不分也有廢則司徒教士以車甲升造士則司馬辯論官材未嘗不通也周官大司馬之屬司士以德詔爵此司馬辯論官材之謂也

大樂正論造士之秀者以告於王而升諸司馬曰進士司馬辯論官材論進士之賢者以告於王而定其論定然後官之任官然後爵之位定然後祿之

師氏掌以教國子弟凡國之貴游子弟學爲 保氏掌諫王惡而養國子以道

大司樂掌成均之法以治建國之學政而合國之子弟焉凡有道者有德者使教焉死則以爲樂祖祭於豷宗大胥掌學士之版以待致諸子春入學合菜合舞秋頒學合聲

文王世子凡學世子及學士必時春夏學于戈秋冬學羽籥皆於東序小樂正學于大胥贊之籥師學戈籥師承贊之胥鼓南春誦夏弦大師詔之豷宗秋學禮執禮者詔之冬讀書典書者詔之禮在豷宗書在上庠凡祭與養老乞言合語之禮皆小樂正詔之於東序大樂正學舞于威語說命乞言皆大樂正授數大司成論說在東序凡侍坐於大司成者遠近間三席可以問終則負牆列事未盡不問 樂書曰王制之教造士春秋以禮樂冬夏以詩書文王世子之教世子春夏以于戈秋冬以羽籥者升於學者之造士則其才向於有成其教之也易故先其難者而以詩書後於禮樂貴職之世子則其性誘於外物其教之也難故先其易者而以于戈羽

備後於禮樂詩書周官師氏教國子在司徒教民之後記言教國之子弟在鄉遂之後其教之難易蓋可見矣

凡語於郊者必取賢斂才焉或以德進或以事舉或以言揚曲藝皆誓之以待又語三而一有焉乃進其等以

其序

又以其謂之郊人達之其猶在郊學也

尚書大傳使公卿之太子大夫元士之適子十有三年始入小學見小節焉踐小義焉二十八大學見大節焉

踐大義焉 程子曰古者八歲入小學十五入大學擇其才之可教者聚之不肖者復之農畝蓋士農不易業

既入學則不治農然後士農判後之人自童稚間已有汲汲趨利之意何由得向善其古人必使四十而仕然

後志定只營衣食却無害惟利祿之誘最害人 朱子大學章句序曰人生八歲自王公下至庶人之子弟皆

入小學而教以洒掃應對進退之節禮樂射御書數之文及十有五年則自天子之元子眾子至公卿大夫元

士之適子與凡民之俊秀皆入大學而教以窮理正心修己治人之道此又學校之教大小之節所以分也

王制天子曰辟廡 詩靈臺於樂辟廡 朱子曰說者以爲辟廡大射行禮之處水旋邱如壘以節觀者泮宮

諸侯鄉射之宮也其水半之蓋東西門以南通水北無也故振鷺之詩曰振鷺於飛於彼西籬說者以籬爲澤

蓋卽旋邱之水而其學卽所謂澤宮也 江陵項氏枝江縣新學記曰古者周天子之居民也不但天子諸侯

之國自二十五家以上則有學焉方是時建官三百六十以張備法而紀衆民視其中無一事無法者而獨於

建學無制則其吏非應文也無一民無養者而獨無粟士之廩則其士非爲養也而上下顧交趨之如裘葛歛

食然則必有不可捨焉者矣天子之學謂之辟雍班朝布令享帝右祖則以爲明堂同律候氣治曆考詳則以爲靈臺諸侯之學謂之泮宮大師旅則將士會焉大獄訟則吏民期焉大祭祀則始祖享焉蓋其制皆於國之勝地拔水築宮爲一大有司國有大事則以禮屬百官羣吏下民而講行之無事則國之耆老子弟游焉以論鼓鐘而修孝弟其地尊其禮大三百六十官皆不得治其事意者三公之老而致仕者掌之謂之鄉老二鄉而公一人則六鄉蓋三公矣故曰三公在朝三老在學公與老皆無職於六官學序庠塾皆無制於六典古之言道者固如是也嗚呼此意深矣

漢興高帝尙有干戈未遑庠序之事武帝始興太學 徐氏曰按三輔黃圖太學在長安西北七里有市有轍元朔五年置博士弟子員 大史公曰余讀功令至於廣勵學官之路未嘗不廢書而歎也曰嗟乎王路廢而邪道興仲尼千七十君無所遇陵遲以至於始皇天下並爭儒術既誦焉然齊魯之間學者獨不廢也咸宣之際孟子荀卿之列咸遵夫子之業而潤色之以學顯於當世及秦季世焚詩書坑儒士六藝從此缺矣公孫弘爲學官悼道之變滯請詳延天下方正博聞之士謹與大常臧博士平等議曰聞三代之道鄉里有教其勸善也顯之朝廷其懲惡也加之刑罰故教化之行也建首善自京師始由內以及外諸因舊官而興焉爲博士官置弟子五十人復其身太常擇民年十八已上儀狀端正者補博士弟子郡國縣道邑有好文學敬長上肅政教順鄉里出入不悖所聞者令相長丞上屬所二千石二千石謹察可者當與計偕詣太常得受業如弟子一

歲皆賦試能通一藝以上補文學掾故事其高第可以爲郎中者太常籍奏卽有秀才異等輒以名聞其不事學若下材及不能通一藝輒罷之而請諸不稱者罰臣謹按詔律令下者明天人分際通古今之義文章爾雅訓辭深厚恩施甚美小吏淺聞不能究宣無以名布諭下治禮學故以文學禮義爲官選留滯請選擇其秩比二百石以上及吏百石通一藝以上補左右內史大行卒史比百石以下補郡太守卒史皆各二人邊郡一人先用誦多者若不足乃擇學故補中二千石屬文學掾故補郡屬備員請著功令他如律令制曰可自此以來公卿大夫士彬彬多文學之士矣 先公曰武帝崇儒興學只是好名當時文學布在州郡極留滯故弘請選用之爲學官而復補卒史及郡國備員意輕可知 儒林傳自武帝立五經博士開弟子員設科射策勸以官祿 師古曰射策者謂爲問難疑義書之於策量其大小置爲甲乙之科列而置之不使彰顯有欲射者隨其所取而釋之以知優劣射之言投射也 按此卽後世糊名之意但糊名則是隱舉人之名以防囑託徇私此則似是隱問難之條以防假手宿構其欲示公一也

張湯請博士弟子治尚書春秋補廷尉史

昭帝舉賢良太學增博士弟子員滿百人

成帝末增弟子員三千人歲餘復如故 先公曰西漢博士隸太常有周成均隸宗伯之意州有博士郡有文學掾五經之師儒宮之官長吏辟置布列郡國亦有黨序遂序之意然有二失鄉里學校人不升於太學而補

弟子員者自一項人公卿弟子不養於太學而任子盡隸光祿勳自有四科考試殊塗異方下之心術分裂不一上之考察處荒不精

哀帝時置博士弟子父母死予甯三年

請處家持喪服

按漢時居官者實未嘗行喪禮薛宣後母死弟修去官持服

宣謂修三年喪少能行者由是兄弟不和翟方進母死既葬三十六日起視事自以爲身備漢相不敢踰國家之制注即文帝遺詔所謂也宣方進皆爲相封侯猶不能捨去祿位躬行三年之喪而乃欲立此法以律從學千祿之士

乎

平帝時王莽秉政增元士之子得受業如弟子勿以爲員歲課甲科四十人爲郎中乙科二十人爲太子舍人丙科四十人補文學掌故云奏起明堂辟雍靈臺爲學者築舍萬區班固儒林傳贊自武帝設科射策勸以官祿訖於元始百有餘年傳業者浸盛枝葉蕃滋一經說至百餘萬言大師衆至千餘人蓋利祿之路然

河間獻王來朝獻雅樂對三雍宮

注三雍明堂詳廟靈臺也

世祖建武五年十月營起太學車駕幸太學賜博士弟子各有差

光武中興先訪儒雅四方學士雲會京師於是立五經博士各以其法教授凡十四博士謂易有施孟梁邱京氏尚書歐陽大小夏侯詩齊魯韓禮大小戴春秋嚴顏按西京博士但以名流爲之無選試之法中興以來始試而後用蓋既欲其爲人之師範則不容不先試其能否也博士舉狀曰生事愛敬喪沒如禮通易尚

書孝經論語兼綜載籍窮微闡奧隱居樂道不求聞達身無金痍痼疾三十六屬不與妖惡交通

十九年車駕幸太學會諸博士論難於前桓榮被服儒衣溫恭有醜藉辨明經義儒者莫及特加賞賜又詔諸生雅吹擊磬盡日乃罷中元元年初營明堂辟廱靈臺未用事

明帝永年二年臨辟廱初行大射禮 光武始建三廡明帝卽位親行其禮天子始冠通天衣日月備法物之

備感清道之儀坐明堂而朝羣后登靈臺以望雲物祖割辟廱之上尊養三老五更饗射禮畢帝正坐自講諸儒執經問難於前冠帶搢紳之人闔橋門而觀聽者蓋億萬計其後復爲功臣子孫四姓末屬別上校舍搜選高能以受其業自期門羽林之士悉令通孝經章句匈奴亦遣子入學濟濟洋洋盛於永平矣 蔡邕明堂論

曰明堂事之大義之深也取其宗祀之清貌則曰清廟取其正室之貌則曰太廟取其尊崇則曰太室取其堂則曰明堂取其四門之學則曰太學取其四面周水圓如璧則曰辟廱異名而同事其實一也易傳大初篇曰天子旦入東學晝入南學暮入西學在中央曰太學天子之所自學也禮記保傅篇曰帝入東學上親而貴仁入西學上賢而貴德入南學上齒而貴信入北學上貴而尊爵入太學承師而問道與易傳同魏文侯孝經傳曰大學者中學明堂之位也禮記古大明堂之禮曰膳夫是相禮日中出南園見九侯門子日側出西園視五國之事日闕出北園視帝節猶爾雅曰宮中之門謂之闕王居明堂之禮又別陰陽門南門稱門西門稱闕故周官有門闕之學師氏教以三德守王門保氏教以六藝守王闕然則師氏居東門南門保氏居西門北門也

知掌教國子與易傳保傅王居明堂之禮參相發明爲四學焉其制度數各有所法堂方百四十四尺坤之策也屋圓屋徑二百一十六尺乾之策也太廟明堂方三十六丈通天屋徑九丈陰陽九六之變且圓蓋方載六九之道也八闕以象八卦九室以象九州十二宮以應辰三十六戶七十二牖以四戶八牖乘九室之數也戶皆外設而不閉示天下不藏也通天屋高八十一尺黃鐘九九之實也二十八柱列於四方亦七宿之象也堂高三丈亦應三統四鄉五色者象其行外廣二十四丈應一歲二十四氣四周以水象四海王者之大禮也按如豈說則古者明堂辟廡太學太廟合爲一所以朝以祭以教以養以射皆於其地東漢時辟廡以爲天子養老大射行禮之所太學以爲博士弟子授業之所析爲二處與古異要之太學與辟廡固不可析爲二處養老大射其與傳道授業亦豈二事哉

永平九年爲四姓小侯開立學校置五經師

外戚樊氏郭氏陰氏馬氏

肅宗建初中大會諸儒於白虎觀考詳同異連月乃罷帝親臨稱制如石渠故事顧命史臣著爲通義又詔高堂生受古文尙書毛詩穀梁左氏春秋雖不立學官然皆擢高第爲講郎給事近署所以網羅逸軼博存衆家順帝永建六年繕太學更開拓房室凡二百四十房千八百五十室將作大匠翟酺言孝文皇帝始置一經博士武帝大合天下之書而孝宣論六經於石渠學者滋盛弟子萬數光武初興愍其荒廢起太學博士舍丙

卜書諸生橫卷爲海內所集明帝時辟廡始成欲毀太學太尉趙熹以爲太學辟廡皆宜兼存故並傳至今

而頃者頽廢至於國採芻牧之處宜更修繕誘進後學

梁太后詔令大將軍以下悉遣子入學每歲輒於鄉射月一籌會之以此爲常自是游學增盛至三萬餘生然章句漸疎多以浮華相尚儒者之風蓋衰矣

桓帝延熹五年太學西門自壞襄楷上疏曰太學天子教化之宮其門無故自壞者言文德將喪教化廢也

時甘陵有南北部黨人之譏汝南南陽又有晝諸坐嘯之謠因此流言轉入太學諸生三萬餘人郭林宗賈偉節爲之冠並與李膺陳蕃王暢更相褒重學中語曰天下模楷李元禮不畏強禦陳仲舉天下俊秀王叔茂又

渤海公族進階

公族姓也名進階

扶風魏齊卿並危言深論不矜豪強公卿以下畏其貶議屣履到門牢修乃上書誣

告膺等養太學游士交結諸郡生徒更相驅馳共爲部黨誹訕朝廷疑亂風俗天子震怒下郡國捕黨人收執膺等辭所連及陳實之徒二百餘人書名三府禁錮終身自是正重廢放邪枉熾結海內希風之徒遂共相標榜指天下名士爲之稱號曰三君八俊八顧八及八廚

建和初詔諸學生比郡國明經試次第上名永壽二年詔復課試諸生補郎舍人後復制學生滿歲通經高第補吏 其後綱紀驟紊凡所選用莫非情故乃立三互法

詳見舉官門

黨人既誅高明善士多坐流廢諸博士試甲乙科爭第高下更相告訟亦有私行金貨定蘭臺漆書經字以合其私文熹平四年靈帝乃詔諸儒正定五經刊於石碑爲古文篆隸三體書法以相參檢樹之學門

鴻都門學 初靈帝好學自造皇義篇五十章因引諸生能爲文賦者本頗以經術相招後諸爲尺牘及工書鳥篆者皆加引召遂至數十人侍中祭酒樂松賈護多引無行趨勢之徒並待制鴻都門下喜陳方俗閭里小事帝甚悅之待以不次光和元年遂置鴻都門學畫孔子及七十二弟子像其諸生皆勅州郡三公舉用辟召乃有封侯賜爵者士君子皆恥與爲列焉後又詔中尚方爲鴻都文學梁松江覽等三十二人圖像立贊以勸學者尚書楊球奏曰臣聞傳曰君舉必書書而不法後嗣何觀按松覽等皆出於微蔑斗筲小人依憑世戚附託權豪僥倖承睫微進明時或獻賦一篇或鳥篆盈簡而位升郎中形圖丹青亦有筆不點牘辭不辯心假手請字妖僞百品莫不被蒙殊恩蟬蛻滓濁是以有識掩口天下嗟歎臣聞圖象之設以昭勸戒欲令人君動鑑得失未聞孺子小人詐作文頌而可妄竊天官垂象圖素者也 先公曰鴻都門漢宮門也太學公學也鴻都學私學也學乃天下公而以爲人主私可乎是以士君子之欲與爲列者則以爲恥公卿州縣之舉辟也必敷書強之人心之公豈可誣也明帝臨幸辟離自爲辨說已失人君之體章帝患五經同異博集諸儒會議白虎觀天子稱制臨決去聖久遠六經殘闕諸儒論難前後異說而欲以天子之尊臨定是非於一言之間難矣哉鴻都之興蔡邕言之以爲章帝白虎釋義其事優大彼靈帝之童心稚識何足語此愚謂啟帝之私心者往往自白虎觀之稱制臨決始

獻帝初平四年試儒生四十餘人上第位郎中次太子舍人下第者罷之 詔曰孔子歎學之不講則所識日

忘今者儒年踰六十去離本土營求糧資不得事業結童入學白首空歸長安農野永絕榮望朕甚憫焉其依科罷者聽爲太子舍人 先公曰漢祚至此時已如日薄桑榆人迫耄荒乃不自哀而哀者儒之不遇邪原四

魏黃初元年後始掃除太學之灰炭補葺石碑之缺壞備博士之員錄依漢甲乙以考課至太和青龍中中外多事諸生千數而諸博士率皆蠲疏無以教弟子本亦避役竟無能習學正始中公卿以下四百餘人其能操筆者未有十人多皆相從飽食而退黃初五年立太學制五經課試之法置春秋穀梁博士時慕學者始詣太學爲門人滿二歲試通一經者稱弟子不通一經者罷遣

明帝太和二年詔申勅郡國貢士以經學爲先

四年詔曰世之質文隨教而變兵亂以來經學廢絕後生進趣不由典謨豈訓導未洽將進用者不以德顯乎其郎吏學通一經才任牧民博士課試擢其高第者亟用其浮華不務道本者皆罷退之

齊王正始中劉馥上言黃初以來崇立太學一十餘年而成者蓋寡由博士選輕諸生避役高門子孫恥非其倫故學者雖有其名而無其實雖設其教而無其功宜高選博士取行爲人表經任人師者掌教國子依遵古法使二千石以上子孫年從十五皆入太學明制黜陟陳榮辱之路

晉武帝太始八年有司奏太學生七千餘人才任四品聽留詔曰已試經者留之大臣子弟堪受教者令入學

惠帝武惠郡國 咸甯二年起國子學

惠帝元康元年以人多猥雜欲辨其涇渭於是制立學官第五品以上得入國學

太常荀崧上疏曰昔武皇帝崇儒術以賈馬鄭杜伏孔王何之徒章句傳注衆家之學置博士十九人二十州之中師徒相傳學士如林猶選張華劉實居太常之官以重儒教伏聞節省之制皆三分置二博士舊員十有九人准古計今猶未中半九人以外猶宜增置周禮左氏公羊穀梁春秋臣以爲宜各置一人以傳其學遇王敦難不行 征南軍司戴邈上言喪亂以來庠序廢廢議者或謂平世尙文遭亂尙武此言似之而實不然夫儒道深奧不可倉卒而成比天下平泰然後修之則廢墜已久矣又貴游之子未必有斬將奪旗之才從軍征戍之役不及盛年使之講肄道義良可惜也世道久喪禮俗日弊如火之消膏莫之覺也今王業肇建萬物權輿宜篤道崇儒以勵風化從之

成帝咸康三年國子祭酒袁瓌太常馮懷以江左浸安請興學校帝從之乃立太學徵生徒而士大夫習尙老莊儒術終不振 先公曰是時趙亦下書令郡國立五經博士初勅置大小博士至是復置國子博士南北之學並興而江左雖微中原喪亂則自若也

太元九年尙書謝石請興復國學以訓胄子頒下州郡普修鄉校帝納其言國子祭酒殷茂上言臣聞舊制國學生皆取冠族華官比例皇儲而中混蘭艾人情恥之詔雖襲納竟不施行

秦王堅臨太學考學生經義上第擢叙者八十三人又作教武堂於渭城命太學生明陰陽兵法者教授諸將

陽平公融坐擅起學會爲有司所糾高泰謂王猛曰昔魯僖公以泮宮發頌齊宣王以稷下垂聲今陽平公開建學宮追蹤齊魯不開明詔褒美乃更煩有司舉劾乎乃止

宋文帝雅好藝文使丹陽尹盧江何尚之立元學太子率更令何承天立史學司徒參軍謝元立文學散騎常侍雷次宗立儒學

齊高帝建和四年詔立國學以張緒爲祭酒以國諱廢學先公曰齊高卽位之初求直言崔祖思以爲宜開文武二學使人依方習業優殊者待以不次是春置學秋以國哀罷曾不及歲江左之學校如此

武帝永明三年詔立學初宋太宗置總明觀以集學士亦謂之東觀上以國學既立省總明觀時王儉領國子祭酒詔於儉宅開學士館以總明四部并充之又詔儉以家爲府自宋世祖好文章士大夫無以專經爲業者儉少好禮樂及春秋言論造次必於儒者由是衣冠翕然更尙儒術

梁武帝天監四年置五經博士各一人又置胄子律博士五年置集雅館以招達學致堂胡氏曰史稱武帝雅好儒術至是置五經博士開館宇招後進四館所養士踰千人射策通明者除吏又修孔子廟以示尊師他日又幸國子監親臨講肄且令皇太子及王侯之子年可從師者皆入學可謂勤矣然儒風不振人才不出何也帝心尙佛自天監改元卽不肉食此躬行也故特以美行興學養士故人不從其令而從其意意乃身率令乃文具其後綱維不立人紀胥靡國破身隕爲萬世笑蓋始於此人主心術所尙可不慎哉

齊時師保疑丞嘗賞勳舊國學博士徒有虛名唯國子一學生徒數十人耳胄子以通經進仕者唯博陵崔子發廣平宋游卿而已

周武帝保定三年幸太學以太傅燕公子謹爲三老而乞言焉

天和元年詔諸胄子入學但束脩於師不勞釋奠釋奠者學成之祭自今永以爲式

隋文帝開皇中令國子寺不隸太常前代皆屬太常也

仁壽元年詔以天下學校生徒多而不精唯簡留國子學生七十人太學四門及州縣學並廢前殿內將軍河

間劉炫上表切諫不聽又改國子爲太學 水心葉氏曰當時國子千數則所散遣者數千萬人豈不駭動史

臣以爲其暮年精華稍竭致然時方遣十六使巡省風俗而詔以爲徒有名錄空度歲時未有德爲代範才任

國用良由設學之理多而未精至三年七月詔令州縣搜揚賢哲則云雖求傳巖莫見幽人徒想崆峒未聞至

道惟恐商歌長夜抱關夷門旨意懇切且限以三旬咸令進路徵召將送必須以禮則所謂精華將竭有所厭

怠者亦未然蓋其心實謂空設學校未足以得人耳古之爲教使材者必由學舜周公之論是也漢以後傳經

師章句而已材者由於學則枉以壞不材者由於學則偃以成教之無本而不行取之雖驟而不獲則學之感

衰興廢蓋未易言也 先公曰劉炫上表言學校不宜廢而帝不納由其不學故也牛奇章不可辭其責矣後

盜賊羣起經籍道息炫亦餓死哀哉水心乃以爲帝心實謂空設學校未足以得人材然則廢之誠是歟

煬帝卽位後開庠序國子郡縣之學盛於開皇之初徵辟儒生遠近畢至於時習儒多已凋亡惟信都劉士元河間劉光伯拔萃出類學通南北博及古今後生鑽仰諸經疏指紳咸宗師之既而外事四夷戎馬不思師徒怠傲盜賊羣起方領矩步之徒亦轉死溝壑經籍湮沒於煨燼矣

唐制凡學大皆隸於國子監凡禮記春秋左氏傳爲大經詩周禮儀禮爲中經易尚書春秋公羊穀梁爲小經通二經者大經小經各一若中經二通三經者大經中經小經各一通五經者大經皆通餘經各一孝經論語皆兼通之凡治孝經論語共限一歲尚書公羊穀梁各一歲半易詩周禮儀禮各二歲禮記左氏傳各三歲學書日紙一幅間習時務策讀國語說文字林三蒼爾雅凡書學石經三體限三歲說文二歲字林一歲凡算學孫子五曹共限一歲九章海島共三歲張邱建夏侯陽各一歲周髀五經算共一歲綴術四歲緝古三歲記遺三等數皆兼習之旬給假一目前假博士考試讀者千言試一帖帖三言講者二千言問大義一條總三條通二爲第下及者有罰歲終通一年之業口問十義大條通八爲上六爲中五爲下併三下與在學九歲律生六歲不堪貢者罷歸諸學生通二經俊士通三經已及第而願留者四門學生補太學太學生補國子學每歲五月田假九月授衣假二百里外給程其不帥教及歲中違程滿三十日事故百日緣親病二百日皆罷歸高祖武德元年詔皇族子孫及功臣子弟於祕書外省別立小學

太宗貞觀五年以後數幸國學於門下別置弘文館於東宮置崇文館增創學會國學太學四門亦增生員其

書算各置博士其屯營飛騎亦給博士授以經業高麗百濟新羅高昌吐蕃諸國會長亦遣子弟請入國學於是國學之內八千餘人國學之盛近古未有

高宗龍朔二年京都置國子監明年以書學隸蘭臺算學隸祕閣律學隸詳刑

中宗神龍二年勅學生在學各以長幼爲序初入學皆行束修之禮 洪氏容齋隨筆曰唐大興國子生初入置束帛一篋酒一壺修一案爲束修之禮太學四門律書算學皆如國子之法束修之禮乃於此見之開元禮載皇子束修束帛一篋五疋酒一壺二斗修一案三脰皇子服學生之服至學門外陳三物於西南少進曰某方受業於先生敢請見執篋者以篋授皇子皇子跪奠篋再拜博士答再拜皇子還避遂進跪取篋博士受幣皇子拜訖乃出其儀如此州縣學生亦然

詔宗室三等以下五等以上未出身願宿衛及仕國子生聽之其學業成而堪貴者宗正寺試送監舉如常法三衛番下日願入學者聽附國子學太學及律館習業蕃王及可汗子孫願入學者附國子學讀書

開元五年鄉貢明經進士見訖國子監謁先師學官開講問義有司爲設食清資五品以上官及朝集使皆往闕禮焉

七年勅州縣學生入四門學爲俊士卽諸州貢舉省試不第願入學者聽

開元十一年上設麗正書院聚文學之士祕書監徐堅太常博士會稽賀知章等或修書或侍講以張說爲修

書使以總之有司供給優厚中書舍人陸堅以爲此屬無益於國徒爲糜費欲悉奏罷之張說曰自古帝王於國家無事之時莫不崇宮室廣聲色今天子獨延禮文儒發揮典籍所益者大所損者微 帝愛鄭處之材欲置左右以其不事事更爲置廣文館以處爲博士處聞命不知廣文曹司何在訴宰相宰相曰上增國學置廣文館以居賢者今後世言廣文博士自君始不亦美乎處乃就職久之雨壞廡舍有司不復修完寓治國子館自是遂廢

天寶十二載勅天下罷鄉貢舉人不由國子及郡縣學者勿舉選 十四年復鄉貢

代宗廣德二年詔曰古者設太學教胄子雖年數不登兵革或動而俎豆之事不廢頃年戎車屢駕諸生輟講宜追學生在館習業度支給廚米 肅宗時爲國子祭酒建崇太學以樹教本帝悟其言詔羣臣有籍於朝及神策六軍子弟肄業者聽補生員

二月釋奠於國子監命宰相帥常參官魚朝恩率六軍諸將往聽講

國子監成以魚朝恩行內侍監判國子監事中書舍人常衮言成均之任當用名儒不宜以宦者領之不聽

先公曰先王之禮受成獻馘於學漢期門羽林之士悉通一經然則釋奠講經宰相帥常參官武臣率六軍諸將往聽未爲失也而魚朝恩判監事則非也以薰腐之餘而列之熊羆之士不二心之臣之上豈惟章甫逢掖羞之介冑之夫亦以爲辱矣

德宗貞元六年 歸崇敬爲國子司業皇太子欲臨國學行齒書禮崇敬以學與官名皆不正建議請以國子監爲辟廡省以祭酒爲太師氏司業爲左師右師國子太學四門三館各立五經博士習業考試並以明經爲名得第授官與進士同詔集議皆以省禁非外司所宜名周官世職者稱氏國學非世官不得名辟廡省太師氏大抵憚改作故無施行者

憲宗元和二年置東都監生一百員自天寶後學校益廢生徒流散承泰中雖置西監生而館無定員於是定西京國子館生八十人太學七十人四門三百人廣文六十人律館二十人書算館各十人東都國子館十人太學十五人四門五十人廣文十人律館十人書館三人算館二人而已

文宗太和七年赦節文應公卿士族子弟取來年正月已後不先入國學習業者不在應明經進士之限

武宗會昌五年制公卿百官子弟及京畿內士人寄客修明經進士業者並隸名太學外州寄士人並隸名所在官學 咸通中劉允章爲禮部侍郎請諸生及進士第並謁先師衣青衿介幘以還古制又建言羣臣輸光學錢治庠序宰相五萬節度使四萬刺史萬詔可

梁開平三年國子監奏修建文宣王廟請率在朝及天下見任官俸錢每員尅留一十五文

後唐天成五年正月國子監奏當監舊例初補監生有束修錢二千及第後光學錢一千 按五代弊法凡官府公使錢多令居官者自出其費宰相則有光省錢御史則有光臺錢至於監生亦令其出光學錢則貧士何

所從出既微其錢復不補其役待士之意亦太薄矣然史所言多有未曾授業輒解送者往往亂離之際其居

學者亦曾苟賤曾濫之耳

原四十一

宋初增修國子監學舍周顯德二年以天福營利施虎建國子監修飾先聖十哲像畫七十二賢及先儒二十一人像於東西廊之

板壁

仁宗慶曆二年天章閣侍講王洙言國子監及科場罷日則生徒散歸考官倚席若此但爲遊士寄應之所殊

無國子肄習之法按古人所謂中年考校九年大成者進德修業之事也至漢人之補博士弟子員則只限

以通一經而後授之官唐人之法尙彷彿如此至宋熙豐後立三舍之法則不過試之以浮靡之文而誘之以

利祿之途然明經而必至於通一藝試文而必至於歷三舍皆非且暮可就故國家雖未嘗嚴其法制稽其去

留而爲士者內恥於習業之未精外誘於榮途之可慕其坐學之日自不容不久今慶曆之法所謂習業者雖

有講肄聽讀而未嘗限以通經之歲月所謂榮途者止於拔解赴省而未嘗別有優異之捷徑此所以科場罷

日則生徒散歸講官倚席雖限以聽學之歲月而不能強其久留反以淹滯爲困故不久而遂廢也

慶曆四年判國子監王拱辰等請以錫慶院爲太學從之明年三司言更造錫慶院乏財費多而虜使錫宴之

所不可闕乃復以太學爲錫慶院

晉祐末以胡瑗爲國子監講書專管勾太學初人未甚信服乃使其徒之已仕者盛僑顧臨輩分治其事又令

孫覺說孟子中都士人稍稍從之一日升堂講易音韻高朗指意明白衆方大服然在列者皆不喜謗議蜂起  
瓊強力不倦以卒有立瓊在學時每公私試罷舉儀率諸生雅樂歌詩乙夜乃散諸齋亦自歌詩奏琴瑟之聲  
徹於外瓊在湖學教法最備始建太學有司請下湖學取瓊之法今爲著令

神宗熙寧四年侍御史鄧綰請以錫慶院爲太學仍修武成王廟爲右學生員蓋爲三等初入學爲外會外會  
升內會內會升上會月考試舉業優等上中書其正錄學諭以上會生爲之

八年頒王安石詩書周禮議於學

仁宗時嘗置武學旣而中輟至是復置 又置律學置教授四員

公試習律令生員義三道習斷案生員一道刑名五事至七事私試義二道案一道刑名五事至三事

元豐二年頒學令太學置八十齋齋容三十人外舍生二千人內舍生三百人上舍生百人總二千四百月一  
私試歲一公試 太學生虞蕃訟學官升會偏曲下御史臺核實何正臣請置獄辭所及雖非蕃所嘗言者皆  
得究治於是追逮徧四方踰年獄始成判監李季長坐受學生竹簾陶器削職停官判監黃履失察陳襄受請  
皆降罰直講王沈之削籍太常丞余中貶秩皆有賦也

又詔歲賜緡錢至二萬五千又益郡縣田租屋課息錢之類以爲學費

學制所言國子監以國子名而實未嘗教養國子乃詔許清要官親戚入監爲國子生聽讀

七年用司業朱服言四方來試禮部者雖不籍於太學或有顯過若造飛語謗朝政許監官以聞用學規殿罰  
按子產不以鄉人議執政之然否而毀鄉校蓋以學校所以來公論也今熙甯之建太學蘇嘉言變法事忤  
介甫則學官并坐其罪而改用李定常秩之徒試文則宗新經策時務則誇新法今又立飛語謗朝政者以學  
規殿罰之條則太學之設乃箝制羅織之具耳以是爲一道德可乎

哲宗元祐六年岑象求等言國學設師生而禁其謁見無從叩問禮部詳度許從長貳請益仍立講訓考課之  
式私試既不鎖宿則是日講說亦不廢

七年置廣文館解額先是開封解額稍優四方士子多昌畿縣戶以試禮部案舊制凡試國子監者先補中廣  
文館生乃得以牒求試遂依倣其法

紹聖元年國子監奏罷廣文館發解其額本取之開封府諸科及國子悉復還之 詔罷春秋科

元符元年詔二禮兩經許占全額之半以其半及他經復置春秋博士崇甯間復罷之

徽宗崇甯元年命將作少監李誠卽城南門外相地營建外學是爲辟雍蔡京又奏古者國內外皆有學周成  
均蓋在邦中而黨庠遂序則在國外臣親承聖詔天下皆興學貢士卽國南建外學以受之俟其行藝中率然  
後升諸太學凡此聖意悉與古合今上其所當行者 詔取士皆從學校三舍廢科舉法

欽宗靖康元年右諫議大夫楊時言王安石著爲邪說以塗學者耳目使蔡京之徒得以輕費妄用極侈靡以

奉上幾危宗社乞追奪安石王爵毀去配饗之像使邪說淫亂不能爲學者惑詔王安石從祀孔子廟延禮部  
其改位置在鄭康成以下

律學 熙甯六年置教授四員凡命官學人皆得自占入學舉人須命官二員任其平素先入學聽讀而後試  
補習斷案人試案一道習律令人試大義五道月一公試三私試  
需用古今刑書許於所屬索取凡朝廷新頒條令刑部晝日關送

算學 崇甯三年立其業以九章周髀及假設疑數爲算問仍兼海島孫子五曹張邱建夏侯陽算法并歷算  
三式天文書爲本科本科外人占一小經願占大經者聽公私試三舍法略如太學上舍三等推恩以通仕登  
仕將仕郎爲次 容齋洪氏隨筆曰大觀中置算學如庠序之制三年三月詔以文宣王爲先師登鄒荆三國  
公配饗十哲從祀而列自昔著名算數之人繪像於兩廊加賜五等之爵於是中書舍人張邦昌定其名風后  
大槓隸首容成箕子商高常僕鬼臾區巫咸九人封公史蘇卜徒父卜偃梓與卜楚邱史趙史墨裨竈榮方甘  
德石申鮮于妄人耿壽昌夏侯勝京房翼奉李尋張衡周興單颺樊英郭璞何承天宋景業蕭吉臨孝恭張恭  
張曾元王朴二十八人封伯鄧平劉洪管輅趙達祖沖之殷紹信都芳許遵耿詢劉焯劉炫傅仁均王孝通翟  
曇羅李滄風王希明李鼎祚邊岡耶顛襄楷二十人司馬季主洛下閎嚴君平劉徽姜岌張邱建夏侯豐甄鸞  
龐太翼九人封男考其所條具固有於傳記無聞者而高下等差殊爲乖謬如司馬季主嚴君平止於男爵鮮

于妾人洛下闕同定太初歷而妾人封伯下闕封男尤可笑也十一月又改以黃帝爲先師云

書學 篆隸草三體字說文字說爾雅博雅方言五書仍兼通論語孟子義願占大經者聽三舍試補升降略同算學法推恩差降一等 畫學 曰佛道人物山水鳥獸花竹屋木以說文爾雅方言釋名教授說文則令篆字著音訓餘書皆說答以所解義觀其能通畫意與否仍分士流雜流別其齋以居之士流兼習一大經一小經雜流則誦小經或讀律考畫文等以不做前人而物之情態形色俱若自然筆韻高雋爲工三舍試補升降以及推恩略同書學惟雜流授官止自三班借職以下三等

醫學 初隸太常寺神宗時置提舉判局始不隸太常亦置教授一員翰林醫官以下與上等學生及在外良醫爲之學生常以春試取三百人爲額三學生願預者聽做三學之制立三舍法爲三科以教諸生有方脈科鍼科瘍科方脈以素問難經脈經爲大經病源千金翼方爲小經考察升補等略如諸學之法其選用最高者爲尙藥醫師以次醫職餘各以等補官爲本學博士正錄及外州醫學教授云

高宗紹興八年葉林上書言西漢奪於大盜光武起河朔五年而建太學西晉滅於狂胡元帝興江左一年而建太學二君急於教養未嘗以恢復爲辭饋餉爲解我宋以儒立國垂二百年慈範闕規非漢晉比也今中興聖祚駐蹕東南百司庶府經營略備若起太學計官吏生徒姑養五百人不過費陛下二觀察使之月俸願謀之大臣咨之宿學亟復盛典以昌文治而廷臣皆曰若做元豐則軍食未暇而削弱非禮也請徐議之

十三年始建太學紹興重修視元豐尤密諸齋長諭月書學生行藝於籍每季終論可選者考於學諭十日考於學錄二十日考於學正三十日考於博士四十日考於長貳歲終校定 按自崇觀以來三會之法大備議者病其立捷徑之塗長奔競之風然觀此疏則知當時尙有參假而歸復取鄉舉者如後來之法以資望言則會選尊而鄉舉卑以名額言則會選優而鄉舉窄蓋未嘗有以太學生退就鄉舉者非惟國家無此法而士亦決不肯辭尊而居卑會優而就窄矣

太學補弟子員故例每三歲科舉後朝廷差官鎖院凡四方舉人皆得就試取合格者補入之謂之混補淳熙後朝議以就試者多欲爲之限制乃立待補之法諸路漕司及州軍皆以解試終場人數爲準每百人而取六人許赴補試率以開院後十日揭榜然遠方士人多不就試則爲他人取其公據代之冒濫滋甚 朱子學校貢舉私議曰學校必選實有道德之人使爲學官以來實學之士裁減解額會選謬濫之恩以塞利誘之塗蓋古之太學主於教人而因以取士故士之來者爲義而不爲利且以本朝之事言之如李廌所記元祐侍講呂希哲之言曰仁宗時太學之法寬簡國子先生必求天下賢士真可爲人師者就其中又擇其尤賢者如胡翼之之徒使專教導規矩之事當時天下之士不遠萬里來悅師之其遊太學者端爲道藝稱弟子者中心悅而誠服之蓋猶有古法之遺意也熙甯以來此法浸壞太學但爲聲利之場掌教事者不過取其善爲科舉之文而善得傷於場屋者耳士之有志於義理者既無求於學其奔趨輻輳而來者不過爲解額之濫會選之私而

已師生相視漠然如行路之人間相與言亦未嘗開之以德行道義之實而月書季考者又祇以促其嗜利苟得冒昧無恥之心殊非國家所以立學校人之本意也欲革其弊莫若一遵仁皇之制擇士之有道德可爲人師者以爲學官而久其任使之講明道藝以教訓其學者而又痛減解額之濫以還諸州罷去舍選之法而使爲之師者考察諸州所解德行之士與諸生之賢者而特命以官則太學之教不爲虛設彼懷利干進之流自無所爲而至矣如此則待補之法固可罷去而混補者又必使與諸州科舉同日引試則彼有鄉舉之可望者自不復來而不患其紛冗矣至於取人之數則又嚴爲之額而許其補中之人從上幾分特赴省試則其舍鄉舉而來赴補者亦不爲甚失職矣其計會監試漕試附試之類亦當痛減分數嚴立告賞以絕其冒濫其諸州教官亦以德行人充而責以教導之實則州縣之學亦稍知義理之教而不但爲科舉之學矣

甯宗嘉定九年詔諸王宮學改作宗學參之國朝典故仍隸宗正寺以宮教授改爲博士宗諭 葉適論學校曰何謂京師之學有考察之法而以利誘天下三代漢儒其言學法盛矣皆人耳目之熟知不復論若東漢太學則誠善矣唐初猶得爲美觀本朝其始議建學久而不就王安石乃卒就之然未幾而太學起矣崇觀間以俊秀聞於學者旋爲大官宣和靖康所用誤朝之臣大抵學校之名士也及諸生伏闕搥鼓以請起李綱天下或以爲有忠義之氣而朝廷以爲倡亂動衆者無如太學之士及秦檜爲相務使諸生爲無廉恥以媚己而以小利啗之陰以拒塞言者士人靡然成風獻頌拜表希望恩澤一有不及謗議喧然至於今日太學尤弊蓋其

本法月書季考校定分數以爲終身之利害而其外又以勢利招來之宜其至此而無怪也何謂州縣之學無考察之法則聚食而已往者崇觀政和問蓋嘗考察州縣之學如天子之學使士之進皆由此而罷科舉然行是法者皆小人故不久遂廢今州縣有學置官立師過於漢唐甚遠惟其無所考察徒以聚食而士之俊秀者不願於學矣今宜稍重太學變其故習無以利誘擇當世之大儒久於其職而相與講習使源流有自其卓然成德者朝廷官使之州縣之學宜使考察上於監司聞於禮部達於天子其卓然成德者或進於太學或遂官之人知由學而科舉之陋稍可洗去非有所難顧自以爲不可爲耳

原四十二

祠祭喪贈先聖先師

文王世子凡學春官釋奠於先師秋冬亦如之

凡始立學者必釋奠於先聖先師及行事必以幣凡釋奠者必有合也

朱文公禮書謂以下文大合樂致之有合當爲合樂

有國故則否

禮書謂國故當爲喪紀凶札之類

凡大合樂必遂養老

長樂劉氏曰周有天下立四代之學庠序則以舜爲先聖夏學則以

禹爲先聖殷學則以湯爲先聖東脰則以文王爲先聖各取當時左右四聖成其德業者爲之先師以配享焉

此天子立學之法也

臨邛魏氏曰記曰凡學春官釋奠於其先師釋者曰若禮有高堂生樂有制氏詩有毛

公書有伏生至於祀先賢於西學祭樂祖於瞽宗傳者亦謂各於所習之學祭先師夫周公孔子非周魯所得

而專也而經各立師則周典安有是哉古者民以君爲師仁鄙壽夭君官司之而臣則輔相人君以師表萬民

者也自孔子已前曰聖曰賢有道有德則未有不生都顯位沒祭大烝者此非諸生所得祠也自君師之職不修學校廢井牧壞民散而無所係於是始有師弟子羣居以相講授者所謂各祭其先師疑秦漢以來始有之而詩書禮樂各立師不能以相通則秦漢以來爲士者斷不若是之隘也此亦可見世變日降君師之職下移而先王之道分裂矣然而春秋戰國之亂猶有聖賢爲之師秦漢以來猶有專門爲之師故所在郡國尙存先師之號莫祠於學故記人載於禮而傳者又卽其所聞見以明之也

王制天子將出征受成於學

定兵謀也

出征執有罪反釋奠於學以馭賊告

文王世子天子視學大昕鼓徵乃命有司行事興秩節祭先師先聖焉有司卒事反命始之養也適東序釋奠於先聖

周禮凡有道德者使教焉死則以爲樂祖祭於瞽宗

始立學者既興器用幣然後釋菜不舞不授器乃退饋於東序一獻無介語可也

大胥春入學會茶合舞秋頒學合聲

月令仲春之月上丁命樂正習舞釋菜天子乃帥三公九卿諸侯大夫親往視之仲丁命樂正入學習舞

學記大學始教皮弁祭菜示敬道也 正義曰凡釋奠有六始立學釋奠一也四時釋奠有四通前五也王制

師還釋奠於學六也釋菜有三春入學釋菜合舞一也夏器釋菜二也學記皮弁祭菜三也 禮書曰釋菜之

禮猶擊也婦見舅姑其擊也棗栗服修若沒而廟見則釋菜弟子見師其擊也東修若禮於先師則釋菜  
漢高祖十二年十一月上行自淮南還過魯以太牢祠孔子

元帝時孔霸以帝師賜爵號褒成君奉孔子後

成帝綏和元年封殷後孔子世吉適子孔何齊爲殷紹嘉侯千六百七十戶後六月進爵爲公地滿百里  
廟上書曰今仲尼之廟不出闕里孔氏子孫不免編戶以聖人而歆匹夫之祀非皇天之意也今陛下誠能據  
仲尼之系功以封其子孫則國家必獲其福又陛下之名與天亡極何者追聖人素功封其子孫未有法也後  
世必以爲則不滅之名可不勉哉

帝元始初追諡孔子曰褒成宣尼公追封孔均爲褒成侯

建武五年上幸魯使大司空祠孔子封殷後孔安爲殷紹嘉公周後姬常爲周承休公十三年改封常爲  
爲宋公以爲漢賓在三公上十三年封孔均子志爲褒成侯

二年養三老五更於辟雍郡縣行鄉飲酒禮於學校皆祀聖師周公孔子牲以犬十五年三月幸孔  
及七十二弟子親御講堂命皇太子諸王說經

東巡還魯幸闕里以太牢祠孔子及七十二人作六代之樂命儒者講論語帝謂孔僖曰今  
光榮乎對曰臣聞明王聖主莫不尊師貴道今陛下親屈萬乘辱臨闕里此乃崇禮先師增

釋聖德至於光榮非所敢承帝笑曰非聖者子孫焉有斯言乎遂拜偃郕中 歐陽氏集古錄漢魯相置孔子廟卒史碑云司徒臣雄司空臣稽首言魯前相瑛書言詔書崇聖道孔子作春秋制孝經演易繫辭經緯天地故特立廟褒成侯四時來祠事已卽去廟有禮器無常人掌領請置百石卒史一人典主守廟謹問太常祠曹掾馮牟史郭元辭對故事辟雍祠先聖太宰太祝各一人備齋太常丞監祠河南尹給牛羊豕大司農給米臣愚以爲如瑛言可許臣雄等稽首以聞制曰可讀此可見漢祠孔子其禮如此雄吳雄戒趙戒魯相瑛據碑言姓乙字仲卿 徐氏曰高帝雖在倥傯猶能修其祠於過魯之日武帝興太學而獨未聞釋奠之禮至永平十五年幸孔子宅祠仲尼章帝安帝皆幸闕里祠孔子作六代之樂則所以崇文重道者至矣使當時儒學之臣能以古人釋奠之禮而推廣之則又何以加焉

魏文帝黃初二年詔曰昔仲尼資大聖之才懷帝王之器當衰周之末無受命之運在魯衛之朝教化乎洙泗之上悽悽焉遑遑焉欲屈己以存道貶身以救世於時王公終莫能用之乃退考五代之禮修素王之事因魯史而制春秋就太師而正雅頌俾千載之後莫不宗其文以述作仰其聖以成謀咨可謂命世之大聖億載之師表者也遭天下大亂百祀墮壞舊居之廟毀而不修寔成之後絕而莫繼闕里不聞講頌之聲四時不親烝嘗之位斯豈所謂崇禮報功德盛德百世必祀者哉其以議郎孔羨爲宗聖侯邑百戶奉孔子祀令魯郡修起舊廟置百戶吏卒以守衛之又於其外廣爲室屋以居學者

齊王正始七年令太常釋奠以太牢祀孔子於辟雍以頹淵配

晉武帝太始三年改封孔子二十三代孫宗聖侯震爲奉聖亭侯又詔太學及魯國四時備三牲以祀孔子成穆孝武三帝皆以講經親釋奠唯成帝在辟雍自是一時制也孝武以太學在水南懸遠有司議依穆帝升平元年於中堂權立太學釋奠禮畢會百官六品以上

宋文帝元嘉八年奉聖侯有罪奪爵至十九年又授孔隱之隱之兄子熙生謀逆又失爵二十八年更以孔惠雲爲奉聖侯後有重疾失爵孝武大明二年又以孔邁爲奉聖侯邁卒子葵嗣俱嗣有罪失爵

二十二年太子釋奠探晉故事

樂六佾設朝懸之樂器用悉依上公

祭畢親臨學宴會

齊武帝永明三年從喻希議用元嘉故事設軒懸之樂六佾之舞牲牢器用悉依上公

梁武帝大同七年皇太子表其子甯國臨城公入學時議者以與太子有齒冑之議疑之議中巨績等以爲參點回路並事尼父鄒魯稱盛洙汶無譏師道既光得一資敬無虧亞二制可

北齊將講於天子講畢以一太牢釋奠孔宣父配以頹回列軒懸樂六佾舞皇太子每通一經及新立學必釋奠禮先聖先師每歲春秋二仲常行其禮每月朔制祭酒領博士以下及國子諸學生以上大學四門博士升堂助教以下大學諸生階下拜孔聖揖頽回日出行事郡學則於坊內立孔額廟博士以下亦每月朝

隋制國子寺每歲四仲月上丁釋奠州縣學則以春秋仲月釋奠

唐高祖武德二年詔國子學立周公孔子廟四時致祭

七年國子學親臨釋奠引道士沙門與博士雜相駁難

太宗貞觀二年左僕射房元齡等建議武德中詔釋奠於太學以周公爲先聖孔子配享臣以爲周公尼父俱稱聖人庠序置奠本緣夫子故晉宋梁陳及隋大業故事皆以孔子爲先聖顏回爲先師歷代所行古今通允伏請停祭周公升孔子爲先聖以顏回配詔從之

二十年詔皇太子於國學釋奠皇太子初獻國子祭酒亞獻攝司業終獻

二十一年詔以左邱明卜子夏公羊高穀梁赤伏勝高堂生戴聖毛萇孔安國劉向鄭衆杜子春馬融盧植鄭康成服子慎何休王肅王輔嗣杜元凱范甯賈逵等二十二人代用其書垂於國胄自今有事於太學並令配享尼父廟堂

高宗永徽中制改周公爲先聖孔子爲先師顏回左邱明從祀

顯慶二年太尉長孫無忌等議曰按新禮孔子爲先聖顏回爲先師又准貞觀二十一年以孔子爲先聖更以左邱明等二十二人與顏回俱配尼父於太學今據永徽令文改用周公爲先聖遂黜孔子爲先師顏回邱明並爲從祀謹按禮記云凡學春官釋奠於其先師鄭元注曰官謂詩書禮樂之官也先師者若禮有高堂生樂有制氏詩有毛公書有伏生可以爲師者又禮記曰始立學釋奠於先聖鄭元注曰若周公孔子也據禮爲定

昭然自別聖則非周卽孔子則偏善一經漢魏以來取捨各異顏回孔子互作先師宣父周公迭爲先聖求共節文遞有得失所以貞觀之末親降綸言依禮記之明文酌康成之異說正孔子爲先聖加衆儒爲先師承垂制於後昆革往代之紕繆而今新令不詳制旨軋事刊改遂遠明詔但成王幼年周公踐極制禮作樂功比帝王所以禹湯文武成王周公爲大君子又說明王孝道乃述周公嚴配此卽姬旦鴻業合同王者祀之儒官就享實貶其功仲尼生衰周之末拯文喪之弊祖述堯舜憲章文武弘聖教於六經闡儒風於千世故孟軻稱生民以來一人而已自漢已降奕葉封侯崇奉其聖迄於今日胡可降茲上哲俯入先師且邱明之徒見行其學貶爲從祀亦無故事今請改令從詔於義爲允其周公仍依別禮配享武王詔從之

三年文宣王廟詔用宣和之舞

國子博士范曄撰樂章

總章三年皇太子弘釋奠於國學 開耀元年景龍二年永隆二年並行此禮

乾封元年追贈孔子爲太師 天授元年封孔子爲隆道公

總章元年顏回贈太子少師曾參贈太子少保並配享孔子廟

元宗開元七年以貢舉人將謁先師質問疑義勅皇太子及諸子宜行齒胄禮乃謁先聖太子初獻亞終獻並以胄子充右散騎常侍褚無量講孝經并禮記文王世子篇 又詔春秋釋奠用牲牢其屬縣用酒醢而已

八年詔曰顏子等十哲宜爲坐像悉令從祀曾參大孝德冠同列特爲塑像坐於十哲之次因圖畫七十弟子

及二十二賢於廟壁上以顏子亞聖親爲製贊書於石仍令當朝文士分贊題壁 按自禮記釋奠於先聖先師之說鄭康成釋先師以爲如樂有制氏詩有毛公禮有高堂生書有伏生之類自是後儒言釋奠者本禮記言先師者本鄭氏注唐貞觀時遂以左邱明以下至賈逵二十一人爲先師配食孔聖夫聖作之者也師述之者也述夫子之道以親炙言之則莫如十哲七十二賢以傳授言之則莫如子思孟子必是而後可以言先師可以繼先聖今捨是不錄而皆取之於釋經之諸儒姑以二十二子言之獨子夏無以讓爲左邱明公羊高穀梁赤猶曰受經於聖人而得其大義至於高堂生以下則謂之經師可矣非人師也如毛鄭之釋經於名物固爲該洽而義理間有差舛至王輔嗣之宗旨老莊賈景伯之附會讖緯則其所學已非聖人之學矣又況戴聖馬融之貪鄙則其素履固當見擯於洙泗今乃俱在脩食之列而高第弟子餘顏淵之外反不得預李元瓘雖惡惡言之而僅能升十哲曾子儕於二十二子之列而七十二賢俱不露享祀蓋拘於康成之注而以專門訓詁爲盡得聖道之傳也

二十七年詔曰弘我王化在乎儒術能發此道敢迪含靈則生人以來未有如夫子者也所謂自天攸縱將聖多能德配乾坤身揭日月夫子既稱先聖可追謚爲文宣王其兩京國子監及天下諸州夫子南面坐十哲等東西行列侍且門人三千見稱十哲包夫衆美實越等夷暢元聖之風規發人倫之耳目並宜褒贈以寵賢明其顏子既云亞聖須優其秩

又孔子格言參也稱魯雖居七十之數不載四科之目頃雖參於十哲終未殊於等倫久稽先旨俾修舊位命  
尚書左丞相裴耀卿攝太尉持節就國子廟册册畢所司奠祭亦如釋奠之禮又遣太子少保崔琳往東都就  
廟行册禮又勅兩京及兗州舊宅廟像宜改服袞冕其諸州及縣廟宇既小但移南面不須改衣服兩京樂用  
宮縣春秋二仲上丁令三公攝行事七十子並宜追贈

孔子弟子姓名之可見者史記家語所載并十哲共七十七人內公伯寮秦商鄒單家語不載而別有琴牢陳

亢縣竄三人唐贈典見禮樂志及唐會要所載並七十七人

姓名與史記同

獨杜氏通典所載則除十哲外自計七十

三人係增入遊瓊林放陳亢申根琴牢琴張六人若以爲七十二賢在十哲之外則史記家語所載少五人通  
典所載多一人然太史公作仲尼弟子傳序言孔子之所嚴事於周則老子於衛適伯玉於齊晏平仲於楚老  
萊子於鄭子產於魯孟公綽數稱臧文仲柳下惠銅鞮伯華介山子然孔子皆後之不並世又史稱孔子適衛  
主蘧伯玉及反魯伯玉使人至孔子禮其使而稱以夫子則尊之者如此然則瓊雖賢蓋非門弟子之列也

肅宗永泰二年修國學祠堂成祭酒蕭昕始奏釋奠宰相元載杜鴻漸李抱玉及常參官六軍將軍戴觀

自復二京惟正會之樂用宮縣郊廟之享登歌而已文武二舞亦不能具至是魚朝恩典監事乃奏宮縣於論  
堂而雜以教坊工伎憲宗時夔州刺史劉禹錫嘗歎天下學校廢乃奏記宰相曰言者謂天下少士而不知養  
材之道黷堙不揚非天不生材也是不耕而歎廩庾之無餘可乎貞觀時學會千二百區生徒三千餘外夷道

子弟入附者五國今室廡圯廢生徒衰少非學官不振病無費以給之也凡學官春秋釋奠於先師斯止辟雍  
預宮非及天下今州縣咸以春秋上丁有事孔子廟其禮不應古甚非孔子意傳曰祭不欲數又曰祭神如神  
在與其煩於薦饗孰若行其教令教令頽靡而以非禮之祀媚之儒者所宜疾竊觀歷代無有是事武德初詔  
國學立周公孔子廟四時祭貞觀中詔修孔子廟兖州後許敬宗等奏天下州縣置三獻官其他如立社元宗  
與儒臣議罷釋奠牲牢薦酒脯著爲令遂無有非之者今禮四縣歲釋奠費十六萬舉天下州縣歲費凡四千  
萬適資三獻官飾衣裳貽妻子於學無補也請議罷天下州縣牲牢衣幣春秋祭如開元時籍其資半畀所隸  
州使增學校舉半歸太學猶不下萬計可以營學室具器用豐饌食增掌故以備使令儒官各加稍食州縣進  
士皆立程督則貞觀之風粲然可復當時不用其言

德宗建中九年太常奏以十一月貢舉人講先師合與親饗太廟日同准大典上丁釋奠若與太廟同日卽用  
中丁其講先師請別擇日從之

後唐長興三年勅文宣王廟四壁英賢自此每釋奠宜准郊祀錄各陳醢醢等諸物以祭

周廣順二年六月以文宣王四十三代孫前曲阜縣令孔仁玉復爲曲阜縣令仍賜緋魚袋以亞聖顏淵裔孫

顏涉爲曲阜縣主簿仍勅兖州修葺祠宇墓側禁樵採

時車駕親征兖州初平遠幸曲阜講孔子廟既奠將致  
敬左右曰仲尼人臣也無致敬之禮上曰文宣百代宗

王師得無拜之  
卽拜奠於祠前  
致堂胡氏曰人爲諂諛趨利而不顧義者也孔子大聖途之人猶知之豈以位云乎如以位

固異代之陪臣也如以道則配乎天地如以功則賢乎堯舜卒伍一旦爲帝王而以異代陪臣臨天下之大聖豈特趨利導諛又無是非之心矣斯臣也當周太祖時以拜孔子爲不可則當石高祖時必以拜契丹爲可者是故君子有言天下國家所患莫甚於在位者不知學在位者不知學則其君不得聞大道則淺俗之論易入理義之言難進人主功德高下一係於此然則學非君臣之急務哉

宋太祖建隆三年詔廟門準令立戟十六枝

太宗太平興國三年詔免兗州曲阜縣襲封文宣公家租稅 先是歷代以聖人之後不預庸調周顯德中遣使均田遂抑爲編戶至是孔氏訴於州以聞帝特免之

真宗咸平三年京封禮畢幸曲阜縣謁文宣王廟復幸孔林以樹木擁道降輿乘馬至文宣王墓奠拜追諡曰元聖文宣王 先是詔有司檢討漢唐褒崇宣聖故事初欲追諡爲帝或言宣父周之陪臣周止稱王不當加帝號故第增美名春秋演孔圖曰孔子毋夢感黑帝而生故曰元聖莊子曰恬澹元聖素王之道遂取以爲稱詔封叔梁紇齊國公顏氏魯國太夫人并官氏鄆國夫人

大中祥符五年詔改元聖文宣王諡爲至聖文宣王避聖祖名也

列國子監孫奭言釋奠舊禮以祭酒司業博士爲三獻新禮以三公行事近年只差獻官二員通攝恐未副崇祀需學之意望令備差太尉太常光祿卿以充三獻詔可又詔釋奠儀注及祭器圖令崇文館雕印頒行 歐

陽氏襄州穀城縣夫子廟記自孔子沒後之學者莫不宗焉故天下皆尊以爲先聖而後世無以易學校廢久矣學者莫知所師隋唐之際天下州縣皆立學置學官生員而釋奠之禮遂以著令其後州縣學廢而釋奠之禮更以其著令故得不廢學廢矣無所從祭則皆廟而祭之荀卿子曰仲尼聖人之不得勢者也然使其得勢則爲堯舜矣不幸無時而沒特以學者之故享弟子春秋之禮而後之人不推所謂釋奠者徒見官爲立祠而州縣莫不祭之則以爲夫子之尊由此爲盛甚者乃謂生雖不得位而沒有所享以爲夫子榮謂有德之報雖堯舜莫若何其謬歟 按古者入學則釋奠於先聖先師明聖賢當祠之於學也自唐以來州縣莫不有學則凡學莫不有先聖之廟矣然攷之前賢文集如柳子厚柳州文宣王廟碑與歐公此記及劉公是新息縣鹽城縣夫子廟記皆言廟而不及學蓋衰亂之後荒陋之邦往往庠序頽圯教養廢弛而文廟獨存長吏之有識者以興學立教其事重而費鉅故姑葺文廟俾不廢夫子之祠所謂猶賢乎已然聖賢在天之靈固非如釋老二氏與俗祀百神之以驚動禍福炫耀愚俗爲神而欲崇飾其祠宇也廟祀雖設而學校不修果何益哉原四十三

仁宗皇祐三年詔兗州仙源縣自國朝以來世以孔氏子孫知縣事使奉承廟祀近歲廢而不行非所以尊先聖也今後宜復以孔氏子弟充選

至和二年詔封孔子後爲衍聖公

集賢殿學士劉敞言據祠部員外郎直集賢院祖無擇奏伏見至聖文宣

王四十七代孫孔宗愿襲封文宣公臣竊觀前史孔子之後襲封者衆皆以祖之美諡而加後嗣生而諡之不

經甚矣欲乞明詔有司詳求古訓或封以小國或取尊儒襲聖之義別定美號加於封爵著於令式使千古之下無以加於我朝之盛典臣等謹按漢元帝初元元年以師孔霸爲關內侯食邑八百戶號襲成君唐世深察此義而以襲成爲夫子之諡因疑霸等號封襲皆襲其祖之舊耳故遂封夫子文宣王而爵其後文宣公考校本末甚失事理先帝既封泰山親祠闕里又加文宣以至聖之號則人倫之極致盛德之顯名盡在此矣尤非其子孫臣庶所宜襲處而稱之者也臣等以爲無擇議是伏乞改賜爵名若襲成襲聖之比上足以尊顯先聖有不可階之勢下不失襲孔氏使得守繼世之業改唐之失法漢之舊傳曰必也正名又曰正稽古立事可以永年此之謂也

英宗治平元年詔勿以孔氏子弟知仙源縣其襲封人如無親屬在鄉里令常任近便官不得違去家廟 京東提刑王綱乞慎重長民之官故有是詔

神宗元豐六年吏部尙書曾孝寬言孟軻有廟在鄒未加爵命詔封鄒國公

七年禮部言乞以鄒國公同顏子配食宣聖荀況揚雄韓愈並從祀於左邱明等二十二賢之間從之封荀況蘭陵伯揚雄成都伯韓愈昌黎伯頌行天下學廟塑像春秋釋奠行禮 容齋洪氏隨筆曰自唐以來相傳以孔門高弟顏淵至子夏爲十哲故坐祀於廟堂上其後升顏子配享列位曾子於堂居子夏之次以補其闕然顏子父路曾子父黜乃在廡下從祀之列子處父上神靈有知何以自安子雖齊聖不先父食正謂是也又蓋

子配食與顏子並而其師子思之師曾子亦在下此兩者於禮於義實爲未然特相承既久莫之敢議耳  
相臺岳氏愧鄉錄曰蘇文忠集私試策問曰古者坐於席故籩豆之長短蠶豆之高下適與人均今土木之  
像既已巍然於上而列器皿於地使鬼神不享則不可知若其享之則是俯伏匍匐而就也珂按今世國學郡  
縣學禮殿坐像皆正席南向顏孟而下列侍所措設與前不殊私竊疑之慶元己未朱文公始作白鹿禮殿塑  
像說曰古人坐者兩膝著地因反其膝而坐於其上正如今之胡跪者故儀禮曰坐取爵曰坐爵禮記曰坐而  
遷之曰一坐再至曰武坐輕右軒左老子曰坐進此道之類凡言坐者皆謂跪也漢文帝與賈生語不覺膝之  
前於席管甯坐不箕股楊當膝處皆穿皆其明驗然記又云授立不跪授坐不立莊子又云跪坐而進之則跪  
與坐又自有少異處疑跪有危義故兩膝著地伸腰及股而勢危者爲跪兩膝著地以尻著地而稍安者爲坐  
也則跪爲危坐亦可知蓋兩事相似但一危一安小不同耳頃年廟錢子言作白鹿禮殿欲據開元禮不爲塑  
像而臨祭設位子言不以爲然而必以塑像爲問子既略考禮如前之云又記少時聞之先人云嘗至鄆州謁  
列子祠見其塑像席地而坐則亦并以告之以爲必不得已而塑像則當放此以免於蘇子俯伏匍匐之議子  
言又不謂然會予亦辭浙東之節遂不能強然至今以爲恨也其後乃聞成都府學有漢時禮殿諸像皆席地  
而跪坐文翁猶是當時琢石所爲尤足據信不知蘇公蜀人何以不見而云爾也及楊方子直入蜀帥幕府因  
使訪焉則果如所聞者且爲寫放文翁石像爲土偶以來而塑手不精或者猶意其或爲加跌也去年又屬蜀

漕楊玉休子美今乃并得先聖先師三像木刻精巧視其坐後兩膝隱然見於帷裳之下然後審其所以坐者果爲跪而亡疑惜乎白鹿塑像之時不得此證以曉子言使東南學者未得復見古人之像以革千載之謬爲之太厚姑記本末寫寄洞學諸生使書而揭之廟門之左以俟來考焉或謂國朝景靈宮設塑之制亦坐於椅所不當輕議珂竊以爲原廟用時王之禮廂席器皿皆與今同則其爲像反不當以泥古矣珂在朝時以攝奉常丞奉祠太廟得立階見室中之用亦不以高几蓋古今器服各適其宜以便於事是亦求神之義也

哲宗元祐元年朝議大夫孔宗翰辭司農少卿請依家世例知兗州以奉孔子祀從之宗翰又言孔子後襲封疏爲本爲侍祠今乃兼領他官不在故郡請自今不使襲封之人更兼他職終身使在鄉里事下禮部太常寺禮官議欲依所請釐定典禮命官以司其用度立學以訓其子孫襲封者專主祠事增賜田百頃供祭祀之餘許均贖族人 六年帝幸太學行釋奠禮一獻再拜

徽宗崇寧元年詔追封孔鯉爲泗水侯孔伋爲沂水侯三年太常寺言今國子監顏子孟子配享之位卽與闕子癸等從祀之位同作一列雖坐次少出而在文宣王帳座之後於配食之禮未正請改正顏子而下從享位次爲國頒示天下 紹熙間項安世爲越州教授告先師文曰常平使者朱熹爲安世言開元禮先聖東向先師南向故三獻官皆西向則稽古尙右也今祀典正位南向配位西向三獻官猶西向則兼而用之也獨此府廟學有司以私意復古使配位皆東向此古者先聖之位也拂今之法戾古之義先師其不安於此也安世用

惕然不敢甯處謹擇日奉安先師於西向故位不敢不告惟先師鑑之

六月詔以王安石配享孔子廟位鄒國公之次

大觀元年大司成強淵言考禮經士始入學釋菜請自今每歲貢士始入辟雍並以元日釋菜於先聖從之

二年詔躋子思從祀

崇寧四年八月詔從國子司業蔣靜之請改用冕十二旒服九章而又圖繪頌之天下郡邑其執圭立戟前從王者制度

政和三年封王安石爲舒王配享王雱爲臨川伯從祀五年太常寺言袁州鄒學孟子廟詔以樂正子配享公孫丑以下從祀皆擬定其封爵

欽宗靖康元年右諫議大夫楊時言王安石學術之謬乞追奪王爵毀去配享之像詔依鄒康成例從祀

高宗紹興八年詔衢州於係官田內撥賜五頃賜主奉先聖祠事與封衍聖公孔玠以孔氏渡江子孫隔絕林廟故賜田以奉先聖蒸嘗也

十三年上幸學止輦大成殿內外入幄羣臣班列於庭上出幄升東階跪上香執爵三祭酒再拜如常儀

光宗紹熙四年以文宣王五十一代孫孔文遠爲承奉郎襲封堯聖公

原四十四

幸學養老

文獻通考輯要

卷十

學校考

二十一

通雅堂藏板

古者天子之視學多爲養老設也東漢時猶然自漢以後養老之禮浸廢而人主之幸學者或以講經或以釋奠蓋自爲一事矣故今以二事合爲一門云

有虞氏深衣而養老養國老於上庠養庶老於下庠而用燕禮其禮尚矣憲養氣體而不乞言有善則記之爲悼史 夏氏燕衣而養老養國老於東序養庶老於西序而用鬻禮

殷人縞衣而養老養國老於右學養庶老於左學而用食禮

周制元衣而養老養國老於東膠養庶老於虞庠虞庠在國之西郊兼用虞燕夏饗殷食之禮夏官羅氏仲春羅春鳥獻鳩以養國老月令仲秋天子養衰老授几杖行糜粥飲食五十養於鄉六十養於國七十養於學遂於諸侯八十拜君命一坐再至九十使人受凡三王養老皆引年乞言合語之禮皆小樂正詔之於東序凡六合樂必遂養老

外賓邦饗者老孤子則掌其割烹之事

酒正饗者老孤子皆共其酒無酌數凡有秩酒者以齊契授之

有秩

司門以其財養死政之老與其孤

門關出入皆有稅所稅得者

禮記食三老五更於太學

老臣王制九

遺人門關之委積以養老孤

門關之外留之以養老孤

附卽門關之委積死政之老

乃死國政事者之父母也

禮記食三老五更於太學

老五帝憲三王有乞言五帝憲養氣體而不乞言三王亦憲既養老而後乞言

樂記食三老五更於太學天子祖而割牲執醬而饋執爵而酌冕而總干所以教諸侯之弟也 祭義貴老爲其近於親也昔者有虞氏

德而尚齒夏后氏貴齒而尚齒殷人貴富而尚齒周人貴親而尚齒虞夏殷周天下之盛王也未有還年者年之貴乎天下久矣次乎事親也是故朝廷同爵則尚齒七十杖於朝君問則席八十不俟朝君問則就之而弟還乎朝廷矣天子巡守諸侯待於境天子先見百年者八十九十者欲言政者君就之可也壹命齒於鄉里再命齒於父族三命而不齒族有七十者弗敢先七十者不有大故不入朝若有大故而入君必與之揖讓而后及齒者 中庸燕毛所以序齒也 禮書曰貴胄謂之國子則貴而老者謂之國老賤者謂之庶人則賤而老

者謂之庶老國子與庶人之俊者同其學所以一道德國老與庶老異其學所以別分義故羅氏獻鳩以養之者國老也司徒以保息養之者庶老也司門以其財養之者死政者之老也若夫外饗酒正橘人所謂耆老者總三者而言之也鄭氏謂三老五更各一人昔年老更事致仕者也名三五者取象三辰五星天所以照明天下者皇氏謂人君養老有四種一是養三老五更二是子孫爲國難而死者父祖三是養致仕之老四是引戶校年庶人之老古者建國必立三卿鄉飲酒必立三賓而養老必立三老故禮曰三公在朝三老在學三公非一人則三老五更非各一人矣漢志以德行年高者一人爲老次一人爲更故永平中拜桓榮爲五更建初

中拜伏恭爲三老而鄭氏以此爲三代之制誤矣晉亦以王辟爲五更先王父事三老兄事五更則三老五更乃羣老之

尤者而致仕之老固在其間皇氏離而二之亦誤矣方其養也必先釋奠於先老設三老五更羣老之席位適饌省醴養老之珍具遂養賦焉登歌清廟下管象武天子祖而酌牲執醬而饋執爵而酌冕而總干則乞言處

行之養著而孝悌之化行矣有司告以樂闕王乃命公侯伯子男及羣吏曰反養老幼於東序而終之以仁此所謂一舉事而衆皆知其德之備也漢明帝養老之禮其曰乘輿先到辟雍禮殿御坐東階遣使者安車迎三老五更天子迎於門屏交禮道自阼階三老升自賓階至階天子揖如禮三老升東面三公設几九卿正廳天子親袒牲執醬而饋執爵而酌祝哽在前祝噎在後五更南面公進供禮亦如之明日皆詣闕謝其養特三老五更二人而已羣老不與焉非古禮之意也

文王世子釋奠於先老遂設三老五更羣老之席位焉

王制將出學小胥大胥小樂正簡不率教以告於大樂正大樂正以告於王王命三公九卿大夫元士皆入學不變王親視學不變王三日不舉

天子出征受成於學出征執有罪反釋奠於學以訊誡告

仲春之月上丁命樂正習舞釋菜天子乃帥三公九卿諸侯大夫親往視之 季春之末擇吉日大合樂天子乃帥三公九卿諸侯大夫親往視之 禮書曰天子視學四養老也簡不帥教也出征受成也以訊誡告也養老必於仲春而簡不帥教出征受成以訊誡告者無常時雖有常時其入學也亦必養老焉

書大傳宣王問於子春曰寡人欲行孝弟之義爲之有道乎子春曰昔者衛國之樂正子曰文王之治岐也五十者杖於家六十者杖於鄉七十者杖於國八十九十杖於朝君曰趣見毋俟朝乘車輪輸送至於家君有闕

明日就其室以珍從而孝弟之義達於四海學禮帝入東學上親而貴仁則親疎有序而恩相及矣帝入南學上齒而貴信則長幼有差而民不誣矣帝入西學上賢而貴德則聖智在位而功不匿矣帝入北學上貴而尊爵則貴賤有等而下不隲矣帝入太學承師問道退習而考於太傅太傅罰其不則而違其不及則德習長而治道得矣

後漢顯宗中元元年初建三雍顯宗卽位親行其禮天子始冠通天衣日月備法物之駕盛清道之儀坐明堂而朝羣后登靈臺以望雲物祖割辟雍之上尊養三老五更饗射禮畢帝正坐自講諸儒執經問難於前冠帶縉紳之人圍橋門而觀聽者蓋億萬計乃下詔曰光武皇帝建三朝之禮而未及臨饗眇眇小子屬當聖業聞暮春吉辰初行大射令月元日復踐辟雍尊事三老兄事五更安車轎輪供綬執授侯王設醬公卿饌珍朕親祖割執爵而醑祝嘏在前祝嘏在後升歌鹿鳴下管新宮八佾具修萬舞於庭朕固薄德何以克當易陳賁乘詩刺彼己永念慙疚無忘厥心三老李躬年耆學明五更桓榮授朕尚書詩曰無德不報無言不酬其賜躬榮爵關內侯食邑五千戶三老五更以二千石祿養終厥身其賜天下三老酒人一石肉四十斤有司其存耄恤幼孤惠繇寡稱朕意焉

永平八年十月臨辟雍養三老五更

三老老人知天地人事者五更老人知五行更代之事

安帝以魯丕爲三老又以李充爲三老 楊統位至光祿大夫爲國三老

元初四年詔曰月令仲秋養衰老授几杖行糜粥方今八月按比之時郡縣多不奉行雖有糜粥糠粃泥土相雜不可飲食長吏怠事莫有躬親甚違詔書養老之意其務崇仁恕賑護寡獨稱朕意焉 按古人養老之禮有養於鄉者所謂五十養於鄉王命公侯伯子男及羣吏曰反養老於東序大司徒以保息六保萬民二曰養老是也有養於國者天子視學設三老五更羣老之席位執醬親饋執爵親酌是也漢初每鄉及縣皆有二老歲首則使人存問賜以束帛酒肉或賜以爵乃古人養於鄉之意而國學養老天子親講之禮則至東漢始行之然東漢亦時有下郡縣存問養老之詔此其一也餘不悉錄

靈帝以袁逢爲三老賜玉杖

玉杖長九尺端以鳩爲飾鳩者不墮之鳥欲令老人不墮也

譙周曰漢中興定禮儀羣臣欲令三老答天子

拜城門校尉董鈞駁曰養三老所以教事父之道也若答拜是使天下答子拜也詔從鈞議譙周論之曰禮尸服上服猶以非親之故答子拜士見異國君亦答拜是皆不得視猶子也虞喜曰且據漢儀於門屏交禮交禮卽答拜中興謬從鈞議後革之深得其意

魏高貴鄉公甘露二年天子親帥羣司行養老之禮於太學命王祥爲三老鄭同爲五更祥南面几杖以師道自居天子北面乞言祥陳明王聖帝君臣政化之要以訓之聞者莫不砥礪

後魏孝文帝太和十六年詔以前司徒尉元爲三老前大鴻臚卿游明根爲五更於明堂設國老位庶老位於階下皇帝再拜三老親袒割牲執醬而饋執爵而酌於五更行肅拜之禮賜國老庶老衣服有差旣而三老

曰自古人所崇莫重於孝順然五孝六順天下之所先願陛下重之以化四方五更言曰夫至孝通靈至順感幽故詩云孝弟之至通於神明光於四海願陛下念之以濟黎庶乃賜步輦一乘詔三老給上公祿五更食九卿俸供養之味亦同其例

北齊制仲春令辰陳養老禮都下及外州人年七十以上賜鳩杖黃帽

有勳則給不爲常也

後周武帝保定三年詔以太傅燕國公于謹爲三老賜延年杖皇帝幸太學以食之三老入門皇帝迎拜門屏之間三老答拜設三老席於中楹南面太師晉國公宇文護升階設几於席三老升席南面憑几而坐大司寇楚國公豆盧甯升階正鴈皇帝升立於斧扆之前西向有司進饌皇帝跪授醬豆親袒割牲三老食訖皇帝又親跪授爵以醕撤去皇帝北面立訪道三老乃起立於席後皇帝曰猥當天下重任自惟不才不知政理之要公其誨之三老答曰木從繩則正后從諫則聖自古明王聖主皆虛心納諫以知得失天下乃安惟陛下念之又曰爲國之本存乎忠信是以古人云去食去兵信不可失國家興廢在於賞罰若有功不賞有罪不罰則天下善惡不分下人無所措手足又曰言行者立身之本言出行隨誠宜相顧陛下三思而言九慮而行不思慮必有過失願陛下慎之三老言畢皇帝再拜受之三老答拜禮成而出

唐制仲秋吉辰皇帝親養三老五更於太學所司先奏定三師三公致仕者用其德行及年高者一人爲三老次一人爲五更設三老座於西楹之東近北南面設五更座於西階上東向設國老三人座於三老座西俱不

屬爲設衆國老座於堂下西階之西東面北上

五品以上致仕者爲國老六品以下致仕者爲庶老

宋太祖建隆元年幸國子監詔加飾祠宇及塑繪先聖先賢先儒之像帝親製文宣王竟國公二贊

太宗端拱元年幸國子監謁文宣王畢升輦將出西門顧見講座左右言學官李覺方聚徒講書卽召覺令對御講說覺曰陛下六飛在御臣何敢輒陞高座帝爲降輦令有司張帘幕設別座詔覺講易之泰卦從臣皆列坐覺因述天地感通君臣相應之旨帝甚悅特賜帛百疋

高宗紹興十三年國學大成殿成明年國子司業高閎請幸學上從之詔略曰偃革息民恢儒建學聲明丕闡輪奐一新爾等摠望幸之忱述諸儒之志達繼橋門之盛願觀雲輿之臨請旣方堅理宜從欲將款謁於先聖仍備舉於舊章時命禮部侍郎秦熈執經司業高閎講易之泰遂幸養正持志二齋賜閱三品服學官選秩諸生授官免舉賜帛有差上旣奠拜注視貌像翼欽慕覽唐明皇及太祖眞宗徵考所製贊文命有司悉取從祀諸贊皆錄以進上遂作先聖及七十二子贊冠以序文親灑宸翰登之綵殿備儀衛作樂命監學之臣自行宮北門迎置學宮揭之大成殿上及二廡

孝宗淳熙四年幸太學如紹興之儀命禮部侍郎李燾執經祭酒林光朝講大學

原四十五

### 郡國鄉黨之學

學記古之教者家有塾黨有序國有學

衛當爲述

比年入學中年考校一年視離經辨志二年視敬業樂羣

五年視博習親師七年視論學取友謂之小成九年知類通達強立而不反謂之大成 禮書曰說文闕里門也爾雅曰門側之堂謂之塾尙書大傳曰上老平明坐於右塾庶老坐於左塾班固食貨志曰里胥平旦坐於右塾鄰長坐於左塾蓋古者合二十五家而爲之門塾坐上老庶老於此所以教之學也坐里胥鄰長於此所以教之耕也書云先路在左塾之前次路在右塾之前先路象路也次路木路也象路貴於木路而象路在左塾次路在右塾則左塾者西塾也里胥尊於鄰長而里胥在右塾鄰長在左塾則右塾者西塾也何則自內視外則左東而右西自外視內則左西而右東也曲禮曰主人入門而右客入門而左此左西而右東也又曰公事自闕東私事自闕西此左東而右西也然則書言左塾史言右塾皆西塾也自內外言之異耳

州長正月之吉各率其州之民而讀法以考其德行道藝而勸之以糾其過惡而戒之若以歲時祭祀州社則

屬其民而讀法亦如之春秋以禮會民而射於州序

序州黨之學

黨正四時之孟月吉日則屬民而讀邦法以糾戒之春秋祭禘亦如之國索鬼神而祭祀則以禮屬民而飲酒於序以正齒位

尙書大傳大夫七十而致仕者其鄉里大夫爲父師士爲少師纓組已藏祈樂已入歲事已畢餘子皆入學年

十五始入小學見小節踐小義焉年十八始入大學見大節踐大義焉

餘子猶衆子古者適子恆代父而仕

距冬至四十五日始

出學停農事立春上老平明坐於右塾庶老坐於左塾上老父師庶老少師餘子畢出然後皆歸夕亦如之餘子皆入父

之齒隨行兄之齒鴈行朋友不相踰輕任并重任分頌白者不提攜出入皆如之

王制諸侯天子命之教然後爲學小學在公宮南之左太學在郊天子曰辟廡諸侯曰泮宮 長樂陳氏曰夫諸侯之學小學在內大學在外故王制言小學在公宮南之左大學在郊以其選士由內以升於外然後達於京故也天子之學小學居外大學居內故文王世子言凡語於郊然後於成均取爵於上尊以其選士由外以升於內然後達於朝故也

魯頌泮水頌僖公能修泮宮也 江陵項氏枝江縣新學記曰古之爲泮宮者其條理不見於經而有詩在焉予嘗反覆而推之其首三章則言其君相之相與樂此而已自四章以下始盡得其學法自敬其德而至於明其德明其德而至於廣其心廣其心而至於固其道終焉此則學之本也自威儀孝弟之自修而達於師旅獄訟之講習而極於車馬器械之精能此則學之事也自烈祖之鑑其誠而至於多士之化其德而至於遠夷之服其道此則學之功也

明三位米廩有虞氏之庠也序夏后氏之序也魯宗股學也類宮周學也

言魯得立四代之學

班固漢書食貨志曰五

家爲鄰五鄰爲里四里爲族五族爲黨五黨爲州五州爲鄉鄉萬二千五百戶也鄰長位下土自此以上稍登

一級至鄉而爲鄉長令民學出在塾冬則畢入於邑所以順陰陽備寇賊習禮文也春將出民里胥平旦坐於

右塾鄰長坐於左塾

里胥如今里吏門側之堂曰塾

畢出然後歸夕亦如之入者必持薪樵輕重相分班白不提挈冬民既入

婦人同巷相從夜績女工一月得四十五日

一月之中又得夜半爲十五日凡四十五日也

必相從者所以省費燧火同巧拙而合習

俗也男女有不得其所者因相與歌詠各言其傷是月餘子亦在於序室

餘子庶子也未任役者

八歲入小學學六甲五

方書計之事

蘇林曰五方異書如今國書學外國書也臣瓚曰辨五方之名及書藝也

始知室家長幼之節十五入大學學先聖禮樂而知朝廷君

臣之禮其有秀異者移鄉學於庠序庠序之異者移國學於少學諸侯歲貢少學之異者於天子學於大學命曰造士行同能偶則別之以射然後爵命焉孟春之月羣居者將散行人振木鐸以徇於路以采詩獻之太師比其音律以聞於天子故曰王者不窺牖戶而知天下此先王制土處民富而教之之大略也

漢文翁爲蜀郡守見蜀地僻陋欲誘進之乃選郡縣小吏開敏有材者張叔等十餘人親自飭厲遣詣京師受

業博士或學律令減省少府用度買刀布蜀物齎計吏以遺博士

少府郡掌財物之府以此供太守者

數歲郡生皆成就還歸文

翁以爲右職用次察舉官有至郡守刺史者又修起學官於成都市中

學官學之官舍也

招下縣子弟以爲學官弟子

爲除更繇高者以補郡縣吏次爲孝弟力田常選學官童子使在便坐受事每出行縣益從學官諸生明經飭

行者與俱使傳教令出入閭閻縣邑吏民見而榮之數年爭欲爲學官弟子富人至出錢以求之繇是大化蜀

地學於京師者比齊魯焉至武帝時乃令天下郡國皆立學校官自文翁始

師古曰文翁學堂在今益州城內

按武帝時始

爲博士學官置弟子員前此所謂博士者雖有弟子要皆京師自授其徒自願受業朝廷未嘗有舉用之

法郡國亦無薦送之例而蜀地僻陋非齊魯諸儒風聲教化之所被故文翁遺其民就學必以物遺博士而使

教之及武帝既興學校則令郡國縣官謹察可者與計偕詣太常受業如弟子則郡縣皆有以應詔而博士弟子始爲國家選舉之公法也

元帝時郡國置五經百石卒史

平帝元始三年立學官郡國曰學邑侯國曰校校學置經師一人鄉曰庠庠曰序序庠置孝經師一人何武爲刺史行部必先卽學官見諸生試其誦論問以得失

世祖建武六年李忠爲丹陽太守忠以丹陽俗不好學爲起學校習禮容春秋鄉飲選用明經郡中向慕之

明帝永平十年幸南陽召校官弟子作雅樂奏鹿鳴帝自御塢篋和之以娛嘉賓班固東都賦曰四海之內

學校如林庠序盈門獻酬交錯俎豆莘莘下舞上歌蹈德詠仁魯丕爲趙相趙王商嘗欲避疾便時稍住學

官

學官學舍也

丕止不聽曰學官傳五帝之道修先王禮樂教化之處王欲廢塞以廣游譟事不可聽詔從丕言

晉庾璲太康時爲鄱陽內史大修庠序廣招學徒移告屬縣具爲條制於是至者七百餘人璲乃作誥以獎諭

之曰文學諸生皆冠帶之流年盛志美始涉學庭講修典訓此大成之業立德之基也夫聖人之道淡而寡味

故始學者不好也及至暮月所觀彌博所習彌多日聞所不聞見所不見然後心明意朗敬業樂學忽然不覺

大化之陶已至道之入神也故學之染人甚於丹青丹青吾見其久而渝矣未見久學而渝也夫學者不愚才

不及而愚志不立故曰希驥之馬亦驥之乘希顏之徒亦顏之倫又曰剡而舍之朽木不知剡而不會金石可

虧斯非其效乎

穆帝承和中征西將軍庾亮在武昌開置學官起立講舍亮家子弟及參佐大將子弟悉令入學四府博學識義通涉文學經綸者以儒林祭酒使班同三署厚其供給皆妙選邦彥必有其宜者以充此舉近臨川臨賀二郡並束脩復學校若非束脩之流禮教所不及而欲階緣免役者不得爲生明爲條制合法清而人貴

梁武帝選學生遺就會稽雲門山受業於廬江何允分遣博士祭酒到州郡立學

後魏獻文帝天安初立鄉學大郡博士二助教四學生百次郡中郡博士一助教二學生六十下郡博士一助教一學生四十郡縣學始此

北齊制諸郡並立學置博士助教授經學生俱被差逼充員士流及豪富之家皆不從調備員既非所好墳籍固不關懷又多被州郡官人驅使縱有游惰亦不檢察皆由上非所好所致諸郡俱得察孝廉其博士助教及游學之徒通經者推擇充舉射策十條通八以上聽九品出身其尤異者亦蒙抽擢

隋仁壽元年詔廢州縣學

唐制京都學生八十大都督中都督府上州各六十下都督府中州各五十下州四十京縣五十上縣四十中縣中下縣各三十五下縣二十州縣學生州縣長官補長史主簿每歲仲冬州縣館監舉其成者送之尚書省武德七年詔諸州縣及鄉並令置學有明一經以上者有司試冊加階

元宗開元二十一年勅諸州縣學生精神聰悟有文詞史學者每年銓量舉送所司簡試聽入四門學充俊士  
卽諸州人省試不第情願入學者聽國子監所管學生尙書省補州縣學生州縣長官補州縣學生取  
郭下人充諸州縣  
學生習正業之外仍兼習吉凶禮公私有禮事處令示儀式餘皆不得輒使諸百姓任立私學其欲寄州縣受  
業者亦聽

二十六年正月十九日赦古者鄉有序黨有塾將以弘長儒教誘進學徒化人成俗率由於是其天下州縣每  
鄉之內里各置一學仍擇師資令其教授

正元三年正月右補闕宇文炫上言請京畿諸縣鄉村廢寺並爲縣學并上制書事二十餘件疏奏不報  
宋太宗皇帝太平興國二年知江州周述言廬山白鹿洞學徒常數千百人乞賜九經肆習詔國子監給本仍  
傳送之 先時南唐升元中白鹿洞建學館以本道爲洞主掌其教授

又賜石鼓書院勅額 唐元和間衡州李寬所建國初賜額

真宗大中祥符二年應天府民曹誠卽楚邱戚同文舊居造會百五十間聚書數千卷博延生徒講習甚盛府  
奏其事詔賜額曰應天府書院命奉禮郎戚舜賓主之仍令本府幕職官提舉以誠爲府助教

八年賜潭州嶽麓書院額始開寶中郡守朱洞首度基創宇以待四方學者李允則來爲州請於朝乞以書藏  
方是時山長周式以行義著八年詔見便殿拜國子學主簿使歸教授增賜中祕書 右宋興之初天下四書

院建置之本末如此此外則又有西京嵩陽書院賜額於至道二年江甯府茅山書院賜田於天聖二年嵩陽茅山後來無聞獨四書院之名著是時未有州縣之學先有鄉黨之學蓋州縣之學有司奉詔有所建也故或作或輟不免具文鄉黨之學賢士大夫留意斯文者所建也故前規後隨皆務興起後來所至書院尤多而其田土之錫教養之規往往過於州縣學蓋皆欲倣四書院云

仁宗卽位之初賜兗州學田已而又命藩輔皆得立學其後諸旁郡多願立學者詔悉可之稍增賜之田如兗州由是學校之設遍天下

皇祐四年詔自今須盡  
款乃得立學也州勿聽

慶曆四年參知政事范仲淹等建議精貢舉請興學校本行實乃詔州縣立學本道使者選屬部爲教授不足則取於鄉里宿學之有道業者士須在學三百日乃聽預秋賦舊嘗充者百日而止 安定先生胡瑗自慶曆中教學於蘇湖間二十餘年束脩弟子前後以數千計是時方尙辭賦獨湖學以經義及時務學中故有經義齋治事齋經義齋者擇疏通有器局者居之治事齋者人各治一事又兼一事如邊防水利之類故天下謂湖學多秀彥其出而筮仕往往取高第及爲政多適於世用若老於吏事者由講習有素也慶曆四年詔州縣皆立學於是建太學於京師而有司請下湖州取先生之法以爲太學今著爲令

五年詔曰頃者嘗詔方夏增置學官而吏貪崇儒之虛名務增室屋使四方游士競起而趨之輕去鄉閭浸不可止今後有學州縣毋得寬容非本土人居止聽習若吏以繕修爲名而斂會民財者按舉之

神宗熙寧四年詔置京東西河東北陝西五路學以陸佃等爲諸州學官仍令中書採訪逐路有經術行誼者各三五人雖未仕亦給簿尉俸使權教授他路州軍命近日選薦京朝官有學行可爲人師者堂除逐路官令兼所任州教授州給田十頃爲學糧仍置小學教授

八年秋詔諸州學官先赴學士院試大義五道取優通者選差

元豐元年詔諸路州府學官共五十三員按是時大興學校而天下之有教授者只五十三員蓋重師儒之官不肯輕授濫設故也所用既是有出身人又必試中而後授則與入館閣翰苑者同科其遴選至矣

哲宗元祐元年詔近臣擇經明行修堪內外學官者人舉二員遂罷試補法

二年中丞胡宗愈言學者初登科遂隲師席非是詔內外學官經任年至三十方得在選

三年又詔宮學教授闕選諸嘗被舉可爲學官及中十科中可爲師表或可備講讀者仍官已升朝年及四十乃得爲之

紹聖元年三省立格須嘗中進士或制科年及三十者若制科及進士第在上五人禮部奏名在上三人府監廣文館第一人或從太學上舍得第卽皆不試而用餘並召附吏部春秋試凡試兩經大義各一道以通經習作文爲合格已經舉試中書籍其姓名俟有闕則選授焉於是內外見學官非制科進士出身及由上舍生入

官者並罷

元符二年初令諸州推行三舍法應置教授州考選升補悉如太學州許上舍一人內舍二人歲貢入之京師其上舍卽附太學補外舍試中補內舍生過三試不升舍者遣還其州其內舍免試至則補爲外舍生諸路選監司一員提舉學校守貳董幹其事過試補上舍生選有出身官一人同教授考選仍彌封謄錄

徽宗崇寧元年宰相蔡京建議天下皆置學郡少或應書人少卽合二三州共置一學學悉置教授二員縣亦置學州縣皆置小學推三舍法徧行天下自縣選考升諸州爲州學生每三年貢入太學爲太學生至則附上舍試別立號考取分三等試入上等補上舍生入中等補下等上舍生入下等補內舍餘爲外舍諸州軍解額各以三分之一充貢士開封府量留五十五額解士人之不入學者餘盡均給諸州以爲貢額

三年令州縣學用三舍法陞太學罷科舉

見舉士門

八行者孝弟睦姻任恤忠和凡有八行實狀鄉上之縣縣延

入學審考無僞卽以上州州第其等孝弟忠和爲上睦姻爲中任恤爲下苟備八行不俟終歲卽奏貢入太學免試補爲上舍司成以下審考不誣卽釋褐命之官仍優加升擢不能全備者爲州學上等上舍餘有差入刑則反八行而麗於罪名

詔諸州學生員及五百人以上許置教授二員不及八十人罷置教授官以在州有科名官兼蒞學事 吳氏能改齋謄錄曰政和四年臣僚上言欲望應見任教授不得爲人撰書取簡牘樂語之類庶幾日力有餘辦舉職事以副陛下責任師儒之意奉聖旨依嘗聞陳瑩中初任潁昌教授官時韓持國爲守開宴用樂語左右以

舊例必教授爲之公因命陳陳曰朝廷師儒之官不當撰俳優之文持國遂薦諸朝不以爲忤  
四年總耀卿言今州縣學考試未校文字精弱先問時忌有無苟語涉時忌雖甚工不敢取時忌如曰休兵以  
息民節用以豐財罷不急之役清入仕之流諸語宜禁止詔可

三年臣僚言比者試文有以聖經之言輒爲時忌而避之者如曰大哉堯之爲君以爲哉與災同制治於未亂  
安不忘危吉凶悔吝生乎動則以爲危亂凶悔皆當避不諱之朝豈宜有此詔禁之 按熙甯之立學校養生  
徒上自天庠下至郡縣其大意不過欲使之習誦新經附和新法耳紹聖崇觀而後羣儉用事醜正益甚遂立  
元祐學術之禁又令郡縣置自訟齋以拘誹謗時政之士士子志於進取故過有拘忌蓋言休兵節用則恐類  
元祐之學言災凶危亂則恐涉誹謗之語所謂轉喉觸諱者也則惟有迎逢諂佞而已

七年給事中毛友言比守郡見訴役者言富家子弟初不知書第捐數百緡錢求人試補入學遂免身役比其  
歲升不中更數年而始除籍則其倖免已多矣請初試補入縣學人並簾試以別僞冒從之

高宗建炎初復教官試紹興中議者謂欲爲人師而自納所業於有司以幸中度乃詔罷其試而教授自朝廷  
選差已而復之

紹興三年詔建炎二年內復置教授處共四十三州至建炎二年並罷任滿更不差人今將二年復置教授案  
闕並行存留

又詔淮西路州縣教授並行減罷令遂州有出身官兼十八年江西轉運賈直清奏請立縣學於縣官內選有出身人兼領教導尋下國子監參酌措置欲比附舊法縣學委知通於令佐內選有出身官一員兼領教導職事及諸州軍如未差教授處卽令本路提舉司於本州有出身官選差一員兼領若州縣官俱無出身只令本學長諭專主教導却令知州縣令覺察點檢從之

原四十六



文獻通考輯要卷十一上

山陰湯壽潛鑿先編輯

馬序曰古者因事設官量能授職無清濁之殊無內外之別無文武之異何也唐虞之時禹宅揆契掌教學陶明刑伯夷典禮羲和掌曆變典樂益作虞垂共工蓋精而論道經邦粗而飭財辨器其位皆公卿也其人皆聖賢也後之居位臨民者則自詭以清高而下視曲藝多能之流其執技事上者則自安於鄙俗而難語以輔世長民之事於是審音治曆醫祝之流特設其官以處之謂之雜流擯不得與摯紳伍而官之清濁始分矣昔在成周設官分職綴衣趣馬俱籲俊之流宮伯內宰盡興賢之侶逮夫漢代此意猶存故以儒者為侍中以賢士備郎署如周昌袁盎汲黯孔安國之徒得以出入宮禁陪侍晏私陳諠格非拾遺補過其才能卓異者至為公卿將相為國家任大事霍光張安世是也中漢以來此意不存於是非閹官嬖倖不得以日侍宮闈而賢能摯紳特以之備員表著漢有宮中府中之分唐有南司北司之黨職掌不相為謀品流亦復殊異而官之內外始分矣古者文以經邦武以撥亂其在大臣則出可以將入可以相其在小臣則管筆以待問荷戈可以前驅後世人才日衰不供器使司文墨者不能知戰陣被介冑者不復識簡編於是官人者制為左右兩選而官之文武始分矣有侍中給事中而未嘗司宮禁之事是名內而實外也唐以來侍中為三公官以處勳臣又以給事中為封駁之官皆以外庭之臣為之並不預宮中之事有太尉司馬而未嘗司兵戎之事是名武而實文也太尉漢承秦以為三公然猶掌武事也唐以後亦為三公宋時呂夷簡王旦韓琦皆宰相太尉非武臣也大司馬周官掌兵至漢元成以後為三公亞於司徒乃後來執政之任事非武臣也太常有卿佐而未嘗審音樂將作有監貳而未嘗讀營繕不過為

儒臣養望之官是名濶而實清也尚書令在漢爲司牘小吏而後世則爲大臣所不敢當之官官校尉在漢爲兵師要職而後世則爲武弁所不齒之冗秩尚書令其秩至卑銅章青綬主宮禁文書而已至唐則爲三省長官高祖入長安時太宗以秦王爲之後郭子儀以勳位當拜以太宗曾爲之辭不敢受自後至宋無敢拜此官者漢八校尉領禁衛諸軍皆尊顯之官宰相之罷政者至爲城門校尉又司隸校尉督察二輔彈劾公卿其權至雄尊護羌校尉護烏桓校尉皆顯重兵鎮方面乃大帥之職至宋時校尉副尉爲武職初蓋官之名同而古今之崇卑懸絕如此參稽互考曲暢旁通而因革之故可以類推隨不入品從此爲冗職

作職官考第十一

職官考一

官制總

伏犧氏龍師名官共工氏水師水名神農氏火師火名黃帝雲師雲名少皞擊鳥師鳥名鳳鳥氏歷正元鳥氏司分伯趙氏司至青鳥氏司啟丹鳥氏司閉祝鳩氏司徒鵬鳩氏司馬鵬鳩氏司空爽鳩氏司寇鵠鳩氏司事五鳩鳩民五雉夷民九扈爲九農正顓頊有五行之官是謂五官春官勾芒夏官祝融秋官蓐收冬官元冥中官后土唐堯命羲仲宅嵎夷命羲叔宅南郊命和仲宅西命和叔宅朔方按陶唐氏以前之官所治者天事也虞夏以後之官所治者民事也自伏犧以至帝堯其所命之官大率爲治歷明時而已天道幽遠非神聖不知而定四時成歲功乃君相職業月令其帝太皞其神勾芒鄭注以爲此蒼精之君木官之臣此數聖人者生則知四時之事歿則爲四時之神然太皞炎帝少皞顓頊所歷者四時而勾芒祝融蓐收元冥后土則顓頊之

時始有此五人者並世而生能任此五官之事至帝堯時則占中星之法置閏餘之法漸已著明然其命官猶以羲和爲第一義四子之後世守其法居其官至舜攝政雖以在璿璣玉衡齊七政爲首事然分命九官則皆以治民而未嘗及天事蓋內聖相承其法至堯而備世官自足以掌之不必別求賢哲之輔以專其任也三代官制至周尤詳觀成王命官若三公三孤則僅有變理陰陽寅亮天地二語爲天事而冢宰以下俱民事也所謂六官略不及天地四時之事至於馮相保章挈壺不過三百六十屬吏之一蓋至是而治天事之官事采易而秩采卑矣

虞爲六官以主天地四時夏制六卿其官名次猶承虞制殷制天子六太典司六典五官典司五衆六府典司六職六工典制六材五官致貢曰享五官之長曰伯千里之內爲王畿千里之外設方伯五國爲屬屬有長十國爲連連有帥三十國爲卒卒有正二百一十國爲州州有伯八州八伯五十六正百六十八帥三百三十六長八伯各以其屬屬於天子之老二人分天下以爲左右曰二伯老謂上公周成王參考殷官制爲周禮以作天地四時之名謂之大卿改太宰爲天官冢宰太宗爲春官宗伯司徒爲地官司馬爲夏官司寇爲秋官司空爲冬官各有徒屬周於百事自周衰官失而百職

亂秦兼天下建皇帝之號官不師古罷侯置守太尉主五兵丞相總百揆又置御史大夫以貳於相漢初循而

不革後頗有所改孟康注漢書曰大司馬左右前後將軍侍中常侍王莽篡立幕從古官而吏民弗安光武中

興廢丞相與御史大夫而以三司綜理衆務泊於叔世事歸臺閣論道之官備員而已魏吳蜀多依漢制晉

氏略同泰元六年改制減費損吏士職員凡七百人宋齊無改官司有三臺五省之號郡縣有三歲爲滿之期  
梁武定諸卿之位分配四時置戎秩之官百有餘號武帝時置百二十五號將軍爲二十四班陳遵梁制不失舊物後魏昭成初置

官司分掌衆職皇始元年道武平并州始建臺省置百官封公侯將軍刺史太守尚書郎等官悉用文人天興

中太史言天文錯亂當改王易政故官號數革初道武制官皆攝遠古雲鳥之義諸曹走使謂之鳥鶴取飛至之迅疾也以伺察候宮禁謂之白鷺取延頸遠視他皆類此

孝文太和中王肅來奔爲制官品百司位號皆准南朝又作考格以之黜陟宣武行之任事上中者三年升一

階散官上第者四載登一級孝明以後授受多濫北齊創業亦遵後魏後主臨御爵祿犬馬後周初據關中掘

依魏制及平江陵酌周禮之文建六官之職他官亦兼用秦漢他官謂將軍都督刺史太守之類隋廢周官還依漢魏庶僚損

益四考而代煬帝大業始行新令有三臺五省五監十二衛十六府唐職員多因隋制貞觀六年大省內官凡

文武定員六百四十有二而已龍朔二年又改京師及百官之名改尚書省爲中臺門下省爲東臺中書省爲西臺其餘官司悉改之咸亨復舊

武后再易天授二年舉人無賢不肖咸加擢拜大置試官試官蓋始於此神龍二年又置員外二千餘人遂有

員外檢校試攝判知之官逮乎景龍斜封興焉先天以來始懲其弊開元刊定職次著爲格令尙書省以統會

衆務門下省以待從獻替中書省以獻納制冊祕書省以監錄圖書殿中省以供脩膳服內侍省以承旨奉引

御史臺以肅清僚庶九寺太常光祿衛尉宗正太僕大理鴻臚司農大府五監少府將作園子軍器都水以分理羣司六軍左右羽林左右龍武左右神武十六衛

左右衛左右驍衛左右武左右威左右左軍左右金吾左右監門左右千牛以嚴其禁禦一詹事府二春坊三寺家令寺率更寺太僕寺十率左右衛左右司左右衛左右清道左

右監門左  
右內侍

俾又備宮牧守督護分臨畿服設官以經之量使以緯之自六品以下率由選曹五歲爲限百司具

舉唐自太宗時已有員外置其後又有特置同正員至於檢校兼守判知之類皆非本制又有量使之名或

因事而置事已則罷或遂置而不廢肅代以後朝廷專以官爵賞功諸將出征皆給空名告身自開府特進列

卿大將軍下至中郎將聽臨事注名其後又聽以信牒授人官爵有至異姓王者諸軍但以職任相統攝不復

計官資高下及清渠之敗復以官爵授散卒由是官輕賈重大將軍告身一連纒易一醉名器之濫至是而極

張巡在雍邱纒領一縣千兵而大將六人官皆開府特進德宗避難於奉天渾瑊之童奴曰黃峇力戰卽封渤海郡王至於信昭之世遂有促船郭使君看馬李侯射之號德宗幸涼州在道民有獻瓜果者上欲試以散官

德黃言突結鋒排患難者則以是賞之若獻瓜果者受試官則彼將曰國家以吾之軀命同之瓜果矣

宋朝設官名號品秩幾用唐舊然三師三公不常置宰相不專用三省長官中書門下並列於外又別置中書

於禁中是謂政事堂與樞密院對掌六政天下財賦內庭諸中外筦庫悉隸三司中書省但掌冊文覆奏考帳

門下省主乘輿八寶朝會位版流外較考諸司附奏挾名而已臺省寺監官無定員無專職三省六曹二十四

司互以他官典領雖有正官非別勅不治本司事事之所寄十七二三故中書令侍中尙書令不與朝政侍郎

給事不領省職左右諫議無言責而起居郎起居舍人不執記事之筆中書常關舍人門下罕除常侍補闕拾

遺改爲司諫正言而非特旨供職亦不任諫諍至於僕射尙書丞郎郎中員外居其官不知其職者十常七八

祕書殿中二省名存實廢惟內侍所掌猶髣髴故事九寺五監尤爲空官大統軍十六衛每遇大禮朝會但遣

官攝事以備儀範天聖中始以環衛官補宗室子東宮官不常置公主無邑司節度使不食本鎮租賦藩府除授雖帶都督之名而實不行都督之事京府方鎮皆有牧尹類非親王不除諸路無觀察採訪而觀察防禦團練刺史特以爲右列敘遷之寵雖有正在遙領大率不親本州之務諸司使副有東班西班又有橫班橫班之有職事者獨閤門客省四方館略有典掌其他悉無所領至於官人授受之別則有官有職有差遣官以寓祿秩敘位著職以待文學之選而差遣以治內外之事其次又有階有勳有爵故士人以登臺閣陞禁從爲顯官而不以官之遲速爲榮滯以差遣要劇爲貴途而不以階勳爵邑有無爲輕重時人語曰甯登瀛不爲卿甯抱槩不爲監虛名之不足砥礪天下也如此真仁以來多以正名爲請神宗元豐肇新官制省臺寺監領空名者一切罷去易之以階元祐以後漸更元豐之制二府不分班奏事樞密加置簽書徽省則既罷復建戶部則不領右曹專典常平而總於其長起居郎舍人則通記起居而不分言動館職則增置校勘黃本蔡京當國首更開封守臣爲尹牧府分六曹縣分六案內侍省職悉倣機庭修六尚局建三衛郎又更兩省之長爲左輔右弼易端揆之稱爲太宰少宰員冗名雜官有視秩甚者走馬承受陞擁使華黃冠道流亦預朝品及宣和末王黼用事方且追咎元祐紛更乃請設局以修官制格目爲名書未成而邊事起矣

### 官數

唐六十員虞六十員

尚書云建官惟百鄧元云虞官六十唐官未聞  
堯舜同道或管六十并屬官而言則皆有百

夏百二十員

尚書云夏商官倍則  
二百鄧元曰百二十殷二百

四十員

明堂位二百卅元曰二百四十

周六萬三千六百七十五員

內二千六百四十三人外諸侯國官六萬一千三十二人按禮記王制計之商制同

右杜氏通典

所載唐虞夏商之官員數往往以傳聞異辭故於注兩存之至周之官數則以爲出於禮記王制今考之其所謂外諸侯官六萬一千三十二人者以王制云殷時天下諸侯國千七百七十三內大國二百四十九次國五百一國小國一千二十三次國則皆三卿五下大夫一十七上士唯小國二卿其大夫與士如大國次國之數大凡列國卿大夫士有六萬一千三十二人其數是矣獨所謂內官二千六百四十三人者未知何據謹按周家之官數莫詳於周禮今以周禮太宰以下及其屬稽其員數之可考者除冬官一篇已亡無所稽據外而五官所掌其有命官而難考員數者如山虞每大山中士二人中山下士六人小山二人川衡每大川下士二人之類是也又有元無命官者如酒人樂人之爲奄女御女祝之爲女方相氏之爲狂夫蠻隸罪隸之爲徒隸是也若此之外則其數未嘗不昭然可考大概爲公者三人爲卿者二十四人中大夫共六十八人下大夫共二百九十三人上士共一千一百三十三人中士共四千五百三十六人下士共一萬九千二百零九人自公至下士總計二萬五千二百六十六人周禮所載與前數殊不脗合今姑具載俟精詳者共評之

漢自丞相至佐使凡十三萬二千八百八十五員

哀帝時數兼諸府州郡胥吏

後漢七千五百六十七員晉六千八百三十六員

宋六千一百七十二員齊二千一百三員後魏七千七百六十四員北齊二千三百二十二員

並內

後周二千

九百八十九員

並內

隋一萬二千五百七十六員

內官二千五百八十一外郡縣官九千九百九十五

唐一萬八千八百五員

內官二千六百二十

外部縣官一萬六千一百八十五

宋元豐間南豐曾鞏議經費言景德官一萬餘員皇祐二萬餘員治平并嘉祿州縣官三

千三百餘員總二萬四千員

原四十七

### 三公總

記曰虞夏商有師保有疑丞設四輔及三公不必備惟其人故天子無爵三公無官天文三百以三公法焉

台

星名台伊尹曰三公調陰陽九卿通寒暑大夫知人事列士去其私周成王作周官曰立太師太傅太保惟三

一作能

公少師少傅少保曰三孤三太周之三公也故不以一職爲官名又以三少爲孤卿與六卿爲九焉周禮建外

朝之法左九棘孤卿大夫位焉羣士在其後右九棘公侯伯子男位焉羣吏在其後面三槐三公位焉州長衆

庶在其後或說司馬主天司徒主人司空主土是爲三公漢初惟有太傅太尉後加置太師太保大司徒大司

空王莽居攝置四輔官後漢惟有太傅一人謂之上公有太尉司徒司空無師保災變册免自太尉徐防始漢

制三公入見皆交戟叉頸而前朝臣見三公皆拜靈帝遣使者就長安拜張溫爲太尉三公在外自溫始至獻

帝建安十三年乃罷三公官魏初復置與後漢同初封司空崔林爲安陽亭侯三公封列侯自林始黃初末年

增置太保晉凡八公同時並置惟無丞相焉時以太傅太保爲上公無其人則闕其太尉司徒司空自漢歷魏

晉皆爲三公宋有八公齊惟太傅梁有丞相等官陳以丞相太宰太傅大司馬大將軍並爲贈官三公之

制明黃閣廳事置鴟尾後魏以太師太傅太保謂之三師大司馬大將軍謂之二大太尉司徒司空謂之三公

北齊並置府其府三門當中開黃閣設內屏後周置六卿又改三師謂之三公兼置三孤以貳之隋置三師不  
主事不置府僅置大尉司徒司空以爲三公參議國之大事煬帝卽位廢三師唐復置三師三公並無其人則

闕

宋承唐制三師三公爲宰相親王使相加官其特拜者不預政事赴尙於尙書省太尉舊在三師下由唐至宋  
以太尉居太傅之上若宰臣官至僕射致仕者在位久近或已任司空司徒則拜太尉太傅等官若太師則  
爲異數自趙普以開國元勳文彥博以累朝耆德方特拜焉 按三公三師官之濫授莫甚於宣和以來蓋耶  
王肅王輩爲之是以子爲師傅也童貫爲之是以厮役爲師傅也朝野雜記載嘉定初皇子堯討論贈典吏部  
引元豐故事欲贈太師尙書令而倪正父引王禹玉等議以爲皇子以師傅名官於義未安然不知宣和時皇  
子已有生爲師傅者矣 舊檢校官十有九元豐官制惟存三師後更定官稱三孤亦置檢校以待節度使之  
久次者加至檢校少師者文臣則選開府儀同三司武臣則選太尉此除授之序也中興以後惟劉光世嘗除  
檢校至三公後或纔爲檢校三孤不必序進徑拜使相若太尉亦有自節度使超進則又不必爲檢校官者皆  
殊恩也

漢以丞相爲公置司直長史後改丞相爲司徒則曰司徒司直長史太尉後改爲大司馬置長史一人掾屬二  
十四人御屬一人令史二十四人改御史大夫爲大司空置長史加中丞後漢初唯置太傅長史一人掾屬十

人御屬一人

不知何曹

太尉屬官長史一人署諸曹事掾吏屬二十四人

分主二千石長史遷除遷民戶祠祀農桑奏議詞訟郵驛轉運盜賊罪法兵貨幣鹽

織倉穀等事

黃閣主簿記室令史御屬司徒屬官長史一人掾屬三十一人令史及御屬三十六人司空屬官長史

一人掾屬二十九人令史及御屬三十二人魏置管唯楊駿爲太傅增祭酒爲四人掾屬二十人兵曹爲左右

太尉司徒司空並有長史司馬泰初三年又置太尉軍參軍六人騎司馬五人官騎十人而司徒加置左長史

長主簿左右東西曹掾各一人若有所循行者增置掾屬十人司空府加置導橋掾一人餘略同後漢咸初

詔以前太尉府爲大司馬府增置祭酒二人帳下司馬官騎大車鼓吹左右光祿光祿三大夫加兵者增置司

馬一人從事中郎二人主簿記室督各一人舍人四人兵鎧士曹營軍刺姦帳下都督外都督令史各一人司

馬給吏卒如長史從事中郎給侍二人主簿記室都督各給侍一人持節都督增參軍爲六人宋諸府皆有長

史一人將軍一人又各置司馬一人太傅不置長史掾屬亦與後漢略同江左以來諸公置長史倉曹屬東西

閣祭酒各一人主簿舍人二人御屬二人令史無定員領兵者置司馬一人從事中郎二人參軍無定員加崇

者置左右長史司馬從事中郎四人齊太宰大司馬並贈官無僚屬大尉司徒司空是爲三公特進位從公諸

開府儀同三司位從公開府儀同如公凡公督府置位長史司馬一人諮議參軍二人諸曹有錄事功曹記室

戶曹倉曹中兵外兵騎兵長流賊曹城局法曹田曹水曹鎧曹集曹右戶十八曹局曹以上署正參軍法曹

以下署行參軍各一人其行參軍無署者爲兼員其公府佐吏則從事中郎二人倉曹掾戶曹屬東西閣祭酒

各一人主簿舍人御屬二人加崇者則左右長史四中郎掾屬並增數其未及開府則置亦有佐吏其數有減

小府無長

流置禁防參軍宋齊舊置官屬有長史司馬諮議參軍掾屬從事中郎記室主簿列曹參軍參行軍

舍人等官

其司徒則有左右二長史又增置左西掾一人自餘僚佐同於二府有公則置無則省而司徒無公

唯省舍人餘官常置開府儀同三司位次三公左右光祿大夫優者則加之曰三公置官屬陳三師二大並爲

贈官而無僚屬其三公有府長史司馬諮議參軍從事中郎掾曹屬主簿祭酒錄事記室正參軍板參軍後魏

三師無官屬後又置太宰以元天穆爲之增置佐吏三公及二大並有長史司馬諮議參軍從事中郎掾屬主

簿錄事參軍功曹記室戶曹中兵等參軍諸曹行參軍祭酒參軍事長兼行參軍都護北齊三師二大三各

置長史司馬諮議參軍從事中郎掾屬主簿錄事功曹記室戶曹倉曹中兵騎兵長流城局刑獄等參軍事東

西閤祭酒及參軍事法墨田水鑿集士等曹行參軍督護等員

司徒則加左右長史

長史

主簿

司馬

也從事中郎掾屬

主簿

主簿

所主與舍人同

令史

主簿

此皆自漢官也

御屬參軍自後漢

孫堅參驍騎軍事是也參軍所主與

同 其儀同三司如開府者亦置長史以下官屬而減記室倉城屬田水鑿士等七曹各一人

原四十八

### 宰相

黃帝大相

蚩尤太常蒼龍祝融風后后土

虞舜臣堯

爲堯時臣

舉八愷八元謂之十六相成湯屠亳初置二相武丁得傳說作相召

公爲保周公爲師相亦其任也秦悼武王始置丞相官以穉里疾甘茂爲左右丞相莊襄王又以呂不韋爲丞

相及始皇立尊爲相國秦初有左右二世復有中丞相

二世時右丞相去疾左丞相斯斯破誅乃以趙高爲中丞相

漢高帝卽位一丞相以

蕭何爲之及誅韓信乃拜何爲相國何薨以曹參爲之孝惠高后置左右丞相文帝二年復置二丞相成帝綏

和元年御史大夫何武言古者民謹事約國之輔佐必得賢聖然猶則天三光備三公官今俗弊政煩而丞相

獨兼三公之事所以大化未洽宜建三公官於是上拜曲陽侯王根爲大司馬而何武自御史大夫改爲大司

空比丞相則三公俱爲宰相孝哀從朱博議復罷大司空元壽二年更名丞相爲大司徒初漢制常以列侯爲

相唯公孫弘布衣數年登相位封平津侯丞相而封自弘始白事教令稱曰君侯春秋之義上公謂宰言海內

無不統焉故丞相進天子御座爲起在輿爲下丞相病皇帝法駕親問疾及穆視事尙書令若光祿大夫賜以

養牛上尊酒凡丞相府門無闕不設鈴鼓言其大開無節限也後漢廢丞相及御史大夫以三公綜理衆務中

年以後事歸臺閣則尙書爲機衡之任獻帝建安復置丞相又有相國魏改司徒文帝復置中書監令並掌機

密後定制置大丞相第一品陳又置相國位丞相上并丞相並爲贈官自魏晉以來宰相但以他官參掌機密

或委知政事無有常官其相國丞相或爲贈官或則不置自爲尊崇之位多非人臣之職其真爲宰相者不必

居此官後魏舊制有大將軍不置太尉有丞相不置司徒正光以後俱始置之

神瑞元年置八大人官總理萬機時號八公

尤重門

下官侍中又爲樞密之任北齊宰相秉政者亦多爲侍中後周大象宰大丞相隋有內史納言

卽中書令侍中是爲

宰相亦有他官參與焉

按後漢雖置三公而事歸臺閣尙書始爲機衡之任然不過預聞國政未嘗盡奪三

宰相亦有他官參與焉

按後漢雖置三公而事歸臺閣尙書始爲機衡之任然不過預聞國政未嘗盡奪三

公之權也魏晉以來中書尚書始真爲宰相三公遂爲具員蓋漢之典事尚書中書者號爲天子私人及叔季  
之世則姦雄之謀篡奪者亦以其私人居是官而所謂三公者古有其官未容遽廢必擇老病不任事依違不  
侵權者居之東漢之末曹公爲丞相而三公則楊彪趙溫尚書令中書監則二荀華歆劉放孫資之徒也魏之  
末司馬師昭爲丞相而三公則王祥鄭冲尚書令中書監則賈充荀勗鍾會之徒也是時凡任中書者皆運籌  
帷幄佐命移祚之人凡任三公者皆備員高位畏權遠勢之人而三公之失權任中書之秉機要自此判矣夫  
中書監既爲宰相之任則升其品秩可也丞相既不爲宰相之任而嘗爲擅代之階則廢其名字可也今觀魏  
以後之官品中書監僅爲三品而黃鉞大將軍大丞相諸大將軍則爲一品二品未嘗以授人特宋齊梁陳隋  
將受禪則居之此外則王敦桓溫侯景亦嘗爲之夫高官極品不以處輔佐之臣而又存其名字使亂臣賊子  
遞相承襲以爲竊取大物之漸非所以昭德塞違明示百官也

唐世宰相名尤不正初因隋制以三省之長中書令侍中尚書令共議國政此宰相職也後以太宗嘗爲尚書  
令臣下避不敢居由是僕射爲尚書省長官與侍中中書令號爲宰相不輕授人常以他官居職而假以他名  
太宗時杜淹以吏部尚書參議朝政魏徵以祕書監參預朝政其後或曰參議得失參知政事之類皆宰相職  
也貞觀八年僕射李靖以疾辭位詔疾小瘳三兩日一至中書門下平章事而平章事之名始此後李勣以太  
子詹事同中書門下三品謂同侍中中書令也而同三品之名起此高宗以後宰相必加同中書門下三品雖

品高者亦然張文瓘以東臺侍郎同東西臺三品同三品入銜自文瓘始永淳元年以黃門侍郎郭待舉兵部侍郎岑長倩等同中書門下平章事平章事入銜自待舉等始初三省長官議事於門下省之政事堂後裴炎自侍中遷中書令乃徙政事堂於中書省開元中張說爲相又改政事堂號中書門下列五房於其後一曰吏房二曰樞機房三曰兵房四曰戶房五曰刑禮房宰相事無不統故不以一職名官開元以後常以領他職實欲重其事而反輕宰相之體故時方用兵則爲節度使時崇儒學則爲大學士時急財用則爲鹽鐵轉運使又甚則爲延資庫使至於國史太清宮之類其名頗多皆不足取先天之前其員頗多景龍中至十餘人開元以來常以二人爲限多則三人天寶十五載後天下多難勳賢並建備位者衆秉鈞持衡亦一二人而已肅宗之世宰相常數人更直決事或休沐各歸私第詔直事者代署其名而奏之時郭子儀朱泚雖以軍功爲宰相皆不預朝政常衰獨居政事堂代二人署名奏貶崔祐甫二人表言其非罪上問卿向言可貶今云非罪何也二人對初不知上以衰爲欺罔

宋承唐制以同平章事爲宰相之職無常員其上相爲昭文館大學士監修國史次爲集賢殿大學士或置三相則昭文集賢兩學士并監修國史並除焉參知政事掌副宰相除授不宣制不押班不知印不預奏事不升政事堂殿庭別設磚位於宰相後勅尾署銜降宰相一等親王樞密使留守節度使兼中書令侍中同平章事者謂之使相不預政事不書勅神宗新官制於三省置侍中中書尚書二令而不除人以尚書令之貳左右僕

射爲宰相左僕射兼門下侍郎以行侍中之職右僕射兼中書侍郎以行中書令之職復別置中書門下侍郎  
尙書左右丞以代參知政事中書撥而議之門下審而覆之尙書承而行之獨中書取旨而門下尙書之官爲  
首相者不復與朝廷議論政和中改左右僕射爲太宰少宰仍兼兩省侍郎靖康中復爲左右僕射按中書  
尙書之名始於漢通典言漢武帝遊宴後庭始令宦者典事尙書爲之中書謁者乃御前管文書之所武帝雖  
令宦者典其事然其末年以霍光謹慎則以光領之光薨而山繼領其事蓋旣以大臣之秉政者領之則其事  
始在外庭矣上書者爲二封意正本則徹中書人主閱之副本則徹尙書大將軍閱之自此始判而爲二而有  
內外之分霍氏旣敗張安世復以大司馬車騎將軍領尙書事史言安世每定大政已決輒移病出聞有詔令  
乃驚使使之丞相府問焉尙書雖在外庭以腹心重臣領之於宰相並無干預此安世所以密議大政及出詔  
令而佯爲不知遣使問之丞相府則丞相府乃宣行尙書所議之政令耳唐初定制以三省爲宰相之司存以  
三省長官爲宰相之職任然省分爲三各有所掌官亦不一相職旣尊無所不統於是始有同中書門下三品  
同平章事參知機務參預政事之名同平章事者唐初雖以稱宰相乃以處資淺之人在參知政事之下中世  
以後則獨爲眞宰相之官至宋元豐以前皆然然宰相者總百官弼天子旣不當儕之他官而其上不當復有  
貴官唐開元以來郭李相繼以平章事爲節度使謂之使相而宰相之職儕於他官自此始宋元祐以後文呂  
相繼以平章軍國重事序宰臣上而宰相之上復有貴官自此始

宰相屬官

丞相司直漢武帝五年置寧佐丞相舉不法位在司隸校尉上翟方進爲司直旬歲問免兩司隸

丞相長史漢文帝二年置一丞相兩長史

張湛傳云發臣者二長史也顏師古云兼有守者

蓋諸史之長也職無不監

丞相諸曹吏掾屬三十御屬一獻帝建安中魏武爲丞相置徵事二人舊有東西曹魏武還邠乃省西曹咸熙中司馬昭爲相國府置中衛騎二將軍左右長史司馬從事中郎主簿舍人參軍東西曹及戶賊金騎兵車鑿水集法奏倉士馬媒等曹掾屬凡四十二人晉元帝以鎮東大將軍爲丞相府置從事中郎分掌諸曹有錄事中心郎度支中郎三兵中郎其參軍則有諮議參軍二人主諷議事江左初置軍諮祭酒有錄事記室東曹西曹等十三曹其後又置七曹宋武帝爲相合中兵直兵置一參軍曹則猶二也又有參軍督護東曹督護二督護江左置

陪置左右司郎中各一人掌都省之職

二十三曹呼左右司爲都公

龍朔改爲左右承務咸亨中復爲左右司郎中武后又

增員外郎一人

宋熙寧時中書五房各置檢正二員都檢正一員元豐五年罷檢正職務分歸中書舍人給事中左右司郎官建炎三年復置檢正位序左右司上四年罷隆興元年詔尙書省吏兵房刑戶工房禮房三省樞密院機速房看詳賞功房令左右司分房書擬其中書門下諸房令檢正書擬

門下省

門下省後漢謂之侍中寺晉志曰給事黃門侍郎與侍中俱管門下眾事或謂之門下省至齊亦呼侍中爲門下領給事黃門侍郎公車太學太醫等令丞及內外殿中監內外驍駟廐散騎常侍給事中奉朝請駙馬都尉等官梁門下省有侍中給事黃門侍郎四人北齊有侍中給事黃門侍郎各六人統左右局尙食尙藥尙衣殿中凡六局隋門下省有納言二人給事黃門侍郎四人煬帝及散騎常侍諫議大夫等官並掌陪從朝直兼統六局開皇三年罷門下省員外散騎常侍員煬帝卽位加給事員廢帝侍諫議等官又改殿內省唐龍朔二年改爲東臺咸亨初復舊武后光宅改鸞臺神龍初復舊開元元年改黃門省五年復舊有侍中二人黃門侍郎二人給事中四人左散騎二人諫議大夫四人典儀二人起居郎左補闕左拾遺各二人城門郎四人符寶郎四人弘文館校書二人餘小吏各有差

宋循舊制以中書門下平章事爲宰相之職復用兩制官一員判門下省事官制行始釐正焉 元祐初左僕

射司馬光言西漢以丞相總百官而九卿分治天下之事光武中興事歸臺閣尙書始重西漢公卿稍以失職魏初建國置祕書令典尙書奏事文帝改祕書爲中書有令有監而亦不廢尙書然中書親近尙書疎外矣東晉以來天子以侍中常在左右多與之議政事不專任中書於是又有門下而中書權始分矣唐初始合中書門下之職故有同中書門下三品同中書門下平章事其後又置政事堂蓋以中書出詔令門下掌封駁日有

爭論紛紜不決故使兩省先於政事堂議定然後奏聞開元中張說奏改政事堂爲中書門下相承莫改向日所謂中書者乃中書門下政事堂也唐末諸司使皆內臣領之樞密使始與宰相分權五代改用士人樞密使皆天子腹心權重於宰相太祖受命以宰相專主文事參知政事佐之樞密使專掌武事副使佐之百有餘年官師相承中外安帖百司長官及諸路監司諸州長吏皆得專達或申奏朝廷或止申中書樞密院故文符簡徑事無留滯神宗依唐大典分中書爲三省令中書取旨門下覆奏尙書施行中書文字有急速者往往更不送門下省門下一官殆爲虛設徒使吏員倍多文書繁冗無益於是臣等今衆共商量欲乞依舊令中書門下通同職業以都堂爲政事堂每有政事差除及臺諫官章奏已有聖旨三省同進呈外其餘並令中書門下官同商議簽書施行事大則進呈取旨降勅劄事小則直批狀指揮一如舊日中書門下故事若政事有差失委給事中封駁差除有不當委中書舍人封還詞頭又兩省諫官皆得論列政事歸一吏員不冗文書不繁石林葉氏曰本朝別尙書門下中書爲三省各以其長爲宰相則侍中中書尙書令是也既又以秩高不除故以尙書令之貳左右僕射爲宰相而左僕射兼門下侍郎以行侍中之職右僕射兼中書侍郎以行中書令之職則三省互相兼矣左右僕射既爲宰相命令進擬未有不由之出者尙何省而覆之乎方其進對執政無不同則所謂門下侍郎者亦預聞之矣故批旨皆曰三省同奏聖旨既已奉之而又審之亦無是理門下省事惟有給事中封駁而已未有左僕射與門下侍郎自駁已奉之命者則侍中侍郎所謂省審者殆成虛文元祐間因

有併廢門下省之意後雖不行然事有當奏稟左相必批送中書左相將上而右相不同往往持之不上或退送不受左相無如之何自中書侍郎遷門下侍郎雖名進其實未必樂也 致堂胡氏曰成王時雖以周公位冢宰然亦與召公同相爲左右周公不敢自聖獨專相事又將訓後世爲人心不同而大賢難得則參錯并用猶驅車猶植屋無收衆力相輔相正歸於無失若棄數百年成規合三省爲一以一相專之而官屬如故略無可否見姓署名是中書門下之名存而基命駁正之實亡矣豈非舞文便私之甚哉 按溫公所言以三省同取旨爲是蓋主於合也致堂所言以三省各振職爲是蓋主於分也其旨似異蓋門下審覆之說始於唐然唐以中書門下爲政事堂則已合而爲一矣但門下省之官有給事中任出納王命之事有散騎常侍左右司諫任諫爭闕失之事皆所謂覆審而貞觀時太宗又命諫官隨宰相入閣議事有失輒諫則門下省無不舉職之官而三省之失不爲具文固不必爲宰相者各據一省顯分爾汝然後謂之稱其職也元豐官制行王珪爲首相蔡確爲次相確奏乞以首相兼門下侍郎次相兼中書侍郎其實以唐制有中書造命之說於是奏事取旨皆次相而首相並不得預蓋險傾珪而奪之權及溫公爲門下侍郎嘗懇確欲數會議各盡所見而確終不許於是門下省又以審覆駁正爲己任若各逞私意以爲舉職則爲中書長官者執造命之說而必橫門下使不得預取旨之權門下長官者執審覆之說而必駁中書已取旨之事則兩省之分所以使之自爲讐敵矣其實兩省屬官既各有司封駁者則都省共同奏事取旨施行事有不當而後省留黃繳駁乃不易之法

侍中

侍中者立政篇所云常伯卽其任也秦爲侍中本丞相史使五人往來殿內東廂奏事故謂之侍中漢侍中爲加官侍中中常侍得入禁中諸曹受尙書事諸吏得舉法冠惠文冠加金璫附蟬爲文貂尾爲飾便繁左右與帝升降舊用儒者貴子弟榮其觀好至乃襁抱坐受寵位分掌乘輿服物下至妻器虎子之屬武帝時孔安國爲侍中以其儒者特聽掌御唾壺朝廷榮之本有僕射一人光武改爲祭酒侍中舊與中官俱止禁中因武帝時侍中馬何羅挾刃謀逆由是出禁外有事乃召之畢卽出王莽秉政侍中復入與中官止禁中章帝元和中郭舉與後宮通拔佩刀驚上舉伏誅侍中由是復出外秦漢無定員魏晉選用稍增華重齊梁侍中功高者詔加侍中祭酒與散騎侍郎功高者一人對掌禁令此頗爲宰相矣唐初爲納言武德四年改侍中龍朔二年改左相光宅元年又改納言神龍元年復爲侍中開元元年改黃門監五年復爲侍中天寶元年改左相宋制掌佐天子議大政審中外出納之事以秩高罕除自建隆至熙甯真拜侍中纔五人雖有他官兼領而實不任其事元豐寄祿爲開府儀同三司

門下侍郎

秦有黃門侍郎漢因之與侍中俱管門下衆事給事於黃闥之內故曰黃門侍郎初秦漢別有給事黃門後漢併爲一官日暮入對青瑣門拜故謂之夕郎魏晉以來給事黃門侍郎並爲侍衛之官唐龍朔二年改東臺侍

郎光宅元年改鸞臺侍郎天寶元年改門下侍郎

宋制侍郎與知樞密院同知樞密院中書侍郎尙書左右丞爲執政官元豐官制行以尙書左僕射兼復置門下侍郎一員以代參知政事中興後宰相罷兼復改門下侍郎爲參知政事

### 給事中

給事中加官也秦置漢因之以有事殿中故曰給事在散騎常侍下給事黃門侍郎上隋開皇六年始詔吏部置給事郎煬帝乃移吏部給事郎爲門下之職位次黃門下以省讀奏案唐武德三年改給事郎爲給事中龍朔二年改東臺舍人

宋淳化四年詔給事中凡制勅有所不便準故事封駁九年詔停給事中始以封駁司隸銀臺元豐官制行給事中始正其職而封駁司歸門下

### 散騎常侍

自秦置散騎又置中常侍散騎並乘輿並音步浪切騎而散從無常職後中常侍得入禁中漢因之散騎有常侍侍郎與侍中

黃門侍郎後漢中初省散騎而中常侍改用宦者魏文帝黃初初置散騎合於中常侍謂之散騎常侍後用士人始以孟達補之久次者爲祭酒又有員外者曰員外散騎常侍晉令與散騎常侍通員直因曰通直散騎常侍雖隸門下別爲一省梁爲之散騎省自是散騎視中丞通直視侍中員外視黃門郎然終非華胄所悅後魏

北齊皆爲集書省掌諫議左右從容獻納領諸散騎常侍侍郎及諫議大夫給事中等官兼以出入王命位在中書之右其資敘爲第三清唐貞觀二年制諸散騎常侍皆爲散官從三品後悉省之十七年復置顯慶二年遷二員諫中書遂分爲左右龍朔二年改左右散騎常侍爲左右侍極

宋散騎常侍不常置與諫議起居司諫正言皆附兩省班籍通謂之兩省官

### 諫議大夫

秦置諫議大夫掌論議屬郎中令漢武元狩五年始更置之二漢並屬光祿勳北齊屬集書省隋屬門下省煬

帝廢之唐武德復置龍朔二年改正諫大夫

武后垂拱置齊國丹廩素國元國

開元以來廢復以諫議大夫屬門下

宋承五代之弊諫議大夫司諫正言皆須別勅許赴諫院供職方爲諫官其由他官領者帶知諫院以兩省官充掌供奉諫諍凡朝廷闕失大則廷議小則上封明道初陳執中爲諫官屢請置院於是以前下省爲諫院慶曆初詔除諫官毋得用見任輔臣所薦之人元豐寄祿爲大中大夫始正名左右諫議大夫爲諫垣之長專言責焉左隸門下右隸中書凡朝政闕失百官非人皆得諫正按以立異爲心以利口爲能此諫官之所以使人厭也況處多事之時運籌決勝其機賞密其發貴果尤不宜使好異利口者喋喋其間然欲遂從而廢其官則過矣昔司馬溫公言凡擇言事官當以三事爲先第一不愛富貴次則重惜名節次則曉知治體此乃名言誠使爲諫官皆得如此之人何至如致堂所言哉

起居

周官有左右史記其言事蓋今起居之本漢武帝有禁中起居後漢馬皇后撰明帝起居注則漢起居似在宮中爲女史之任又王莽時置柱下五史秩如御史聽事侍旁記其言行此又起居之職自魏至晉起居注則著作掌之歷代有職無官後魏始置起居令史後又別置修起居注二人以他官領之北齊有起居省後周有外史掌書王言及動作之事以爲國志卽起居之職又有著作二人掌綴國錄則起居注著作之任自此而分隋煬帝於內史省置起居舍人唐貞觀二年移其職於門下置起居郎二人顯慶中復於中書省置起居舍人遂與起居郎分掌左右龍朔三年改左右史每御殿則對立於殿有命則臨階俯聽退而書之以爲起居注宋沿唐制起居郎隸門下起居舍人隸中書隆興元年胡銓奏記注之失有四一人主不當觀史一立非其地三前殿不立四奏不直前

拾遺補闕

武后垂拱中置補闕拾遺二官當時頗爲濫雜著於謠誦

謠曰補闕連車載拾遺平斗量把權侍御史機取校書郎

開元以來尤爲清選

宋端拱初改左右補闕爲左右司諫左右拾遺爲左右正言清熙十五年兵部侍郎林栗奏置拾遺補闕左右各一員班在監察御史上

弘文館

唐武德初置修文館後改名弘文館神龍初改爲昭文二年又却爲修文尋又爲昭文開元七年又詔弘文爲  
儀鳳中以館中多圖籍未詳正委學士校理自垂拱以來多大臣兼領館中有四部書自貞觀初褚亮檢校館  
務學士號爲館主宋改爲昭文館以弘犯宣祖諱大學士一人以宰相充學士直學士不常置直官以京朝官充掌經  
史子集四庫圖籍修寫校讐之事原五

### 中書省

中書省自魏晉始省有中書舍人總國內機要尙書唯聽受而已後魏亦謂西臺隋初改內史省唐武德三年  
復中書省光宅元年改鳳閣開元元年改紫微省

宋制中書省掌進擬庶務宣奉命令凡命令之體有七曰冊書曰制書曰詔書曰勅書曰御札曰勅榜  
皆承制書旨以授門下省令宣之侍郎奉之舍人行之留其所得旨爲底大事奏稟得旨者爲畫黃小事擬進  
得旨者爲錄黃

### 中書令

舜命能作納言周官內史掌王之八柄蓋今中書之任其名因漢武帝遊晏後庭始以宣書典事尙書謂之中  
書謁者置令僕射不言謁者省文也元帝時命弘恭僕射石顯秉勢用事翦望之以爲中書政本宜更置士人成帝建  
始四年改中書謁者令曰中謁者令皆屬少府魏武置祕書令文帝及初改中書令又置監並掌機密中書

監始此明帝時中書監令號爲專任晉始同車後乃異焉魏晉以來地在樞近人因其位謂之鳳凰池東晉併入散騎省尋復置之梁中書監令清貴華重大臣多領之其令舊遷吏部尚書才地俱美者爲之後周置內史中大夫二人隋初改中書爲內史置監令各一人尋廢監置令二人煬帝大業十二年又改內史爲內書後復爲內史唐武德初爲內史令三年改中書令龍朔二年改右相開元元年改紫微令 容齋洪氏隨筆曰中書尚書令在西漢時爲少府官屬與太官湯官上林諸令品秩略等侍中但爲加官在東漢亦屬少府而秩稍增尚書令爲千石雖居機要去公卿甚遠至或出爲縣令魏晉以來浸以華重唐初遂爲三省長官居眞宰相之任猶列三品大憲中乃升正二品入國朝位益尊敘班至在太師之上然只以爲親王及使相兼官無單拜者見任宰相帶侍中者才五人范魯公質趙韓王普丁晉公謂馮魏公拯韓魏公琦尚書令又最貴除宗王外不以假人趙韓王韓魏公始贈眞令中令在侍中上肅宗以後郭子儀僕固懷恩朱泚李晟韓弘皆爲之其在京則入政事堂然不預國事懿僖昭之時員寮多率由平章事遷兼侍中繼兼中書令又遷守中書令三者均稱使相皆大勳繫銜而下書使字五代尤多國初尚仍舊眞太宗朝唯除石守信而趙普以故相拜眞宗但以處親王乾道中詔廢

侍郎

漢置中書領尚書事有丞郎魏黃初初中書既置監令又置通事郎次黃門郎後改通事郎爲中書侍郎晉置

四員用散騎常侍爲之隋初爲內史侍郎煬帝改內書侍郎唐初爲內史侍郎武德三年改中書侍郎龍朔以後隋省改號而侍郎之名不易掌侍從獻替制勅冊命敷奏文表通判省事

宋制侍郎掌貳令之職參議大政官制行以尚書右僕射兼又別置侍郎以代參知政事建炎初復改侍郎爲參政

### 舍人

魏置中書通事舍人或曰舍人通事各爲一職晉乃合之謂之通事舍人後省之而以中書侍郎一人直西省兼其職宋初又置中書通事舍人凡有陳奏皆舍人持入參決自是中書侍郎之任輕矣齊永平初中書通事舍人四員各住一省時謂之四戶梁除通事字直曰中書舍人詔詰之任舍人專之陳置五人後魏有舍人省後周有小史上士二人此其任也屬春官隋內史舍人後改內書舍人唐初爲內史舍人武德三年改中書舍人承漚以來臺閣羣彥無不以文章達故中書舍人爲文士之極任朝廷之盛選諸官莫比焉

宋初中書舍人爲所遷官實不任職復置知制誥及直舍人院故事入西閣皆中書詔試制誥三篇惟梁周翰不召試而授其後楊億陳堯佐歐陽修亦如此例富弼爲知制誥封還劉從愿妻封遂國夫人詞頭唐制唯給事中得封還詔書中書舍人繳詞自弼始元豐五年詔中書舍人印爲中書後省之印曾鞏陸佃並試中書舍人自是始正官名遂以中書舍人判後省之事分案五曰上案曰下案曰制誥案曰諫官案曰記注案其雜務

則隨所分案掌之元祐初以蘇軾直舍人院有司言自官制行舍人院廢今爲中書後省於是改爲樞密中書舍人遂爲故事嘉泰四年李季章璧以宗正少卿權中書舍人而中書犯祖諱季章辭有旨權以直舍人院繫銜乃受命不知舍人院廢已久矣蓋大臣失於討論也紹興初詔中書門下兩省已併爲中書門下省其兩省合送給舍文字今後更不分送並送給事中中書舍人其後又詔以他官兼攝者稱權直資淺者爲直舍人院容齋洪氏隨筆曰中書舍人所承詞頭自唐至本朝皆只就省中起草付吏逮於告命之成皆未嘗越日故其職爲難屈廣順初中書舍人劉濤責授少府少監分司西京坐遺男瑱代草制詞也瑱時爲監察御史亦責復州司戶自南渡以來典故散失每除書之下先以省劄授之而續給告以是遷延稽滯廢拂諸官時纔還家卽掩關謝客畏其促詞命也先公使虜歸除徽猷閣直學士時劉才邵當制日於漏舍囑之至先公出知饒州幾將一月猶未受告其他僭諉朋舊俾之假手者多矣故膺此選者不覺其難殊與昔異

### 通事舍人

昔堯試舜賓於四門蓋今任也秦置謁者漢因之謁者初上官稱曰濯謁者滿歲稱給事胡廣云濯者明章二帝服勤國陵闕者濯

柏遂假其名馬融曰濯者習所職也應奉曰濯嬰服事七年號大謁者後人掌之以姓濯章列於漢書也

### 史官

史官肇自黃帝自後顯者夏太史終古商太史高勢周則曰太史小史內史外史而諸侯之國亦置其官秦有

太史令胡毋敬漢武始置太史公以司馬談爲之卒子遷嗣後宣帝以其官行太史公文世修撰之職以他官領之於是太史唯知占候而已王莽改置桂下五史後漢至隋唯魏明太和中史職隸中書餘多隸祕書唐武德初因隋舊制史官屬祕書省著作局貞觀三年移史館於門下省北宰相監修自是著作局始罷史職及大明宮初成置史館於門下省之南其修撰史事以他官兼領或卑品而有才者亦直焉

宋制監修國史以宰相爲之修撰直館檢討無常員修撰以朝官充直館檢討以京官以上充掌修日曆及典司圖籍之事凡國史別置院於宣徽北院之東以藏之謂之編修院東京記云編修俗呼爲史院天聖修眞宗史欲重其任降勅宰相爲提舉參知政事樞密副使爲修史其同修史則以殿閣學士以上爲之編修官以三館祕閣校理以上及京官史學卽停續會要元豐改官制日曆隸國史案每修前朝國史實錄則別置國史實錄

院以首相提舉翰林學士以上爲修國史餘侍從官爲同修國史庶官爲編修官實錄院提舉官如國史從官爲修撰除官爲檢討續事紹興九年修徽宗實錄乃卽史館開實錄院明年以未修正史詔罷史館併爲實錄

院著作局唯修纂日曆中典會要宰相監修但提大綱檢討官搜闕校對惟修撰實事史職只據所送到時政記起

居注銓次其事排以日月謂之日曆聖朝職要歐陽脩論史館日曆奉前世有國者莫不以史職爲重伏見國朝

之史以宰相監修學士修撰又有兩府之臣撰時政選三館之士當陞擢者乃命修起居注如此不爲不重矣然近年以來員具而職廢其所撰述簡略遺漏百不存一至於事關大體者皆沒而不書其弊在於修撰之官

惟據諸司供報而不敢書所見聞今時政記雖是兩府臣僚修纂然聖君言動有所宣諭臣下奏議事關得失者皆不紀錄惟書除目辭見之類起居注亦然修撰官只據此銓次繫以日月謂之日歷而已是以朝廷之事史官雖欲書而不得書也自古人君皆不自闕史今撰述既成必錄本進呈則事有諱避史官雖欲書而不敢書也加以日歷時政記起居注例皆承前積滯相因故纂錄常務追修累年前事而歲月既遠遺失莫存至於事在目前可以詳於見聞者又以追修積滯不暇及之今欲乞特詔修時政記起居注之臣並以德音宣諭臣下奏對之語書之其修撰官不得依前只據諸司供報編次除目辭見並須考驗事實事有文據及迹狀分明皆備書之所以使聖朝賞罰之典可以勸善懲惡昭示後世若大臣用情朝廷賞罰不當者亦得書以爲警戒此國家置史之本意也

### 尚書省

昔堯試舜於大麓領錄天下事似其任也

鄭元注周禮大司會若今尚書

秦時少府遺吏四人在殿中主法書故謂之尚書尚

猶主也漢武始用宦者主中書成帝建始四年罷中書宦者又置尚書五人一人爲僕射四人分四曹通掌圖

書祕記章奏之事其任猶輕後漢則爲文昌天府衆務淵藪故李固云陛下之有尚書猶天之有北斗爲天

喉舌尚書亦爲陛下喉舌漢初尚書雖有曹名不以爲號總謂之尚書臺亦謂之中臺大事八座連名而有不合得建異議二漢皆屬少府魏置中書省遂掌機衡之任尚書之權漸減晉以後所掌略同宋曰尚書寺亦曰

尚書寺亦曰

尚書省亦謂之內臺自晉以來八座及郎中多不奏事梁天監元年詔曰郎署備員無取職事糠粃文案貴尚虛閑空有趨墀之名了無握蘭之實曹郎可依昔奏事自是始奏事矣尚書之職稍以疎遠梁陳機要悉在中書獻納之任又歸門下尚書但聽命受事而已後魏天興元年置八部大人於皇城四方四維面置一人以擬八座謂之八國各有屬官分尚書三十六曹天賜元年復罷別置武歸修勤二職分主省務武歸比郎中修勤比令史至神龜元年始置僕射左右丞及諸曹尚書十餘人各居別寺北齊尚書省亦有錄令僕射總理六尚書事謂之都督亦謂之北省後濟北王以太子監國立大都督府與尚書省分理眾事仍開府置佐隋唐略同凡尚書省事無不總龍朔二年改中臺光宅元年改文昌臺垂拱元年改都臺神龍初復爲尚書省亦謂之南省都堂居中左右分司東有吏部戶部禮部三行每行四司左司統之西有兵部刑部工部三行每行四司右司統之凡二十四司分曹共理而天下之事盡矣

錄尚書

漢武帝時左右曹諸吏分平尚書奏事知樞要者始領尚書事後漢章帝以太傅趙憲太尉牟融並錄尚書事尚書有錄名蓋自憲融始亦西京領尚書之任唐虞大麓之職也魏晉以後公卿權重者爲之職無不總齊世錄尚書及尚書令並總領尚書臺二十曹爲內臺主行遇諸王以下皆禁駐蹕爲錄公北齊錄尚書一人位在令上掌與令同俱不糾察自隋而無

尚書令

秦置尚書令尚主也漢武用宦者更爲中書謁者令成帝更以士人爲尚書令與司隸校尉御史中丞朝會皆  
專席而坐京師號曰三獨坐魏晉以下任總機衡事無大小咸歸令僕隋亦總領衆務唐尚書令武德初太宗  
爲秦王時嘗居之其後人臣莫敢當故自龍朔三年制廢尚書令

至唐德中郭子儀勳業既盛乃特拜馮子儀以文皇帝故讓不敢受

僕射

僕射秦官漢因之古者重武宮有主射以督課軍屯吏囑宰丞巷宮人皆有取其領事之號成帝初置尚書五  
人以一人爲僕射獻帝以執金吾榮邵爲左僕射衛臻爲右僕射侍者分置左右蓋自此始經魏至晉於江左  
省置無恆或不兩置但曰尚書僕射宋尚書僕射勝右減左齊左右僕射行則分道左僕射領殿中主客二曹  
右僕射領祠部儀曹黃案左僕射上署右僕射次署凡僕射掌朝軌尚書掌獻奏都丞任彈違唐尚書令廢闕  
僕射則爲宰相貞觀末除拜僕射必加同中書門下平章事及參知機務等名方爲宰相

自開元以來始有單爲僕射不兼宰相者

初龍朔二年改左右僕射爲左右立政咸通元年復舊武后改二僕射爲文昌左右相神龍初復爲左右僕射  
開元元年改左右丞相

宋元豐官制行以左僕射兼門下侍郎右僕射兼中書侍郎行侍中中書令職事寄祿爲特進政和中詔改左  
僕射爲太宰右僕射爲少宰靖康元年詔復爲僕射乾道八年詔依漢制改左右丞相

左右丞

秦置尚書丞一人屬少府漢因之至成帝建始四年置丞四人及後漢光武始減其二唯置左右丞佐令僕之事唐因隋制龍朔二年改爲左右肅機咸通元年復舊宋制左右丞掌參議大政通治省事以貳令僕射之職元豐寄祿爲光祿大夫建炎三年詔中書門下二侍郎並復改爲參知政事廢尚書左右丞

左右司郎中

員外郎

隋煬帝三年於尚書都省初置左右司郎二人品同諸曹郎從五品掌都省之職唐貞觀二年改爲郎中龍朔二年改爲左成務咸通元年復舊令掌副左右丞所管諸司事員外郎武后永昌元年置與郎中分掌曹務宋制左司郎中右司郎中左司員外郎右司員外郎各一人掌受付六曹之事而舉正文書之稽失分治省事五

歷代尚書八座附

秦尚書四人

不分曹名

漢成帝初置尚書五人一人爲僕射四人分四曹常侍曹

主三公

二千石曹

主郡國

民曹

主凡吏民

上客曹

主外

後又置三公曹

主斷

是謂五曹後漢尚書五曹六人其三三公尚書二人

掌天下歲計

吏曹

二千

石

石曹民曹客曹魏有吏部左民客曹五兵度支凡五尚書晉初有吏部三公客曹駕部屯田度支六曹

無五太

康有吏部殿中五兵田曹度支左民爲六曹尚書

無駕部三

及渡江有吏部祠部五兵左民度支五尚書宋有

吏部祠部度支左民

左民尚書統右民及駕部二曹

都官五兵六尚書齊梁與宋同別有起部而不常置陳與梁同後魏初有

殿中樂部駕部南部北部五尚書其後亦有吏部兵部都官度支七兵祠部民曹等尚書又有金部庫部虞曹

儀曹右民宰官都牧牧曹右曹太倉太官祈曹神都儀同曹等尚書北齊有吏部殿中祠部五兵都官度支六

尚書後周無尚書隋有吏禮兵刑戶工六部尚書唐尚書與隋同

龍朔二年改尚書爲太常伯咸通初復舊

歷代吏部尚書及侍郎

品秩悉高於諸曹後漢以六曹尚書并令僕謂之八座魏以五曹尚書二僕射一令爲八座宋齊八座與魏同

隋以六尚書左右僕射及令爲八座 岳氏愧鄰錄曰今世爲尚書者尚字皆從平聲考之宋書百官志而後

知其訛志之言曰尚書古官也舜攝帝位命龍作納言卽其任也周官司會鄭元云若今尚書矣秦世少府遣

吏四人在殿中主發書故謂之尚書尚猶主也漢初有尚冠尚衣尚食尚浴尚席尚書謂之六尚戰國時已有

尚衣尚冠之屬矣秦時有尚書令尚書僕射尚書丞然則尚書之稱尚書從去聲而非平聲亦旣明甚第鄭康

成注周禮司會曰司會周官之長若今尚書唐陸德明釋其音曰常雖有此據了不知其義之所由取此殆今

世襲稱之始

### 歷代郎官

尚書郎漢置四人一人主匈奴單于營部一人主羌夷吏民一人主戶口墾田一人主財帛委輸後漢尚書侍

郎三十六人初上臺稱守尚書郎中滿歲稱尚書郎三歲稱侍郎五歲遷大縣鄭弘爲僕射奏以臺職任尊而

微薄人無樂者諸吏郎補二千石自此始八座受成事決於郎下筆爲詔策出言爲詔命其入直官供青縑白綾被或以錦繡爲之給帳帷茵褥通中枕太官供食物湯官供餅餌及五熟果實之屬五日一美食下天子一等給尚書郎侍使一人女侍使二人皆選端正妖麗執香爐香囊護衣服奏事明光殿省省中皆以胡粉塗壁畫古賢烈女以丹朱漆地故謂之丹墀尚書郎口含雞舌香以其奏事答對欲使氣息芬芳也奏事則與黃門侍郎對揖黃門侍郎稱已聞乃出丞郎月賜赤管大筆一雙隸麈墨一笏魏置通事郎青龍二年尚書令陳矯奏置都官騎兵督尚書郎選極清美號爲大臣之副武帝時有三十四曹後又置運曹爲三十五曹或爲三十六曹當五王之難其都官中騎三曹郎盡出督戰夜還理事東晉有十五曹過江之後官資少減桓元僭位改都官郎爲賊曹宋高祖時有十九曹元嘉以後有二十曹郎三公比部主法制度支算都官主軍事刑獄其餘曹所掌各如其名齊依元嘉制其拜吏部郎亦有表讓之禮梁加三曹爲二十三曹殿中虞曹屯田天監三年復制侍郎視通直郎郎中遷爲之陳有二十一曹後魏三十六曹至西魏改爲十二部北齊有二十八曹隋初尚書有大曹二十四司凡領三十六侍郎分司官曹務直禁省如漢制開皇三年二十四司又各置員外郎一人以司其曹之籍帳侍郎闕則攝其曹事煬帝卽位以尚書六曹各置侍郎一人以貳尚書之職改諸司侍郎但曰郎又改吏部爲選部郎禮部爲儀部郎兵部爲兵曹郎刑部爲憲曹郎工部爲起曹郎以異六侍郎之名廢諸司員外郎每司增置一曹郎尋又每減一郎置承務郎一人同開皇員外郎之職唐改隋諸司郎爲郎中每曹

又置員外郎

行臺省

昔魏末晉文帝討諸葛誕散騎常侍裴秀尚書僕射陳泰黃門侍郎鍾會等以行臺從至晉永嘉四年東海王  
越帥眾許昌以行臺自隨是也後魏謂尚書大行臺別置官屬北齊行臺兼統民事自辛術始隋謂之行臺省  
有尚書令僕射主事部侍郎每行臺置食貨農圃武器百工監副各置丞錄事等員蓋隨其所管之道置於外  
州以行尚書事開皇八年將伐陳置淮南行省於壽春九年已平陳則廢淮南行臺省唐初亦置行臺行臺尚  
書令得承旨補其秦王齊王府官之外各置左右大護軍府及左右親事帳內府貞觀以後廢其後諸道各置  
採訪等使每使有判官二人兼判尚書大行事亦行臺之遺制 按行臺省之名雖始於魏晉之間然兩漢初  
興高祖所以委蕭何世祖所以命鄧禹權任蓋亦類此唐天寶以後以盜賊陷兩京夷狄侵畿甸則或以大元  
帥副元帥命親王勳臣爲之然但可任專征之責而他事則稟朝旨亦未嘗備行臺省之事至其末年方鎮擅  
地請節於是或以侍中中書令同平章事王爵命之如錢鏐馬殷王審知之徒蓋名爲泰正朔而實自爲一朝  
廷矣然則行臺省之名苟非創造之初土宇未一以此任帷幄腹心之臣則必衰微之後法制已隳以此處分  
裂割據之輩至若承平之時則不宜有此名也建炎時張魏公以樞密使宣撫川陝趙忠簡謂之曰元樞新立  
大功出當川陝半天下之責自兵事外悉當稟蓋大臣在外忌權太重也及魏公罪謫詞言假便宜行事之

制忘人臣無將之嫌宵內閣以招賢擬尙方而鑄印然則承制之事易以惹謗忠簡之言固篤論也

吏部尙書侍郎 郎中 員外郎 司封郎中 員外郎 司勳郎中 員外郎 考工郎中 員外郎 官誥院附

周禮天官太宰漢成帝初置尙書有常侍曹後改吏曹後又爲選部魏改吏部晉與魏同宋時吏部尙書領吏部刪定三公比部四曹後魏北齊吏部統吏部考功主爵三曹後周有吏部中大夫一人小吏部下大夫一人領司勳上士等官屬大司馬隋吏部統吏部主爵司勳考功四曹唐龍朔二年改司列太常伯光宅元年改天官天寶十一載改文部舊令班在侍中中書令上開元令移下自魏晉以來凡吏部官屬悉高於諸曹其選舉皆尙書主之自隋置侍郎貳尙書之事則六品以下銓補多以歸之開元以來選試之任侍郎專之尙書通署或分領其事則列爲三銓尙書掌其一侍郎分其二侍郎郎中員外郎各二人司封司勳考功郎中各一人員外郎各一人 宋典選之職文選二曰審官東院曰流內銓

選二曰審官西院曰三班院尙書左右選十五案

左選掌闕案知闕案六品案七品案八品案九品知雜上案下案甲庫案右選流內銓案大使臣案小使臣案甲庫案案注

案知雜案 侍郎左右選十五案 左選注攝知闕案補闕案參軍上案下案主簿上案下案監尉上案下案入宮告身案 案甲庫案格式案過院案右選注攝上案下案供奉官案庶直案甲庫案案注

案知 郎中主參掌選事凡郎官並用知縣資序以上充未及者爲員外郎 司封判司事一人初以無職事

朝官充 司勳掌勳賞事凡勳十有二級自上柱國至武騎尉 考功判司事一人以帶職朝官或無職朝官充以七事考監司以四善三最考守令齋置考課院其定殿最皆有考辟元豐罷分案十有七五品案六品案七品案八品案九品案職官案

參軍案令丞案主簿案縣尉案使副案  
供奉官案責任案按定案法案知雜案

戶部尚書

侍郎 郎中 員外郎 度支郎中 員外郎  
金部郎中 員外郎 倉部郎中 員外郎

周禮地官大司徒漢置尚書郎四人魏文帝置度支尚書寺吳有戶部晉有度支宋齊領度支金部倉部起部

四曹梁亦有之後魏亦掌支計北齊統度支倉部左戶

掌天下計帳戶口

右戶

掌天下公私田宅租課

金部庫部六曹後周置大

司徒卿一人如周禮之制其屬有民部中大夫二人隋并後周民部職開皇三年改度支爲民部統度支民部

金部倉部四曹國家修隋志謂之戶部蓋以廟諱故也唐改戶部顯慶元年改度支龍朔二年改司元太常伯

武后改地官神龍元年復改戶部總判戶部度支金部倉部事侍郎郎中員外郎各一人度支金部倉部郎中

各一人員外郎各一人

宋制戶部判部事一人以兩制以上充凡戶口田產錢穀食貨之政令皆歸於三司

三司謂鹽鐵戶部度支也

元豐官制行

罷三司歸戶部左右曹左曹分案三曰戶口曰農田曰檢法檢法之事設窠有三曰二稅房地課利右曹分案

六曰常平曰免役曰坊場曰平準各隨其名而任其事曰檢法曰知雜

禮部尚書

侍郎 郎中 員外郎 祠部郎中 員外郎  
膳部郎中 員外郎 主客郎中 員外郎

唐虞秩宗典三禮周禮春官大宗伯後漢尚書吏曹兼掌齋祀魏有祠部曹及晉江左有祠部尚書

歷代與右侯射通職

宋祠部尚書領祠部儀曹二曹齊梁陳皆有祠部後魏爲儀曹北齊統祠部主客虞曹屯田起部五曹又有儀

曹主吉凶禮制後周置春官卿又有禮部後改宗伯又春官之屬有典命後改大司禮俄改禮部大夫隋置禮部尚書統禮部祠部主客膳部四曹唐改司禮太常伯光宅元年改春官總判祠部禮部膳部主客事侍郎郎中祠部膳部主客郎中各一人員外郎各一人

宋建炎三年詔鴻臚光祿寺併歸禮部太常國子監亦隸之分案五曰禮樂曰貢舉曰宗正奉使帳曰封册表曰檢法各隨其名而治其事

兵部尚書

侍郎

郎中

員外郎

職方郎中

員外郎

庫部郎中

員外郎

周禮夏官大司馬魏置五兵尚書謂中兵外兵騎兵別兵都兵也晉初無太康中乃有五兵尚書又分中兵外兵各爲左右宋五兵尚書唯領中兵外兵二曹餘則無矣齊梁陳皆有之後魏爲七兵尚書北齊爲五兵統左中兵右中兵左外兵右外兵都兵五曹後周置大司馬其屬又有兵部中大夫小兵部下大夫隋有兵部尚書統兵部職方駕部庫部四曹唐改司戎太常伯光宅元年改夏官天寶十一載改武官至德初復舊掌武官選舉總判兵部職方駕部庫部事其分領選舉亦爲三銓制如吏部侍郎二人郎中一人員外郎二人職方駕部庫部郎中各一人員外郎各二人

宋兵部判部事一人凡籍武官軍師卒戎之政令悉歸樞密院其選授小者又歸三班元豐更制惟民兵馬改樞密樞密院武官銓選并歸吏部五年詔應緣義勇保甲事並隸樞密院其餘民兵悉隸兵部建炎三年并衛

尉寺隸焉分案十曰賞功曰民兵衛曰贖兵曰人從看詳曰帳籍告身曰武舉曰善官曰開拆曰知雜曰檢法  
洪氏容齋隨筆曰唐因隋制吏兵分掌銓選文屬吏部武屬兵部自三品以上官冊授五品以上制授六品  
以下勅授皆委尚書省奏擬兩部各列三銓曰尚書銓尚書主之東銓西銓侍郎二人主之吏居左兵居右是  
爲前行故兵部班級在戶刑禮之上睿宗初政以宋璟爲吏部尚書李乂盧從原爲侍郎姚元之爲兵部尚書  
陸象先盧懷謹爲侍郎六人皆名臣二選稱治其後用人不能悉得賢然兵部爲甚其變而爲三班流外銓不  
知自何時元豐官制行選事無論文武悉付吏部蘇東坡嘗元祐中拜兵書謝表云古今殊制閎劇異宜武選  
隸於天官兵政總於樞府故司馬之職獨省文書蓋紀其實

刑部尚書

侍郎 郎中 員外郎 都官郎中 員外郎  
比部郎中 員外郎 司門郎中 員外郎

唐虞士官正五刑周禮秋官大司寇漢成帝時尚書初置二千石曹又置三公曹主斷獄後漢光武改三公曹  
主歲盡考課諸州郡政二千石曹掌中都官水火盜賊辭訟罪法亦謂之賊曹魏置尚書都官郎晉復以三公  
尚書掌刑獄宋三公比部皆主法制又置都官尚書主軍事刑獄領都官水部庫部功論四曹齊梁陳並後魏  
有都官尚書北齊都官統都官掌後內非  
爲得失二千石掌後內  
得失比部水部膳部五曹又有三公曹後周有秋官大司

寇卿其屬官又有刑部中大夫隋開皇三年改都官爲刑部尚書統都官刑部比部司門四曹唐改司刑太常  
伯武后改秋官天寶中改憲部至德初復舊總判刑部都官比部司門事侍郎一人周官小司寇中大夫蓋今  
任也後周改周官至隋廢

帝置刑部侍郎唐因之能期二年改爲司刑少常伯咸亨元年復舊他時  
曹名或改而官號不易掌律令定刑名案復大理及諸州應奏之事也 郎中一人 周官大司寇屬官有士師  
下大夫蓋今任也漢尚書  
有二公曹後漢有二千石曹魏有都官曹晉掌刑法獄訟之事歷代沿革其尚書中或爲侍郎或置郎中側在  
吏部郎中篇後周有小刑部下大夫屬秋官府隋初置刑部侍郎煬帝除侍字又改爲憲部郎武德三年改爲  
刑部郎中龍朔二年改爲司刑 員外郎二人 隋文帝置刑部員外郎煬帝改爲憲部丞務郎武  
德三年改爲刑部員外郎其後書改而官不易 都官比部司門  
大夫咸亨元年復舊與侍郎同 郎中各一人 員外郎各一人

宋刑部判部事二人以御史知雜以上或朝官充淳化二年以刑部覆大辟案增置審刑院大中祥符二年置  
糾察在京刑獄司元豐三年併歸刑部五年官制行刑部始專其官

工部尚書

侍郎 郎中 員外郎 屯田郎中 員外郎  
虞部郎中 員外郎 水部郎中 員外郎

周禮冬官其屬有考工掌百工之事漢成帝初置尚書有民曹光武改民曹主繕修功作鹽池園苑魏置左民  
尚書晉宋有起部尚書每營宗廟宮室則權置之事畢則省以其事分屬都官左民二尚書北齊起部亦掌工  
造屬祠部尚書後周有冬官大司空卿掌五材九範之法其屬工部中大夫二人承司之事掌百工之籍而理  
其禁令至隋乃有工部尚書統工部屯田二曹唐改司平太常伯武后改冬官總判工部屯田虞部水部事侍  
郎郎中員外郎各一人屯田虞部水部郎中各一人員外郎各一人

宋制工部判部事一人以兩制以上充凡城池土木工役皆隸三司修造案本曹無所掌元豐官制行尚書工  
部掌天下城池宮室舟車器械符印錢寶之事百工山澤溝洫屯田之政令紹興三年并少府監歸工部以文

思院屬焉建炎并省將作少府軍器監並歸工部時戎器方亟紹興二年詔於行在別置作院一所又詔御前軍器所隸工部宰臣議戶部以給財爲務工部以辦事爲能欲令戶部兼領卒未能合隆興以後起部益簡分案六曰工作曰營造曰材料曰兵匠曰檢法曰知雜原五十二

### 御史臺

御史之名周官有之蓋掌贊書而授法令非今任也戰國時亦有御史秦灑池之會各命書其事又淳于髡謂齊王曰御史在前皆記事之職至秦漢爲糾察之任漢謂御史府亦謂御史大夫寺亦謂憲臺成帝時廢御史大夫爲大司空後漢謂之御史臺亦謂蘭臺寺梁及後魏北齊或謂南臺後周曰司憲屬秋官府隋唐皆曰御史臺龍朔二年改憲臺門北闕主陰殺也爲風霜之任彈糾不法雄峻莫比武后時改御史臺爲肅政臺凡置左右肅政二臺別置大夫中丞各一人侍御史殿中監察各二十人左以察朝廷右以澄郡縣時議以右多名流左多寒刻二臺迭相糾正而左加敬懼龍朔以後去肅政之名但爲左右御史臺初置兩臺每年春秋後使春曰風俗秋曰廉察太極元年以尚書省悉隸左臺左臺大夫竇懷貞表請依貞觀故事廢右臺其屬有三院一曰臺院侍御史隸焉二曰殿院殿中侍御史隸焉三曰察院監察御史隸焉凡寃而無告者三司詰之三司爲御史大夫中丞門下也大事奏裁小事專達凡有彈劾御史以白大夫大事以方幅小事署名而已宋仍唐制大夫無正員止爲兼官中丞除正員外或帶他官者尚書則曰某官兼御史中丞丞郎則曰御史中丞兼某官給事中諫議則曰某

官權御史中丞事次有知雜御史一員副中丞判臺事三院多出外任風憲之職用他官領之大平興國二年以張翼爲監察御史正名舉職自此始唐制御史不專言職至天禧中始置言事御史有御史裏行景祐中始置以處御史之官卑者唐儀臺案有六監司元豐三年季定請復六察於是以御史專領六察容齋洪氏隨筆曰國朝故實臺諫官元不相見故趙清獻爲御史論陳恭公而范蜀公以諫官與之爭元豐中又不許兩省官相往來鮮于子駿乞罷此禁元祐中諫官劉器之梁況之等論蔡新州而御史中丞以下皆以無章疏罷黜靖康時諫議大夫馮澥論時政失當爲侍御史李光所駁今兩者合爲一府居同門出同幕與故事異又曰元豐中趙彥若爲諫議大夫論大臣不以道德承聖化而專任小數與羣有司校計短長失具瞻體因言門下侍郎章子厚左丞王安禮不宜處位神宗以彥若侵御史論事越職覺請申唐六典及天禧詔書凡發令造事之未便皆得奏陳然國史所載御史掌糾察官邪肅正紀綱諫官掌規諫諷諭凡朝政闕失大臣至百官任非其人三省至百司事有失當皆得諫正則許之矣唐制大率重諫官而薄御史中丞溫造道邁左補闕李處志不避捕從者等辱左拾遺舒元褒等言故事供奉官惟宰相外無屈避造棄蔑典禮辱天子侍臣遺補雖卑侍臣也中丞雖高法吏也侍臣見陵法吏自恣請得論罪乃詔臺官供奉官共道路聽先後行相值則揖然則居此二雄職者在唐了不相謀云

察官漢因之位上卿掌副丞相故事選郡守相高第爲御史大夫任職者爲丞相成帝更名大司空哀帝建平二年朱博奏罷以御史大夫爲百僚師帝從之遂爲宰相之任元壽二年復爲大司空御史大夫次之建安復置魏黃初二年又改司空末年復有大夫吳有左右焉晉初省此皆爲三公非今御史大夫也

### 中丞

初漢御史大夫有兩丞一曰御史丞一曰中丞亦謂中丞爲御史中執法中丞在殿中蘭臺掌圖籍祕書外督部刺史內領侍御史十五員受公卿奏事舉劾案章蓋居殿中察舉非法也及御史大夫轉爲大司空而中丞出外爲御史臺率卽今御史大夫任周官小宰掌建邦之宮刑少宰注曰若今御史中丞初御史大夫更名大司空置長吏

中丞官職如故武帝時以中丞督司隸司隸督丞相丞相督司直司直督刺史刺史督三千石下至黑綬漢中丞故

二千石爲之或選侍御史高第義憲中司出爲二千石哀帝元壽二年御史中丞更名御史長史光武復改中丞與尙書令司隸校尉朝

會皆專席而坐京師號爲三獨坐魏初改宮正後復爲中丞晉亦因漢以中丞爲臺主與司隸分督百僚自皇太子以下無所不糾宋制中丞與尙書令分道雖丞郎下朝相值亦得斷之餘內外衆官皆受停駐自齊梁皆謂中丞爲南司後魏爲御史中尉督司百僚其出入千步清道與皇太子分路王公百辟咸使逼避其餘百僚下馬馳車止路停後洛陽令得與分道後周有司憲中大夫隨以國諱改中丞爲大夫唐因隋龍朔二年改大司憲武后改置左右肅政臺御史大夫各一人宋承唐制無大夫以中丞爲臺長無正員以兩省給諫權

持書侍御史

御史中丞舊持書侍御史也漢宣帝元鳳中感路溫舒尚德緩刑之言季秋後帝幸宣室齋居決時令侍御史二人持書持書御史起於此魏置持書執法掌奏劾持書侍御史掌律令晉太始四年又置黃沙獄持書侍御史一人秩與中丞同掌詔獄及廷尉不當者皆理之後并江南遂省宋代掌舉劾齊梁並同皆統侍御史自宋齊以來此官不重自鄭官轉持書者謂之南齊梁天監初始重其選車前依尚書二丞給三騎後魏掌糾禁內北齊亦有焉後周有司憲上士二人亦其任也隋又爲持書侍御史臺中簿領悉以主之至唐永徽初高宗卽位以國諱故改御史中丞龍朔二年改計憲大夫

侍御史

侍御史於周爲柱下史老聃嘗爲之秦時張蒼爲御史主柱下方書一名柱後史謂以鐵爲柱言其審固不撓

也冠法冠一名柱後也惠文以鐵爲柱也亦爲侍御史漢惠帝初遣御史監三輔郡其後又置監御史舉郡國孝廉第四科云有能

按章覆問文中御史武帝時又有繡衣直指者出討姦猾理大獄不常置後漢亦有侍御史員以公府掾屬高第補之或故牧守議郎郎中爲初上稱守滿歲拜真出劇爲刺史二千石平選補縣令二漢侍御史所掌凡五

曹令曹

掌律

印曹

掌刻

供曹

掌齋

尉馬曹

掌廐

乘曹

掌車

豹尾之內便爲禁省魏置御史八人當大會殿中御

史簪白筆側陞而坐帝問左右此何官何主辛毗曰此謂御史舊時簪筆以奏不法今但髡筆耳晉頗用郡守

為之品同持書而有十三曹

史曹第曹直事曹印曹中都督曹外都督曹符節曹水曹中壘曹中曹法曹管曹及江左初省隸第曹置庫曹掌廐馬牛馬市租後分庫曹置左庫外左

曹二宋齊十人梁陳九人後魏御史甚重侍御史與殿中侍御史畫則外臺受事夜則審直內臺舊式不墜臺

主簡代延昌中王顯有寵於宣武為御史中尉始請革選北齊八人亦重其選後周有司憲中士亦其任也隋

置八人開皇之前後踵後魏革選後始自吏部選用大業中始罷御史直宿臺內文簿皆持書主之侍御史但

侍從糾察資位少減唐貞觀初尤重憲官御史復為雄要分直朝堂與給事中中書舍人同受表理冤訟透知

一日謂之三司受事其事有大者則詔下尚書刑部御史臺大理寺同案之亦謂此為三司推事侍御史之職

有四謂推

掌推也彈掌彈

公廡

知公雜事悉

號為臺端人稱端公其知雜事者謂雜端最為雄劇食坐之南

設橫榻謂之南床殿中監察不得坐

亦謂之知床言處其上者皆驕傲如痴

承詔者各五日有旨召御史不呼名則承詔者出

御史舊在西開元初仍制在東

侍御史或闕則假殿中承之故事御史臺不受訟則訴可聞者略有姓名託以風聞開元十四

年定授事御史一人知其日劾題告事人姓名 宋仍唐制侍御史貳中丞隸臺院天禧中置言事御史得兼

諫職

### 殿中侍御史

魏蘭臺道二御居殿中察非法即殿中侍御史之始梁有四人掌殿內禁衛內事後魏北齊有之隋初改殿內

侍御史煬帝省唐制六員咸通以前遷轉及職事與侍御史相亞開元以來權歸侍御史而遷轉猶同武后時

有殿中裏行及員外殿中御史官或有起家爲之而卽眞者神龍以來無監察有裏行舊制侍御史兼知雜事殿中侍御史兼左右巡使監察御史兼察使官卑而入殿中監察御史者謂之裏行 石林葉氏曰唐三院御史謂侍御史與殿中侍御史監察御史也侍御史所居曰臺院殿中曰殿院監察曰察院此其公宇之號非官稱也侍御史自稱端公知雜事則稱雜端而殿中監察稱曰侍御近世殿院察院乃以名其官蓋失之矣侍御史復不稱臺院止曰侍御端公雜端但私以相號而不見於通稱各從所沿襲而已

監察侍御史

初秦以御史監理諸郡謂之監察史漢罷晉太元中始置檢校御史掌行馬外事亦闡臺之職後魏太和末置宿直外臺不得入宿內省北齊置檢校御史十二人後周司憲旗下士八人亦其職也隋開皇二年改監察御史煬帝增置十六員掌出使檢校唐置監察御史十員裏行五員開元初革以殿中掌左右巡監察或權掌之非本任也職務繁雜百司畏懼其選拜多自京畿縣尉又有監察御史裏行者太宗置自馬周始武后時復有員外監察試監察或有起家爲之而卽眞者凡十道巡按以判官二人爲佐務繁則有支使一察官人善惡二察戶口流散籍帳隱沒不均三察農桑不勸倉庫減耗四察妖猾盜賊不事生業爲私蠹害五察德行孝弟茂才異數器跡應時用者六察黠吏豪宗兼并縱暴貧弱冤苦不能自申者元和中以新人不出使無以觀能否乃命專察尚書省號曰六察官 宋初御史多外任風憲之職以他官領之太平興國三年詔本司自薦

屬官俾正名舉職天禧元年詔置御史六員不兼他職月須一員奏事專任彈舉有急務聽非時入對熙寧三年除秀州軍事推官李定權監察御史裏行用選人爲御史自定始七年大正官名以言事官爲殿中侍御史六察官爲監察御史八年詔監察御史兼言事殿中侍御史兼察事容齋洪氏隨筆曰御史許風聞論事相承有此言而不究所從來以予考之蓋自晉宋以下如北齊沈約爲御史中丞奏彈王源曰風聞東海王源蘇冕會要云故事御史臺無受詞訟之例有詞狀在門御史採狀有可彈者卽略其姓名皆云風聞訪知其後疾惡公方者少遞相推倚通狀人頗竊滯開元十四年始定受事御史人知一日劾狀遂題告事人名乖自古風聞之義然則向之所行今日之短卷是也二字本見尉佗傳

原五十三

### 學士院

學士之職本以文學被顧問出入侍從因得參謀議納諫諍翰林院者待詔之所也唐制乘輿所在必有文辭經學之士下至卜筮技術之流皆直於別院以備宴見而文書詔令則中書舍人掌之太宗時名儒學士時召草制然未有名號乾封後始召文士元萬頃范履冰等草諸文辭常於北門候進止人謂北門學士中宗世上官昭容專其事元宗初置翰林待詔以張說等爲之掌四方表疏批答應和文章又以中書務劇文書多壅滯乃選文學之士號翰林供奉與集賢院學士分掌制詔書勅開元又改供奉爲學士別置學士院專掌內凡拜免將相號令征伐皆用白麻其後選用益重號爲內相又以爲天子私人無定員自諸曹尙書下至校書郎

皆得與選入院一歲則遷知制誥未知制誥不作文書班次各以其官內宴則居宰相下一品上憲宗時又置學士承旨唐之學士宏文集賢分隸中書門下省而翰林學士獨無所屬

晉天福五年詔翰林學士院公事宜並歸中書舍人自是舍人畫直者當中書制夜直者當內制開運元年復詔分爲兩制

宋翰林學士掌內制制詔赦勅國書及宮禁所用文辭若已畫直而有未盡則論奏貼正乘輿行幸則侍從以備顧問有所獻納則請對或奏對凡初命爲學士皆遣使就第宣詔旨召入院淳化二年以翰林學士賈黃中蘇易簡同知京朝官考課李沆權判吏部流內銓故事學士掌內庭書詔指揮邊事曉達機謀天子機事密命在焉不當豫外司公事蓋防纖微間或漏省中語故事學士院常在金鑾殿側號爲深嚴自國朝太祖以來藉其才用始令判三銓及知太常禮院事天聖元年詔學士遇筵日至晚出宿蓋故事以雙日鎖院雙日降麻也隆興改元詔學士及經筵官內宿稍復祖宗故事石林葉氏曰學士院正廳曰玉堂蓋道家之名初李肇翰林志末年居翰苑者皆謂凌玉清湖紫霄豈止於登瀛洲哉亦曰登玉堂爲自是遂以玉堂爲學士院之稱而不爲榜太宗時蘇易簡爲學士上以紅羅飛白玉堂之署四字賜之洪氏容齋隨筆曰翰苑故事今廢棄無餘惟學士入朝猶有朱衣院吏雙引至朝堂而止及景靈宮行香則引至立班處公文至三省不用申狀但尺紙直書其事右語云詔報尙書省狀候裁旨月日押謂之詔報此兩事僅存

翰林學士承旨

唐憲宗時始置凡白麻制誥皆內庭代言命輔臣除節將恤災患討不廷則用之宰臣於正衙受付通事舍人若命相之書則通事舍人承旨皆宣讀訖始下有司乾甯二年陸贄以翰林學士承旨拜中書侍郎平章事後唐天成三年勅今後翰林學士入院並以先後爲定惟承旨一員出自朕意不計官資先後在學士之上仍編入翰林志

宋承旨不常置以學士久次者爲之

翰林學士

直院 樞直

唐元宗開元二十六年置初以中書務繁乃選文學之士號翰林供奉與集賢學士分掌制誥書命至是改供奉爲學士別建學士院專掌內命集賢所掌於是罷息自後給事中張淑中書舍人張漸竇華等相繼而入有韓雄閔伯瑛孟匡朝陳兼蔣鎮李白等在舊翰林中但假其名而無所職至德已後軍國務殷其入直者並掌詔勅自此北翰林院始無學士之名其後又置東翰林院於金鑾殿之西墮上之所在而遷取其便樞初自德宗建置以來秩序未正延觀之際各超本列暨正元元年始勅明預班列與諸司官知制誥例同故事中書以黃白二麻爲綸命重輕之辨近者所出猶得用黃麻其白麻皆在此院興元元年翰林學士陸贄奏學士私臣元宗初待詔內庭止於應和詩賦文章而已詔誥本中書舍人之職軍興之際促迫應務權令學士代之今朝野又甯合命將相制詔請付中書行遺物議是之敬宗以翰林學士崇重不可褻狎欲別置東頭學士以備曲

宴賦詩事未行而帝崩梁開平三年改思政殿爲金鑾置大學士一員以敬翔爲之後唐同光初又置護鑾書制學士以趙鳳爲之長興元年翰林學士劉昫奏舊例學士入院除中書舍人卽不試餘官皆先試麻制批答詩賦各一道號曰五題後來雖有召試之名無考校之實欲請今後召試新學士權停詩賦祇試麻制批答共三道內賜題目定字數付本院召試從之晉天福五年廢翰林學士院其公事並歸中書舍人開運元年復學士院周顯德五年詔今後當直下直學士並宜令逐日起居其當直學士仍赴晚朝舊制翰林學士與常參官夕賜見詰以時事故有是制

宋翰林學士無定員凡他入官院未除學士謂之直院學士俱闕他官暫行文書謂之權直元豐中始命佩魚自蒲宗孟始凡執政議事則繫鞋蓋與侍從異禮也政和五年御書摘文堂榜賜學士院按唐所謂翰林學士只取文學之人隨其官之崇卑入院者皆爲學士延覲之際則各隨其元官立班而學士未有一定之品秩故其尊貴親遇者或一遷爲宰相其孤遠新進者或起自初階或元無出身至試令草麻制甚或試以詩賦如試進士之法其人皆呼學士唐至五代皆然至宋始定制資淺者爲直院暫行者爲權直於是真爲翰林學士者職始顯貴可以比肩臺長舉武政路矣

翰林侍讀學士

侍讀 兼侍讀

唐元宗開元三年始命馬懷素褚無量更日侍讀謂宰相曰朕每讀書有所疑滯無從質問可選儒學之士使入內侍讀待以師傅之禮十三年置集賢

院侍讀學士侍讀直學士

宋真宗咸平二年以邢昺爲翰林侍講學士始建學士之職其後馮元爲翰林侍讀不帶學士又有馬宗元爲侍講高若訥爲侍讀不加別名但供職而已天禧三年張知白爲刑部侍郎充翰林學士知大雄軍府侍讀學士外使自知白始元豐官制廢翰林侍讀侍講學士不置但爲兼官然必侍從以上乃得兼之其秩卑資淺則爲說書元祐七年復增學士之號建炎元年詔特差侍從官四員充講讀官宮觀兼侍讀仍免經筵自慶曆以來臺丞多兼侍讀諫長未有兼者紹興十二年後每除言路必兼經筵矣 石林葉氏曰國初侍讀官初無定職但從講官入侍而已宋宣獻夏文莊爲侍讀學士始請日讀唐書一傳仍參釋義理後遂爲定制又曰國朝經筵講讀官舊皆坐乾興後始立蓋仁宗時年尙幼坐讀不相關故起立欲其近爾後遂爲故事熙寧初呂申公王荆公爲翰林學士吳冲卿知諫院皆兼侍講始建議以爲六經言先王之道講者當賜坐因請復行故事下太常禮院詳定當韓持國刁景純胡完夫爲判院自申公等言蘇子容龔鼎臣周孟陽及禮官王汾劉放韓忠彥以爲講讀官曰侍蓋侍天子非師道也且講讀官一等侍讀仍班侍講上今侍講坐而侍讀立不應爲二申公等議遂格今講讀官初入皆坐賜茶唯當講時起就案立講畢復就坐

翰林侍講學士侍講兼侍講

漢顯宗時張酺數侍講於御前靈帝以楊賜有重名舉賜侍講於華光殿中又詔劉寬拜大中大夫侍講華光

殿雖有侍講之號未以名官唐開元十三年始置宋咸平二年國子祭酒邢昺爲侍講學士景德四年以翰林侍講學士邢昺知曹州侍講學士外使自昺始故事自兩省臺端以上並兼侍講元祐中司馬公休以著作佐郎兼紹興五年范元長以宗卿朱子發以祕少並兼蓋殊命也乾道六年張敬夫始復以吏部員外郎兼蓋中興後庶官兼侍講者惟此二人若紹興二十五年張扶以祭酒隆興二年王宣子佐以檢正乾道七年林景庶以宗卿入經筵亦兼侍講臺諫兼侍講慶曆二年召御史中丞賈昌朝侍講邇英閣故事臺臣無在經筵者上以昌朝長於講說特召之仁宗紹興十二年春萬俟卨高並兼講讀紹興二十五年春董殿院王正言珉並兼侍講非臺臣諫長而以侍講爲稱又自此始自元豐以來多以宮觀兼侍講乾道七年竇文閣待制胡銓除提舉佑神觀兼侍講是日以宰執進呈虞允文奏曰胡銓早歲一節甚高謂當闕略錄其氣節不宜令遠去朝廷止曰銓固非他人比且除在京宮觀留侍經筵故有是命

崇政殿說書

兼說書

經筵附

古無此官宋仁宗景祐元年命賈昌朝趙希言王宗道楊安國並爲崇政殿說書日輪二員祇候慶曆二年以趙師民預講官復爲崇政殿說書蓋秩卑資淺則爲說書不兼侍講元祐間程正叔以布衣爲之范滄夫司馬公休又以著作佐郎兼侍講前此未有也趙師明家世記吳氏能改齋漫錄曰王荆公所作賈魏公神道碑曰景祐元年積官至尙書都官員外郎乃始置崇政殿說書而以公爲之然予按傳簡公佳話云太祖少親戎事性好

藝文卽位未幾召山人郭無爲於崇政殿講書至今講官所領階銜猶曰崇政殿說書云據傳言則崇政殿說書不始仁宗豈中嘗罷之至是再建耶翰苑經筵清要顯美通典敘職官猶獨闕焉蓋學士講讀之官皆始唐開元講讀隸集賢殿故通典於集賢學士條下附載而翰林學士唐史志以爲獨無所隸然古人有一事必有一官曹雖沿革不同所掌之事則一故通典載唐所置之官而前代無之者則敘其所掌之事以通於前代如通事舍人則秦漢以來講書之任也集賢殿書院則漢魏以來祕書省之職然則翰林學士之官獨不可通之於前代乎蓋以言語文字被顧問以翰墨技藝侍中待詔則漢武帝所以感鄒枚賈徐靈帝所以招鴻都文學之類是也至於出入禁闈特被親過參謀軍國號稱內相則漢魏以來侍中領尙書事祕書監中書監之類是也若代言典誥之任則武帝所以命司馬相如歷代所以置中書舍人是也

### 總學士

宋朝殿學士有觀文殿大學士學士資政殿大學士學士端明殿學士殿學士資望極峻無吏守無典掌惟出入侍從備顧問而已觀文殿大學士非曾爲宰相不除觀文殿學士資政殿大學士及學士並以寵輔臣之去位者端明殿學士惟學士久次者始除近歲以待簽樞云

### 觀文殿大學士

觀文殿陪煬帝殿名宋初爲文明殿學士慶曆七年宋庠曾文明殿學士稱呼同真宗諡號兼禁中無此殿額

其學士理自當罷乞擇見今正朝或祕殿以名學士乃詔改爲紫宸殿學士以參知政事丁度爲之時學士多以殿名爲官稱丁遂稱曰丁紫宸八年御史何郟以紫宸不可爲官稱於是改延恩殿爲觀文殿以丁度爲之自後非曾在執政者弗除熙甯中王韶以熙河功元豐中王陶以宮僚未歷二府亦除是職蓋異恩也

### 資政殿大學士

國朝資政殿在龍圖閣之東序景德二年王欽若罷參政真宗特置資政殿學士以寵之在翰林學士下欽若不悅訴於上曰臣向自翰林學士拜參知政事今無罪而飛班反在下是貶也真宗特改置大學士以處之十二月復以欽若爲資政殿大學士班在文明殿學士之下翰林學士承旨之上資政殿置大學士自欽若始

### 端明殿學士

端明殿卽西京衙殿也後唐明宗始置端明殿學士宋太宗時程侍郎羽爲之後隨殿名改爲文明殿學士明道二年改承明殿爲端明殿復置端明殿學士政和中嘗改爲延康殿建炎二年都省言延甯殿學士舊係端明殿學士詔依舊近拜簽樞者多領焉

### 總閣學士直學士

宋朝庶官之外別加職名所以厲行義文學之士高以備顧問其次與論議典校謬得之爲榮選擇尤精元豐中修三省寺監之制其職並罷滿歲補外然後加恩兼職直龍圖閣省郎寺監長貳補外或領監司帥臣則除

之待制雜學士給諫以上補外則除之係一時恩旨非有必得之理元祐二年詔增復館職及職事官並許帶  
職尚書二年加直學士中丞侍郎給會諫議通及一年加待制中興後學士率以授中司列曹尚書翰林學士  
之補外者權尚書給諫侍郎則帶直學士待制

### 總待制

唐永徽中命弘文館學士一人日待制於武德殿西門文明元年詔京官五品以上清官日一人待制於章善  
明福門先天末又命朝集使六品以上二人隨仗待制永泰時勳臣罷節制無職事皆待制於集賢門凡十三  
人特給餐錢以優其禮崔祐甫爲相建議文官六品以上更直待制其後著令正待制官日二人備顧問仍有  
公廩永泰元年敕裴冕等並集賢待制此始有待制之所然則蓋唐設官也

宋景德元年置龍圖閣待制祥符二年詔班視知制誥列其下元祐令從四品劉摯言待制學士之選太濫王  
巖叟亦言待制祖宗時選最精出入朝廷纔一二人今立法無定員將一年待制滿朝必有車載斗量之謔

### 總閣職

宋有集賢殿修撰

後改右文殿

直龍圖閣直祕閣三等政和四十二浙福建諸路監司郡守往往交通內官多以應

奉有勞選職遂有未嘗朝覲天子因忽爲待制班從官者蔡京不樂六年因增其目置修撰與舊爲三等曰集  
英殿修撰右文殿修撰祕閣修撰直閣與舊爲六等曰直龍圖閣天章寶文顯謨徽猷祕閣朝廷除授自此密

矣舊貼職無雜歷至是因增置乃定爲雜歷

蔡攸國史外補

紹興十年置直敷文閣  
淳熙十五年置直煥章閣  
淳熙令

自集撰至直祕閣爲貼職中興後直閣爲庶官在藩閫監司者貼職各隨高下而等差之

容齋洪氏隨筆曰

國朝館閣之選皆天下英俊然必試而後命一經此職遂爲名流其高者曰集賢殿修撰史館修撰直龍圖閣直昭文館史館集賢院祕閣次曰集賢祕閣校理官卑者曰館閣校勘史館檢討均謂之館職記注官缺必於此取之非經修注未有直除知制誥者官至員外郎則任之中外皆稱爲學士元豐官制行凡帶職者皆選一官而罷之而置祕書省官大抵與職事官等反爲留滯政和以後增修撰直閣貼職爲九等於是才能治辦之吏貴游乳臭之子其名益輕南渡以來初除校書正字往往召試雖曰館職不卑然其遷敘反不若寺監之遷捷至推排爲郎卽失其故步混然無別矣 又曰宋朝儒館仍唐制有四曰昭文館曰史館曰集賢院曰祕閣率以上相領昭文大學士其次監修國史其次領集賢若只兩相則首廳兼國史惟祕閣最低故但以兩制判之四局各置直官均謂之館職皆稱學士其下則爲校理檢討校勘地望清切非名流不得處熙甯以來頗用贊勞元豐官制行不置昭文集賢以史館入著作局而直祕閣只爲貼職至崇甯政宣以處大臣子弟姻戚其濫及於錢穀文俗史士大夫不復貴重然除此職者必詣館下拜閣乃具盛筵邀見在三館者宴集秋曰暴書宴皆得預席若餘日則不許至按學士待制二官始於唐皆以處清望儒臣俾備顧問其初既無專職亦無定員宋因其制而以三館爲儲才之地故職名尤多元豐新官制其職名之元不附屬於三省寺監者皆從廢革

然除昭文集賢二學士元魏中書門下省外獨翰林學士一官在唐已無所係屬而最爲清要故不可廢而諸學士待制則以其爲三館清流未欲遽廢故以爲朝臣補外加恩之官蓋有同於隋官而初無職掌矣龍圖閣爲儲祖宗制作之所故其官視三館自後列聖相承代代有宸奎之閣而建官亦如之於是學士直閣學士待制直閣之官始不可勝計矣野處譏其濫及俗吏童駭然職名既多自不容不濫施也又所謂學士直閣者尊卑不同故槩稱如觀文爲宰相實政爲執政端明爲簽書龍圖以下爲尚書然皆學士也直龍圖煥章等閣爲書監司之貼職直閣則卑於諸閣然皆直閣也於是舍學士直閣之名而就以所掌殿閣呼之遂有丁紫宸秦天章之稱則以爲名稱非便而改以他殿閣然所謂端明龍圖顯謨敷文煥章之類亦俱非人臣之稱謂流傳既久曰某端明曰某龍圖不覺其非宜耳原五十四

諸卿少卿

夏殷九卿伊尹曰三公調陰陽九卿通寒暑周之九卿少師少傅少保冢宰司徒宗伯司馬司空漢以太常光祿勳衛尉

太僕廷尉大鴻臚宗正大司農少府謂之九等大卿後漢九卿分屬三司太常光祿勳衛尉三卿並太尉所部太僕廷尉大鴻臚三卿並司徒所部

宗正大司農少府三卿並司空所部多進爲三公名有署曹掾史隨事爲員晉以太常等九卿兼將作大匠太后三卿大長秋皆爲列卿太康四年增九卿禮秩梁武帝以太常卿加置宗正卿大司農爲司農卿是爲春卿加置太府卿少府

爲少府卿加置太僕卿是爲夏卿衛尉爲衛尉卿廷尉爲廷尉卿將作大匠爲大匠卿是爲秋卿光祿勳爲祿

卿大鴻臚爲鴻臚卿都水使者爲大舟卿是爲冬卿凡十二卿皆置丞及功曹主簿後魏以太常光祿勳衛

卿大鴻臚爲鴻臚卿都水使者爲大舟卿是爲冬卿凡十二卿皆置丞及功曹主簿後魏以太常光祿勳衛

尉謂三卿太僕廷尉大鴻臚宗正大司農少府爲六卿各有少卿北齊以太常光祿衛尉宗正太僕大理鴻臚  
司農太府爲九寺置卿少卿丞各一人各有功曹五官主簿錄事等員隋煬帝降光祿以下八寺卿階品於太  
常而少卿各加置二人唐龍朔二年改九寺之名凡卿皆加正若太常卿爲奉常正卿他皆加此後各復舊

宋初以爲命官之品秩無職事元豐正名始有職掌中興初併省冗職除太常寺大理寺不罷外宗正以太常  
兼衛尉太僕併兵部太府司農併戶部光祿鴻臚併禮部紹興復置宗正太府司農餘遂廢

太常卿

少卿 丞 主簿 博士 太祝 奉禮郎 兩京郊社署 太樂 鼓吹署 太醫署 太卜署 虞祿署 汾祠署

太常者秩宗典樂之任周曰宗伯爲春官秦改奉常漢曰太常欲令國家盛太常存故稱太常顏師古曰太常者王之旌也並

日月焉王有大事則建以行惠帝名奉常景帝更太常舊常以列侯忠敬孝慎者居之後漢不必侯也後魏爲上卿兼置小

卿官北齊曰太常寺置卿及少卿丞各一人後周建大官置大宗伯卿一人是爲春官隋煬加置少卿二人唐  
因之光宅元年改太常爲司禮卿一人少卿二人通判領丞一人主簿二人博士四人太祝二人奉禮郎協律  
郎各二人齊郎五百五十二郊祀太公廟樂鼓吹太醫太卜廩犧等署各有令

宋初太常寺與禮院事舊不相兼康定元年置判寺同判寺並兼禮儀事元豐正名始專其職元祐詔太常寺  
置長貳餘寺監長貳並互置中興併省寺監獨存太常又命太常兼宗正紹興復隆興元年詔光祿寺併歸太  
常寺兼領掌社稷及武成王廟諸壇齋官習樂之事丞一員罷卿舊不除人少卿元祐初除呂純禮御史論門

蔭得官不可任奉常於是外補建炎初併省冗職詔太常少卿一員兼宗正少卿丞秦置一人漢多以博士議  
郎爲之後漢凡諸丞皆掌行禮及祭祀小事總署曹事舉廟中非法梁舊用員外郎遷尙書郎天監七年改視  
尙書郎隋有二人唐因之分判寺事宋皇祐中詔特差近上知禮官一員兼丞事 主簿漢魏晉有之梁天監  
七年十二卿各置主簿一人北齊有功曹五官主簿二人唐置二人勾稽省署抄目監印給紙筆等事 宋皇  
祐中宋祁乞增置一員勾檢在寺文書及掌出納遂除胡瑗後省紹興十年復置 博士魏文帝初置掌引等  
乘輿王公以下應追諡者則博士議定之 秦有博士數十人兩漢太常屬官皆有博士掌以五經教子弟則今國子博士是也說在本篇隋四人唐因之甚爲  
清選資位與補闕同宋祥符中置博士二員後四員掌講定五禮儀式有改革則據經審議凡於法應諡考其  
行狀撰定諡文有祠事則監視儀物掌凡贊道之事 太祝殷官周官太祝下大夫二人上士四人掌六祝之  
辭以祈福祥秦漢有太祝令丞後皆因之隋置太祝署太祝令丞煬帝罷署太祝八人唐初七人後增九人開  
元減置三人宋太祝奉禮郎掌奏祭祀闕則承奏蔭京官十六以上未掌事者充郊社掌坐齋郎無員數奉禮  
郎漢大鴻臚有理禮郎晉屬大行令北齊有奉禮郎屬鴻臚寺之司儀署後周有理禮中士下士隋屬太常寺  
唐初有理禮郎永徽二年以廟諱改奉禮郎宋品秩見前 協律郎漢曰協律都尉晉改協律校尉後魏有協  
律郎又有協律中郎宋崇甯後隸大晟府又有按協聲律製撰文字運譜等官以京朝官選又或白衣士人通  
樂律者爲之 兩京郊社署周官有典祀掌以時祭祀秦漢有太祝令丞屬奉常景帝改祠祀武帝更廟祀後

漢祠祀屬少府魏晉有太祝令丞宋曰明堂令丞掌祀五帝之事齊有太祝及明堂二令梁有明堂太社二令並屬太常北齊太廟令兼領郊祀崇虛二丞後周有司郊上士中士司社中士下士隋太常寺置郊社署令丞各一人唐因之宋置郊社令渡江初闕紹興十九年始除韓彥直爲太社令 太樂署周官有大司樂掌成均之法亦謂之樂尹秦漢奉常屬官有太樂令及丞又少府屬官并有樂府令丞後漢永平三年改太樂爲大予樂令後魏置太樂博士北齊曰太樂令丞後周有大司樂掌成均之法後改樂部隋有太樂令丞各一人宋制太樂局令丞樂正副使正徵祭時置大晟府宣和二年罷 鼓吹署周禮有鼓人後漢有承華令晉置鼓吹令丞梁又有清商署隋有鼓吹清商二令丞 太醫署周官有醫師上士下士秦兩漢有太醫令丞後漢又有醫丞有醫工長後魏有太醫博士助教後周太醫下大夫隋太醫署令二人唐因之領醫鍼灸按摩咒禁各有博士五代時有翰林醫官使宋制翰林醫官院使副各二人並領院事以尙藥奉御充或有加諸司使者直院四人尙藥奉御六人醫官醫學祇候無定員 太卜署殷官周官掌三兆之法秦漢有太卜令後漢并於太史後魏有卜博士北齊有太卜局丞後周有太卜大夫小卜上士龜占中士隋曰太卜令丞一人唐因之宋隸司天臺不置專官 虞犧署周禮有牧人秦漢內史左馮翊虞犧令丞後漢河南尹屬官有虞犧丞宋屬光祿寺有牛羊司供應所 汾祠署齊太公廟署並有令丞唐開元中置

光祿卿少卿丞主簿大官署  
珍膳署 良醴署 掌醴署

秦郎中令漢武帝更名光祿勳後漢光祿勳居禁中

如宋之殿中御史

有獄在殿門外謂之光祿外部建安末復改郎

中令魏黃初復爲光祿勳東晉哀帝省光祿勳併司徒孝武甯康元年復置梁除勳字謂之光祿卿後魏置少

卿北齊曰光祿寺置卿少卿隋廢光祿寺入司農十二年復置煬帝加置二少卿唐龍朔二年改司宰寺光宅

元年爲司膳丞漢二人多以博士議郎爲之後漢一人魏晉因之梁陳視員外郎主簿漢置北齊曰功曹

五官主簿隋二人唐因之太官署令丞於周官爲膳夫庖人外饗中士下士秦爲太官令丞桓帝使太官令

得補二千石魏亦屬少府後魏分太官爲尙食中尙食知御膳隸門下省而太官掌百官之饌屬光祿卿後周

有典庖中士內膳中士珍饈署令丞周官籩人掌四籩之寶後漢少府屬官有甘丞主膳具晉太官令有錫

官果官吏各二人自後無聞北齊備藏令屬光祿寺後周有備藏中士下士隋如北齊唐因之長安中改珍饈

宋隸御廚有供備庫

太平興國二年改內物料庫

有使及副使

良醞署令丞於周官有酒正中士下士掌酒之政令後漢

湯官丞主酒屬少府晉有酒丞齊食官局有酒吏梁曰酒庫丞北齊有清漳令丞主酒隋曰良醞署宋屬御廚

有內酒坊使都輔院法酒庫掌醞署令丞於周官有醞人齊諸公府有醞食典軍後周有掌醞中士下士隋

曰掌醞署宋屬御廚有油醋庫

衛尉卿

丞守宮署

主簿武庫令丞

武器令丞

左右都候附

衛尉秦官掌門衛屯兵漢景帝初更名中大夫令後爲衛尉又有長樂建章甘泉衛尉皆掌其宮職略同不常

置後漢衛尉卿一人南齊寧宮城管鑰梁位視侍中卿每月丞每旬行宮微糾察不法北齊爲衛尉寺有卿少卿隋廢衛尉寺入太常及尚書省十三年復置以監門衛寧宮門屯兵唐龍朔二年改司衛光宅元年又改衛尉領武庫武器守宮三署署各有令丞秦漢多以博士議郎爲之主簿一人漢衛尉駕四馬主簿前車以乘晉衛尉主簿一人宋至唐因之宋衛尉寺判寺事一人以郎官以上充凡武庫武器並歸內庫及軍器庫以他官及內侍典領守宮歸儀鸞司本寺無所掌卿少卿丞皆爲寄祿官武庫令丞於周官司甲司弓矢等下大夫司戈盾等中士下士兩漢曰武庫令屬執金吾後漢又有考工令丞屬太僕主造兵器成付武庫令魏晉因之晉後屬衛尉宋齊武庫令丞屬尚書庫部梁陳屬衛尉卿武器署令丞隋行臺尚書省有武器監令唐承徽中始置宋武庫武器並歸內庫及軍器庫守宮署漢有守宮令丞屬少府晉及北齊屬光祿勳梁陳屬大匠卿隋屬衛尉寺唐置令一人宋守宮署歸儀鸞司勾當官公車司馬令秦屬衛尉漢因之凡所徵召公車者皆總領之左右都候

周禮司寤氏有夜士十人  
賈注曰今都候之屬

後漢各一人

宗正卿少卿丞主簿

署 諸陵署 太廟令

周官小宗伯秦置宗正漢因之更以敘九族平帝更名宗正又於郡國置宗師有寃失職者宗師得因郵亭上書宗伯請以聞王莽併宗伯於秩宗後漢曰宗正卿兩漢皆以皇族爲之晉兼以庶姓咸甯三年又置宗師以扶風王亮爲之東晉省屬太常後魏有宗正卿少卿後周有宗師中大夫屬大冢宰唐龍朔二年改司宗光宅

元年改司屬卿一人少卿二人領崇元署及諸陵太廟宋宗正寺判寺事二人以宗姓充大宗正司知司事二人以皇親國隸觀察使以上充又有睦親廣親宅都大管勾三人以內侍充元豐六年詔宗正寺長貳不專用國姓蓋自有大宗正司以統皇族也中興後卿一人不常置少卿一人以太常兼三年復置少卿一員嘉定九年詔以宗學改隸宗正寺自此寺官又預考校之事熙甯三年始以異姓朝臣二員知丞事是歲省管勾睦親廣親及提舉郡縣主等宅官以其事歸宗正崇甯三年置南外宗正司在南京西外宗正司在西京各置敦宗院中興後以位高屬尊者爲判大宗正事如舊制以宗室團練以上有德望者充又置知大宗正丞一員以文人充 玉牒所澆化六年始設局置官倣唐制也詔以皇宋玉牒爲名建玉牒殿宇新寺九年以知制誥劉筠夏竦爲修玉牒官自後置一員或二員玉牒十年一進修玉牒官並以學士典領元豐行官制分隸宗正寺丞漢亦用皇族歷代皆有之隋二人宋初爲寄祿官後改奉議郎元豐正官名詔宗正寺除長貳外自後更不專差國姓 主簿梁置陳北齊隋皆有唐因之置一人 崇元署令一人初後魏天興二年置仙人博士北齊置昭元等寺有大統一人都維那三人後周置司寂上士中士又置司元中士下士隋初置崇元署令丞煬帝改郡縣佛寺爲道場置道場監一人改觀爲元壇監一人唐復置崇元署初又每寺觀各置監一人屬鴻臚貞觀中省開元中隸宗正寺宋真宗興崇道教置玉清昭應宮景靈宮會靈觀使以宰相爲之副使判官都監及集禧觀醴泉觀東西太一宮提舉以兩省兩制丞郎及防禦諸司使副爲之又有譚經潤文使亦以宰相爲之

熙甯後增置祠祿之官時相欲以宮觀之祿處不奉行新法之人遂無限員亦無職事釋老之事則如歷代領之祠部郎官又屬鴻臚寺至徽宗時以道教改隸祕書省置道階自六字先生至額外鑒義品秩比視中大夫至將仕郎凡二十六等又置道學升貢及三歲大比法同科舉應天下神霄玉清萬壽宮天慶觀知及副知將來有闕並以學校登科人充宮觀亦依此令以蔡攸通行提舉道錄院中興後仍歸祠部 按崇元署一官唐

創之以司道教而必屬之宗正司者蓋唐以老氏爲始祖則崇其教者亦以爲尊祖宗之事也 諸陵園寢官

漢置屬太常 長陵令秩二千石爲高祖陵故尊其秩 帝元永光元年分諸陵邑屬三輔 史記曰司馬相如爲孝文園令後漢每陵園令各一人丞

及校長各一人 校長主戒盜賊 晉宋皆曰令而梁初爲監後亦改令唐每陵令丞各一人初屬太常開元二十五年並

屬宗正寺宋以宗正寺知丞事 太廟令丞漢置晉宋舊屬太常唐開元諸廟署並隸宗正寺宋以宗正寺知

丞事至長齋郎無常數廟直官一人太廟后廟宮闈令三人以內內侍充元豐後太廟令屬宗正寺 原五十五

太僕卿 少卿丞主簿乘黃署典廄

周官有太僕下大夫穆王置太僕正秦因之漢初領五監 龍馬開駒驎泉駒駘承華 六廄各有令 未央承華駒駘龍馬駘駘大廄 王莽改太

僕晉初領典牧乘黃驪駟龍馬等廄令元帝過江或置或省驪駟廄爲門下之職晉宋以來郊祀則權置梁太

僕卿位視黃門侍郎統南牧左右牧龍廄內外廄後魏兼置少卿北齊統驪駟左右龍左右牝乘黃車府署唐

龍朔二年改爲司取光宅元年改司僕領乘黃典廄典牧車府等四署 丞秦漢二人後漢一人魏晉因之東

晉或省或置梁陳後魏北齊丞一人隋三人唐因之 主簿梁置一人北齊亦一人隋二人唐因之 宋太僕寺判寺事一人以朝官以上充元祐二年詔應內外馬車專隸太僕直達樞密院更不經尚書及駕部所隸官司十一車輅院駉驥院左右天駟監鞍輿車養象所馳坊車營致遠務上下監元豐末廢畿內牧馬監元祐初置左右天廐坊聽民間承佃牧地紹聖初置孳生監中興後廢太僕併入兵部 乘黃署後漢太僕有未央廐令魏改爲乘黃廐乘黃古之神馬因以爲名 典廐署周官有校人圉師趣馬掌十二閑之馬漢西京太僕有龍馬長東京有未央廐令掌乘輿及宮中之馬魏爲驍驪廐晉有驍驪龍馬二廐自宋以後分驍驪廐屬門下梁太僕有龍廐及內外等廐陳因之北齊有驍驪左右龍等署後周有左右廐各上士一人隋如北齊唐改龍廐爲典廐署 典牧署周官牧師下士四人掌牧馬而頒之秦漢邊郡置六牧師令隋有典牧牛羊等署 車府署秦有車府令 諸牧監漢太僕有牧師諸苑三十六所在北邊西邊以郡爲苑監官魏置牧官都尉晉因之北齊有左右牝牡駝牛羊等署令後周曰典牝典牡上士中士又有典駝典羊典牛中士隋曰典牧署牛羊署令丞唐初因之分曰牧監 宋有羣牧司制置使副使都監判官掌內外廐牧之事大事則制置使同簽小事則專遣其副使都監不備置判官都監每歲更出諸州巡坊監 左右駉驥院勾當官天駟左右四監左右天廐坊牧養上下監乳酪院以勾當左駉驥官兼掌藥蜜庫佑馬司勾當官車營致遠務駝坊皮剝所

大理卿

少卿

正丞

主簿

評事

監

大理亦舉繇作士周秋官之任秦為廷尉漢因之兵獄同制故曰廷尉此應劭注顏師古曰廷平也景帝更名大理後漢廷

尉卿以世家為之郭氏尤盛郭躬為廷尉卿家世掌法務在寬平乃條諸重文可從輕者十一事奏之著於令梁有正監平三人元會廷尉三官與建

康三官皆法冠元衣朝服以監東西中華門手執方木長三尺一寸謂之執方北齊曰大理寺置卿少卿各一

人後周有刑部中大夫掌五刑之法附萬人之罪屬大司寇隋煬帝加置少卿二人唐龍朔二年改詳刑光宅

元年改司刑卿一人少卿二人秦置廷尉正漢因之魏晉謂正監平為廷尉三官唐改詳刑大夫咸亨初復舊

丞自晉武咸甯中曹志上表請廷尉置丞北齊曰大理丞煬帝改勾檢官唐又曰丞主簿自魏晉宋齊梁

陳皆有唐置二人獄丞晉有左右丞隋有獄掾唐曰丞司直後魏置位在正監上不署曹事唯覆理御史

檢劾事漢武已置司直屬丞相府非此司直評事漢宣帝初於廷尉置左右平光武省右平唯左平魏晉直謂之廷尉平隋煬帝

置評事四十八人唐置十二員秦置廷尉監漢有左右監光武省右監唯左監魏晉直云廷尉監隋開皇三

年罷大理監宋熙甯九年神宗謂國初廢大理獄非是以問孫洙洙對合旨於是下詔復置大理獄官制行

左斷刑右治獄各五案左斷詳刑詳獄宣黃分羅奏表右斷左推右推寺案知雜檢治元祐間因鮮于侁所請廢大理獄後復建炎三年併省

寺監大理如故省卿而斷刑治獄少卿各一員寺正神宗復置大理獄後置元豐五年刑部乞分評事司直

與正為斷司丞與長貳為議司寺丞國初為寄祿官神宗正官名置獄丞命卿少舉元豐始自朝廷差官

評事國初為京官寄祿隆興二年詔評事以八員為類以雷澤號令星斗文章為號

鴻臚卿少卿 丞 主簿  
典客署 司儀署

周官大行人掌大賓客之禮

又有象胥于賓注若晉鴻臚也

秦有典客漢改鴻臚建中六年改大行令武帝更名大鴻臚又更

名其屬官爲大行令秦又有典屬國漢成帝省之併大鴻臚

王莽改典樂

東晉至宋齊有事則權置梁除大字但曰

鴻臚卿北齊曰鴻臚寺後周司寇有蕃部中大夫賓部中大夫隋文帝開皇三年廢鴻臚寺入太常十二年復

置領典客司儀崇元三署唐龍朔二年改司文光宅初改司賓

丞秦曰典客丞漢爲鴻臚丞後周曰賓部上

士主簿一人 典客署周官有掌客上士中士漢改大行令丞魏改客館令晉改典客宋分置南北客館令

後魏典客監太和中置主客令北齊有典客署後周置東南西北四掌客上士下士隋煬帝改典藩署唐爲典

客署 司儀署周官有司儀上士中士漢大鴻臚有理禮郎自後無開後魏置司儀官北齊置署令丞後周置

上士等員 宋鴻臚寺判寺事一人往來國信所管勾官二人都亭驛監官一人西驛管勾官二人禮賓院監

官二人懷遠驛監官一人元豐官制行置卿少卿丞主簿各一人所隸官屬十有二中興後廢鴻臚併入禮部

司農卿

少卿 丞

主簿 上林署

太倉署 鈞盾署

導官署 苑總監

諸倉監

司竹監 溫泉湯監 諸屯監 農粟都尉等官 典農中郎將等官 籍田令

諸倉監

籍田令

少皞氏以九疇爲九農正周爲太府下大夫秦爲理粟內史漢景帝更名大農令武帝更名大司農初郡國鹽

官鐵官並屬司農中興昔屬郡縣建安中爲大農魏黃初改司農晉哀帝末省司農并都水梁司農卿位視散

騎常侍主農功倉厚後魏曰大司農北齊曰司農寺後周有司農上士一人掌三農九穀稼穡之政令屬大司

徒唐龍朔二年改司稼領上林太倉鈎盾導官四署各各有令丞

秦曰理粟內史丞漢爲大司農丞或謂之中丞

主簿晉太康中置

宋元豐官制行司農舊職悉歸戶部右曹司農所隸官屬凡五十倉二十有五

請會要總倉作

二十草場十有續會要

排岸司四園苑四建炎三年詔罷司農寺紹興四年復置司農寺卿少各特置一員

上林署漢水衡都尉之職後漢曰上林苑令丞魏晉因之宋初隸尚書殿中曹梁陳屬司農北齊及隋亦然

唐有令二人丞四人掌諸苑園池沼種植蔬果藏冰之事 宋四園苑提舉官無常員東曰宜春南曰玉津西

曰瓊林北曰瑞聖又有西京宮苑司勾當官元豐後四園苑屬司農 太倉署周官有廩人下大夫上士秦官

有太倉令丞漢屬大司農後漢令主受郡國傳漕穀其滎陽敖倉官中興後屬河南尹歷代並有之晉江左以來又有東

倉石頭倉丞各一人後周曰司倉下大夫 宋諸倉京城有船般倉稅倉中倉總二十五名元豐後二十五倉屬司農中

興後又有豐儲倉治熙間命右司爲之提領後以屬檢正 鈎屯署漢鈎盾令官者典諸近園苑遊觀之事屬

少府晉大鴻臚屬官唐因之天寶五載侍御史楊釗充水虞使自後相循或以京尹或以戶部侍郎充 導官署導周有春人秦漢有令丞屬少府

漢東京令丞主春御米及作乾糶屬大司農歷代皆有 苑總監自隋置東西南北各有監及副監唐因之

司竹監漢有司竹長丞魏晉河南淇園竹各置官守之後魏有司竹都尉隋曰司竹監唐因之 溫泉湯監令

唐置 諸屯監隋置及副監畿內者隸司農自外者隸諸州唐因之 醴粟都尉醴音搜漢武帝軍官不常置

又有治粟都尉均輸令漢有之後漢省 韓官長漢有之如滄曰韓音管或作韓主均輸之事所謂韓鹽鐵也晉灼曰管韓之官長也均輸自有令初韓官

屬少府中屬主爵後屬司農 典農中郎將 典農都尉 典農校尉並置晉太始二年罷農官爲郡縣  
後復有之隋煬帝罷典農官 勸農謁者梁武帝置視殿中御史 籍田令周爲何師漢文帝感賈誼言始開  
籍田置令丞

太府卿

少卿丞 主簿 諸市署  
平準署 左右藏署 常平署

周官太府下大夫歷代不置職在司農少府梁天監七年置太府卿位視宗正陳因之後魏改少府爲太府卿  
兼有少卿北齊曰太府寺兼掌造器物後周有太府中大夫隋初所掌左右藏及尙方司染甄官等署煬帝又  
分太府寺置少府監管尙方織染等署而太府但管京都市及平準左右藏唐龍朔二年改外府光宅元年改  
司府領兩京諸市平準左右藏常平等九署各有令丞 丞於周官爲太府上士之任梁太府丞後周曰太  
府上士隋又曰府丞 主簿亦周官太府下士之任隋置四人唐減一人 宋太府寺但掌祠祭香幣帨巾神  
位席及造斗秤升尺而已元豐改制始正職掌所隸官司二十有五左藏東西庫南北兩庫內藏庫奉宸庫祇  
候庫元豐庫布庫茶庫雜物庫糧料院審計司商稅務汴河上下鎮蔡河上下鎮都提舉市易司雜買務雜賣  
場市易上界市易下界推貨務交引庫抵當所和劑惠民局店宅務石炭場香藥庫中興後惟有糧料院審計  
司編估局打套局交引庫祇候庫左藏東西庫和劑惠民局寄樁庫 諸市署周官有司市下大夫掌市之理  
漢京兆尹屬官有長安市長丞後漢則河南尹屬官維揚市長丞魏晉因之東晉則丹陽尹管之後魏有京邑

市令北齊則司州牧領東西市令丞後周司市下大夫隋初京市令丞屬司農煬帝改隸太府唐因之 平準  
署周官有貨人中士下士秦置平準令漢因之後漢改中準使官者爲之列於內署宋唯掌染順帝卽位以帝  
諱準故曰染署齊又曰平準周少府梁陳則曰平水令丞北齊平準屬司農後周曰平準中士下士 左右藏  
署周官有職幣上士中士又外府中士有玉府職內上士漢少府屬官有中藏府令丞魏因之晉有左右藏令  
江東置御史擘庫曹後分庫曹曰外左庫內左庫宋省外左庫而內左庫直曰左庫齊梁陳曰右藏北齊曰左  
右藏令屬太府寺後周曰外府上士中士唐置左藏署令右藏署令 常平署起漢宣帝時耿壽昌請於邊郡  
皆築倉穀賤時增價而糴貴時減價而糴名曰常平倉後漢明帝置常滿倉晉又曰常平倉梁亦曰常平倉而  
不糴糴後魏雖不名常平亦各令官司糴貯儉則出糴隋曰常平倉唐武德中置常平監官以均天下之貨後  
省監置常平署令一人掌倉糧管鑰出納糴糶凡天下倉廩和糴者爲常平倉正租爲正倉地子爲義倉

祕書監

少監

丞 郎

校書郎

正字

著

佐郎

正字

太史局令

丞

周官太史掌建邦之六典又有外史掌四方之志三皇五帝之書漢國籍所在有石渠石室延英閣廣內貯之  
於外府又有御史中丞居殿中掌蘭臺祕書及麒麟天祿二閣藏之於內禁後漢圖書在東觀桓帝始置祕書  
監掌典圖書古今文字考合同異屬太常魏武帝又置祕書令文帝乃置中書令祕書改令爲監其蘭臺亦藏  
書籍御史掌之

魏薛夏云蘭臺爲外臺祕書爲內閣

晉武帝以祕書併入中書省惠帝復別置祕書監并統著作局掌三閣圖書

自是祕書之府始居於外梁曰祕書省後周祕書監亦領著作監掌國史隋祕書省領著作太史二曹煬帝增

置少監一人後又改監少監並為令唐龍朔二年改蘭臺改監為太史少監為侍郎天授初改麟臺其後國史

太史分為別曹而祕書省但主書寫勘校而已 丞魏武帝置文帝欲以何植為祕書右丞後遂有左右二丞

歷代皆有唐龍朔二年改蘭臺大夫 祕書郎後漢馬融為祕書郎詣東觀典校書晉亦謂之郎中武帝分祕

書圖籍為甲乙丙丁四部使祕書郎中四人各掌其一宋齊祕書郎皆四員尤為美職十月便遷齊梁之末多

貴遊子弟為之無其才實當時感曰上車不落則著作體中何如則祕書北齊又謂之郎中隋除中字唐龍朔中改蘭臺郎宋端拱初

建祕閣在崇文院中元豐正名以崇文院為祕書省既罷館職職臺故事云國初三館直館直校勘通謂之館職必試而命不試而命者皆異恩盡以

三館職事歸祕書省置監少至正字不領他局屬有五著作佐郎祕書校書祕書正字各以職隸於長貳惟日

歷非編修官不預 祕書省校書郎漢之蘭臺及後漢東觀皆藏書之室亦著述之所後於蘭臺置令史又選

他官入東觀蓋有校書之任而未為官故以郎居其任則謂之校書郎以郎中居其任則謂之校書郎中當時

重其職故稱東觀為老氏藏室道家蓬萊山焉魏始置祕書校書郎唐為文士起家之良選其弘文崇文館著

作司經局並有校書官皆美職而祕書省為最 著作郎漢東京圖書悉在東觀故使名儒入直謂之著作東

觀隸祕書著作郎一人謂之大著作魏置佐著作郎晉制佐著作郎始到職必舉名臣傳一人宋初遂廢宋齊

以來遷佐於下謂之著作佐郎後魏北齊有著作郎佐郎後周有著作上士中士隋於祕書省署著作曹唐為

著作局龍朔二年改司文郎中佐郎爲司文郎 正字二人隋著作曹置唐滅一人學同校書宋舊爲寄祿官  
太史局令昔少皞以鳥名官其鳳鳥氏爲歷正至顛頊命南正重以司天北正黎以司地唐虞羲和紹重黎  
之後代序天地夏太史終古殷太史高勢周官太史又有馮相氏保章氏周宣王時太史官失其守而爲司馬  
氏司馬氏世典周史惠襄之間司馬氏適晉晉中軍隨會奔秦而司馬氏入梁秦爲太史令漢武置太史公以  
司馬談爲之位丞相上天下計書先上太史副上丞相談卒子遷嗣遷死宣帝以其官爲令行太史公文書  
而已隋曰太史曹煬帝又改曹爲監唐初改監爲局龍朔二年改祕書閣改令爲郎中丞爲祕書閣郎久觀元  
年改渾天監不隸麟臺又改渾儀監長安二年復爲太史局乾元元年改司天臺其次小史有司歷保章正靈  
臺郎挈壺正等官各有差 宋有司天監天文院鐘鼓院元豐正官制以太史局隸祕書省其官有令有正有  
春官夏官中官秋官冬官正有丞有直長有靈臺郎有保章正 算學元豐七年詔四選命官通算學者許於  
吏部就試其合格者上等除博士中次爲學諭崇甯五年遷算學令附於國子監十一月從薛昂請復置算學  
大觀三年太常寺考究以黃帝爲先師自常先力牧至屬初已上從祀凡七十人四年以算學生併入太史局  
宣和二年詔並罷官吏原五十六

少府監

少監 中尙左尙右尙 織染掌冶等署 暴室等丞

織

少府祭官漢爲九卿凡中書謁者尙書令僕侍中常侍黃門御史中丞以下皆屬焉晉哀帝末省併丹陽尹孝

武復置宋少府領左右尚方御府東冶南冶平準等令丞齊又加領左右銀鍛署梁少府爲夏卿位禱尚書左

右丞後魏少府謂之六卿

以少府宗正太僕廷尉司農鴻臚爲六卿

孝文改太府隋煬帝分太府爲少府監復領尚方織染等署後

又改監少監並爲令唐武德初置軍器監廢少府監貞觀元年五月分太府中尚方織染坊掌冶坊醫置少府

監龍朔二年改爲內府監光宅元年改尚方監監一人

判少監二人

判領中尚左右尚織染掌冶等五署

中尚署周官爲玉府秦置尚方令兩漢又有考工令主作兵器職稍同漢末分中左右三尚魏晉因之自過江

唯置一尚方宋謂之左尚方本署謂之右尚方孝武改御府齊署左右尚方令各一人梁有中左右尚方隋煬

帝分隸少府唐省方字

織染署令周禮天官典絲染人秦置平準令漢因之初少府屬官有東織西織成帝

省東織更名西織爲織室北齊中尚方領涇州雍州絲局定州紬綾局丞後周有司織下大夫隋有司織司染

二署煬帝合爲織染一署

掌冶署秦及漢郡國有鐵官

諸郡國出鐵者署鐵官長丞

晉治令宋有東冶南冶各置令丞屬

少府齊因之江南諸郡縣有織者或置冶令或置冶丞多吳所置梁陳有東西冶

東治重西治輕其西治卽宋齊之南冶

北齊諸

冶屬太府後周有冶工鐵工中士隋有掌冶署令丞唐於京師置冶署

暴室丞

後漢暴室丞宦者也主中婦人病疾者就此室理之其息

后貴人有罪亦就此

海丞

漢平帝置少府海丞一人掌海稅後無

宋丞

與海丞同置掌諸果實後無

宋少府監所隸官屬五文思院綾錦院

染院裁造院文繡院建炎初以將作少府監併歸工部紹興三年復置將作監少府事總焉

將作監少監

丞主簿

左校右校

中校等署

東園主簿令

今將作亦少皞氏工正唐虞共工周官考工秦有將作少府漢更名將作大匠梁改大匠卿北齊有將作寺官曰大匠後周有匠師中大夫又有司木中大夫隋改寺爲監大匠爲大監煬帝改爲大匠少匠五年又改爲大監少監十三年又改大令少令唐復皆爲匠龍朔二年改繕工監光宅二年改營繕監天寶中改大匠爲大監少匠爲少監領左校右校甄官中校四署 丞漢二人後漢一人後周有匠師中士隋二人唐四人 主簿晉置後與丞同隋二人唐因之 左右校署秦及漢初有左右前後中五校後唯置左右校令魏併左右校於材官晉屬少府隋屬將作 甄官署令丞一人後漢有前後中甄官令屬將作晉有甄官署掌磚瓦之事宋齊北齊隋悉有之唐因之掌營磚石瓷瓦 中校署令秦漢有後無唐置令丞各一人掌舟車雜兵仗廩牧 東國主章令漢有之武帝更名木工唐無 宋將作監所隸官屬十修內司東西八作司竹木務事材場麥絕場窰務丹粉所作坊物料庫退材場箔場建炎初與少府俱併歸工部紹興三年置將作監少府事總焉陸興初宮室無所營繕職務簡省百工器用屬之文思院上下界隸工部丞監惟置丞一員餘官虛而不除乾道以後人才感多監少丞簿無闕凡臺省久次與郡邑之有聲者悉借徑於此號爲儲才之地而營繕之事多俾府尹繼漕分任其責

國子監

祭酒 司業 丞 主簿 國子博士 助教 太學 廣文 四門 律學 書學 算學等博士 武學宗學附

孫卿在齊爲三老稱祭酒漢吳王濞年老不朝爲劉氏祭酒則祭酒之名久矣漢置博士聰明有威重者一人

謂之博士祭酒蓋本曰僕射中興轉爲祭酒魏因之晉初立國子學置國子祭酒一人

永嘉中又置儒林祭酒以杜夷爲之國子

周之舊名周官師氏卽魏國子祭酒宋代不置學助教唯置一人祭酒博士常置明帝以國學廢初置總明觀祭酒一人有元儒文史四科科置學士各十人齊置國學祭酒齊梁號爲國師陳後魏亦曰國子祭酒其初定中原先立太學置五經博士北齊國子寺有祭酒一人隋國子寺罷隸太常又改寺爲學煬帝改國子學爲國子監依舊置祭酒唐因之龍朔元年東都亦置二年改司成館又改祭酒爲大司成光宅元年改成均監領國子學太學四門律學書學算學置祭酒一人掌監學之政天寶九載置廣文館學生進士 國子司業煬帝大業三年初置禮曰樂正司業父師司成因以爲名唐置二人副貳祭酒通判監事龍朔二年改少司成祭酒司業皆儒重之官非其人不居 丞隋置三人唐一人 主簿北齊置隋一人唐因之 宋國子監祭酒掌國子太學武學律學小學之政令司業爲之貳丞參預監事凡諸生隸太學者立三舍法

見學按門崇甯立辟廡置大司

成爲師儒之首中興併國子監歸禮部紹興三年置國子監十二年置祭酒十三年始復建太學隆興併省司業乾道七年乃並除 國子博士班固云按六朝時往往有博士掌通古今漢武帝初置五經博士宣成之代

五經家法稍增置博士一人博士選有三科高第爲尙書次爲刺史其不通政事以久次補諸侯太傅平帝改博士爲博士師後漢並擇儒者晉武帝初立國子學置國子博士一人若散騎常侍中書侍郎太子中庶子以上乃得召試梁天監四年置五經博士各一人舊國子學生限以貴賤武帝欲招來後進五館生皆引寒門薦

才不限人數隋省國子博士大業三年復置唐增置二人龍朔二年改司成宣業諸州府亦有經學博士一人

助教晉初立國子學置助教十五人江左及宋並十人宋齊梁陳後魏北齊亦十人隋置四人唐三人諸府

州縣各有助教職員

府州二人縣一人學生各有差

晉江左增置國子博士十六人謂之太學博士梁置八人陳後魏亦然

北齊十人後周置太學博士下大夫六人隋初置五人仁壽元年罷國子唯立太學置博士五人大業三年減

置二人唐因之助教後魏置北齊置二十人後周曰太學助教上士隋又曰太學助教唐因之 廣文館博士

助教唐天寶九載置 四門博士後魏書劉芳表云大和二十年立四門博士於四門置學按禮記曰天子設

四學鄭元注曰四郊之虞庠也今以其遠遠故置於四門請移與太學同處從之北齊二十人隋五人唐三人

助教北齊二十人隋初五人唐因之直講四人唐初置無員數長安四年始定四員大成二十人唐置取貢舉

及第人簡聰明者試充 律學博士晉置屬廷尉衛覬奏請律學博士轉相教授東晉以下因之梁曰胄子律

博士屬廷尉陳亦有律博士後魏北齊並有之隋大理寺官屬有律博士八人唐因之而置一人移屬國學助

教一人位從九品上 書學博士算學博士唐置 宋國子監無博士有直講八人熙寧改太學博士大觀元

年乃置國子博士國子正錄太學博士元豐改直講為之 太學正錄仁宗朝胡瑗掌太學其正錄第補諸生

熙寧末興三舍始選官為正錄如學官之制書庫官淳化五年改掌印經史羣書以備朝廷宣索賜予之用及

出蠶而收其直以上於官 武學唐開元間始置太公尚父廟以留侯張良配中春中秋上戊祭之牲樂如文

宣王仍以古名將十人爲十哲配享貞元元年尊太公爲武成王詔考定可配享者列古今名將六十四人圖形焉宋慶曆三年詔置武學於武成王廟以阮逸爲教授八月罷熙寧五年復置詔於武成王廟置學紹興十六年詔修建武學二十六年詔武學博士學諭各置一員宗學漢平帝詔置明章二年帝友愛子弟幼者率留京師訓導以禮唐高宗詔宗室子孫就祕書外省別爲小學宋元豐六年建宗學崇寧初立月書季考法南渡初建學嘉定更新置四齋後再增三齋宗學博士舊諸王宮大小學教授也咸平初遂命諸王府官分兼南北宅教授崇寧五年又改稱某王宮宗子博士位國子博士嘉定九年改教授爲博士又置宗學諭一員並隸宗正寺於是宗室疎遠者皆得就學彬彬可觀矣

都水使者

丞 主簿 舟楫署 河渠署

虞舜命益作虞掌山澤周官有林衡川衡二官掌林麓川澤之禁漢武帝元鼎二年初置水衡都尉掌上林苑

光武併其職於少府每立秋遷劉之日暨置水衡都尉

羅綱將祭大觀之名

事詔省漢武帝以都水官多置左右使者以

領之哀帝省使者官至東京凡都水皆罷之併置河隄謁者漢之水衡都尉本主上林苑魏世主天下水軍舟船器械督武帝省水衡置都水臺有使者一人掌舟航及運部而河隄爲都水官屬元康中復有水衡都尉江左省河隄宋置水衡令齊有都水臺使者梁改都水使者爲大舟卿後魏初昔有水衡都尉及河隄謁者都水使者官隋廢都水臺入司農仁壽元年改臺爲監更名使者亦爲監煬帝又改使者尋又爲監加置少監又並

改爲令領舟楫河渠二署唐龍朔二年改司津監丞光宅元年改水衡置都尉 丞漢有水衡丞亦有都水丞  
後漢晉初都水使者有參軍蓋亦丞職後魏北齊又曰參軍隋曰都水丞唐二人 主簿晉左右前後中五水  
衡令皆有梁隋唐因之 舟楫署漢有都船令丞樞樞令丞晉曰船曹吏齊曰官船典軍後周曰舟中士隋爲  
舟楫署唐因之 河渠署隋煬帝置唐因之宋都水監掌內外河渠隄堰之事輪道丞一人出外治河埽之事  
或一歲再歲而罷其間有諳知水政或至三年者置局於澶州號曰外監寺司押司宣和四年臣僚言都水監  
因恩州修河舉辟文武官至百二十餘員授牒家居乘傳給券第功希賞詔除正官十一員外餘並罷所隸有  
東西四排岸司監官各以京朝官閤門祇候以上及三班使臣充掌水運綱船輪納漚直之事汴河上下鎖蔡  
河上下鎖各監官一人以三班使臣充掌舟船木筏之事天下堰總二十一渡總六十五

內侍省 內侍 內常侍 內給事 內謁者監 內寺伯  
掖庭局 宮闈局 奚官局 內僕局 內府局

天文宦者四星在帝座西周官宮正宮伯宮人內宰闈人寺人戰國時宦者令秦少府屬官中書謁者令丞又  
將行衛尉少府各一人 並皇  
后卿漢景帝改將行爲大長秋或用中人或用士人成帝加置太僕一人掌太后與馬  
通謂之皇太后卿皆隨太后宮爲宮號在正卿上無太后則闕又有長信詹事掌皇太后宮景帝更名長信少  
府平帝更名長樂少府初秦又置中常侍官參用士人漢置侍中中常侍各一人皆尚書事黃門侍郎一人傳  
發書奏皆用姓族後漢中常侍贊導內事顧問應對永平中始定員數中常侍四人小黃門十人和熹以女主

稱制悉用閹人不調他士自安迄桓權任尤重手握王爵口含天憲桓帝既與宦官謀誅梁冀乃封宦者五人

單超徐璜具發左珪唐衡也

同日爲侯及袁紹大誅宦者永巷掖庭復用士人間闕出入莫有禁切侍中侍郎門部囑宰中

外雜錯醜聲彰聞後周有司內上士小司內中士巷伯中士等官隋曰內侍省領內侍內常侍等官

內侍即舊長秋內常

侍即舊煬帝改內侍省爲長秋監置令一人少令一人丞二人並用士人餘用宦者領掖庭宮闈奚官三署亦

參用士人唐武德初改內侍省皆用宦者領掖庭宮闈奚宮內僕內府等五局。范曄史論曰宦人在王朝其

來舊矣將以其易以役養乎後世因之才任稍廣其能者則勃貂管蘇有功於楚晉景監繆賢著庸於秦趙及

其敝也則豎刁亂齊伊戾禍宋漢襲秦制置中常侍官然亦引用士人以參其選高后稱制乃以張卿爲大謁

者出入臥內受宣詔命文帝時有趙談北宮伯子孝武亦愛李延年請奏機事多以宦人主之元帝之世史游

爲黃門令勤心納忠有所補益其後弘恭石顯以佞險進卒有蕭周之禍中興之初內官悉用閹人不雜他士

和帝幼弱竇憲兄弟專總權威內外臣僚莫由親接所與居者閹宦而已故鄉衆專謀禁中終除大憝遂享分

土之封超登宮卿之位明帝以後迄乎延平委用漸大兼領卿署之職鄧后以女主臨政帷幄稱制下令不出

房闈之間不得不委用刑人寄之國命其後孫程定立順之功曹騰參建桓之策續以五侯合謀梁冀受賊迹

因公正恩固主心故中外服從上下屏氣或稱伊霍之勳或謂夏平之晝舉動回山海呼吸變霜露阿旨曲求

則光寵三族直情忤意則慘夷五宗漢之紀綱大亂矣若夫高冠長劍紆朱懷金者布滿宮闈草茅分虎南面

臣人者蓋以十數府署第館基列於都鄙子弟附過半於州國南金和寶冰執霧縠之積盈仞珍藏嬌媛侍兒歌童舞女之玩充備綺室狗馬飾雕文土木被緹繡皆剝割氓黎競恣者欲搆害明賢專樹黨類其有更相援引希附權強者皆腐身靈子以自徇違同弊相濟故其徒有繁敗國靈政不可單書所以海內嗟毒志士窮棲寇劇緣間搖亂區夏雖忠良憤憤時或奮發而言出禍從旋見擊戮因復大者鉤黨轉相誣染凡稱善士莫不離被災毒賣武何進位崇戚近乘九服之囂怨協羣英之勢力疑留不斷至於殄敗雖袁紹襲行艾夷無餘然以暴易亂亦何云及曹騰說梁冀立昏弱魏武因之遂遷龜鼎所謂君以此始必以此終信乎其然矣

宋祁史論曰太宗詔內侍省不立三品官以內侍爲之長階第四不任以事惟門閤守禦廷內掃除聚食而已武后時稍增其人至中宗黃衣乃二十員七品以上員外置千員然衣朱紫者尙少元宗承平財用富足志大者不惜賞爵開元天寶中宮嬪大率四萬宦官黃衣以上三千員衣朱紫千餘人其稱旨者輒拜三品將軍其在殿頭供奉委任華重持節傳命光焰展展動四方所至郡縣奔走獻遺修功德市禽鳥一爲之使猶且數千緡監軍持權節度反出其下於是甲舍名園上腴之田爲中人所占者半京畿矣肅代庸弱倚爲捍衛故輔國以尙父顯元振以援立誓朝恩以軍密重然猶未得常主兵也德宗懲艾泚賊故以左右神策天威等軍委宦者主之置護軍中尉中護軍分提禁兵是以庶柄下遷政在宦人舉手伸縮便有輕重標士奇材則奏以爲子巨鎮強藩則爭出我門小人之情狠險無顧籍又日久侍天子狎則無威習則不疑昏君蔽於所昵英主禍

生所忽元宗以遷崩憲敬以弑殞文以憂憤至昭而天下亡矣禍始開元極於天祐凶悞參會黨類殲滅王室從而潰衰譬猶灼火攻蠹蠹盡木焚詎不哀哉跡其殘氣不剛柔情易褻襲則無上怖則生怨借權則專爲禍則迫緩相攻急相一此小人常勢也噫梟狐不神天與之昏末如亂何 古今宦者之禍無如漢唐季年弊固

猖獗則有自來矣蓋將相者天下大權所自出也漢中葉之後以中書爲政本而中書令管機密屬之貂璫是宦者得以竊相之柄也故陳蕃竇武何進之徒一有規畫奏敗卽爲所窺先發制人禍不旋踵而國祚隨之唐中葉之後倚兵戎定禍亂而觀軍容監軍屬之貂璫是宦者得以竊將之權也故勳德如李郭則俛首受節制而不免失律跋扈如李茂貞朱全忠則稱兵內侮而遂以移祚矣兵刑者人主威柄之所自出也漢自桓靈以來有黃門北寺獄是宦者得以專刑也故竊捕鉤黨剿戮名士皆黃門北寺獄之所爲也唐自德代以來有兩軍中尉是宦者得以專兵也故易置人主誅夷大臣皆兩軍中尉之所爲也蓋將相之任彼得以據之兵刑之司彼得以專之而又地近情親根連株固故雖有英特之君賢智之臣終不能以一朝而去腹心之病亦由積漸之久故也 宋初有內中高品班院淳化五年改入內內班院又改入內黃門班院又改內侍省入內內侍班院中興以來深懲內侍用事之弊嚴前後省使臣與兵將官往來之禁著內侍官不許出謁及接見賓客之令紹興三十年併內侍省歸入內內侍省

原五十七

唐代宗永泰中置內樞密使始以宦者爲之不置司局但屋三楹貯文書而已其職惟承受表奏進呈有所處分則宣付中書門下施行僖昭時楊復恭西門季元欲奪宰相權乃於堂狀後帖黃指揮公事此其始也後梁革唐世宦官之弊改樞密院爲崇政院命敬翔爲使始更用士人唐莊宗同光元年復以崇政院爲樞密院命宰相郭崇韜兼使權倖宰相矣宋樞密院與中書對持文武二柄號爲二府太平興國四年以石熙載爲樞密直學士以簽書院事簽書之名始此淳化三年以張遜知院事溫仲舒寇準同知院事同知院之名始此治平中以郭逵同簽書院事同簽書之名始此元豐改官制議者欲廢樞密院歸兵部神宗曰祖宗不以兵柄歸有司故命官統之互相維制不從乃定置知院同知院二人餘悉置職事多所釐正細務分隸六曹專以兵機軍政爲職而契丹國信民兵牧馬猶總領焉 按宋梁繼唐弊不用宦者然徒知宦者之不可用而不知樞密院之不必存也至後唐而領其事皆腹心大臣則是宰相之外復有宰相三省之外復有一省矣 五代有承旨副承旨以諸衛將軍充 宋太平興國中以楊守一充都承旨都承旨自守一始是時都承旨副承旨多用士人真宗後稍稍選用吏人歐陽修建言請復舊制不克行熈寧二年始以東上閤門使李評爲樞密都承旨李綬爲之副不用院吏更用士人自評始熈寧五年以尙書比部員外郎集賢校理同修起居注曾孝寬爲起居舍人充史館修撰兼都承旨用文館兼領自孝寬始元豐三年用張誠一爲客省使都承旨自是復用武臣紹興二年權禮部侍郎趙子霽充徽猷閣待制樞密院都承旨自改官制後除文臣自子霽始

中興系年錄

檢詳古無之

宋熙寧四年詔以編修經武要略官四人王存陳侗陳泰世蘇液檢詳樞密院諸房文字禮遇視中書檢正官元豐三年詔定置三員改官制尋罷建炎三年樞密院請置乾道二年詔樞密院檢詳係掌朝廷機要文字不許出謁及接見賓客編修古無之慶曆四年史館王洙承旨單士甯編修例冊編修之名自此始熙寧二年樞密院乞將祖宗以來法制所宜施行於久遠者並與刪取大旨著爲畫一及聖政釐革檢尋本院文書以次記錄其事目曰兵制凡招據屯戍訓練之類皆附焉曰馬政邊防夷狄屬國守城器械捕盜選材責效事類相從一如兵制詔以經武要略爲名唐置宣徽南北院使有副使宣者嚴季實楊復恭皆嘗爲之梁因之後唐省副使院在樞密院北二使共院而各設廳事使各一人以檢校官爲之或領節度及兩使留後闕則樞密副使一人兼領二使亦有兼樞密副使簽書樞密院者分掌四案曰兵案曰騎案曰倉案曰胄案其吏史則有都勾押官前行後行其給使則有知客押衙道引行首之屬

### 將軍總敘

三代之制天子六軍寄軍政於六卿居則以田警則以戰其職在國則以比長閭胥族師黨正州長鄉大夫爲稱在軍則以卒伍司馬將軍爲號侯制大國三軍次國二軍小國一軍其將亦命卿也晉獻公初作二軍公將上軍未有其號魏獻子衛文子始有將軍之稱戰國置大將軍周末又置前後左右將軍秦因之位上卿漢興置大將軍驃騎將軍位次丞相車騎將軍衛將軍左右前後將軍皆位次上卿掌京師兵衛四夷屯警孝武征

閩越東甌又有伏波樓船及伐朝鮮大宛復置橫海度遼貳師宣帝增以蒲類破羌樓時之制亦不常設光武中興諸將軍皆稱大天下已定武官悉省四征興於漢代四安四平起於魏初後漢有三鎮魏有鎮北晉武帝重兵官故軍校多選朝廷清重之士置中軍將軍以統宿衛七軍晉宋以來以領軍護軍左右二衛驍騎游擊將軍謂之六軍齊以二衛四軍五校驍騎游擊積射強弩殿中員外殿中武衛七將軍殿中司馬左右及虎賁中郎將冗從僕射羽林監武騎常侍謂西省散騎爲東省梁武帝以將軍之名高下舛雜命更釐定於是右司奏置一百二十五號將軍以鎮衛驍騎車騎爲二十四班四征四中爲二十三班八鎮爲二十二班八安爲二

十一班四平四翊爲二十班凡三十六號爲重號將軍又有五德將軍後魏謂驍騎軍騎衛爲三將軍末年有

八柱國大將軍其中六人各督二大將軍凡十二大將軍隋煬帝以左右衛左右屯衛左右禦衛左右候衛凡

十二衛各置大將軍一人將軍二人以總府專唐高祖以秦王功殊特置天策上將軍位王公上以天下未定

將舉關中之衆以臨四方以萬年道爲參旗軍長安道爲鼓旗軍富平道爲元戈軍禮泉道爲丹銀軍同州道爲羽林軍華州道爲騎官軍涇州道爲折威軍岐州道爲平道軍關州道爲招搖軍

麟州道爲蕤游軍涇州道爲天紀軍宜州道爲天節軍每軍將一人副一人後有左右衛左右驍左右武左右威左右領軍左右金吾左

右監門左右千牛凡十六衛大將軍各一人左右衛及左右金吾總謂之四衛其餘謂之雜衛將軍總三十人左右千牛衛將軍各一人餘衛各二人左

右羽林左右龍武左右神武六軍大將軍各一人將軍各三人皆有衛署其驍騎輔國鎮軍冠軍四大將軍

應勇武壯武宣威明威定遠甯遠游騎游擊等九將軍並爲五品以上武散官先天二年正月十日詔往者衛

士計戶取充使二十一入幕六十出軍既憚劬勞感欲避匿今改取二十五以上充十五年卹放出贖經征銀  
者十年放出自今已後羽林飛騎先於衛士中簡擇開元六年始詔折衝府兵每六歲一簡自高宗武后時天  
下久不用兵府兵之法浸壞番役更代多不以時衛士稍稍去匿至是益耗散宿衛不能給宰相張說乃請一  
切募士宿衛十一年取京北蒲同歧華府兵及白丁而益以潞州長從兵共二十萬號長從宿衛歲一番命左  
丞蕭嵩吳州刺史共選之明年更號曰驍騎也肅宗以後有左右神策軍各置大將軍後唐長興三年勅衛軍  
神威雄威及魏府廣捷以下指揮宜改爲左右羽林置四十指揮每十指揮立爲一軍應順元年改左右羽林  
四十指揮爲嚴衛左右軍龍武神武四十指揮爲捧聖左右軍清泰元年改捧聖馬軍爲彰聖左右軍嚴衛步  
軍爲甯衛左右軍

宋有左右金吾衛左右衛左右驍衛屯衛領軍衛監門衛千牛衛上將軍皆宗室爲之亦爲武臣贈典

左右衛 并親衛

漢京師有南北軍掌理禁衛 南軍若唐諸衛北軍若唐羽林等軍 初有衛將軍魏末又置中衛將軍武帝分中衛爲左右衛將軍

隋煬帝改左右翊衛唐復爲左右衛大將軍各一人將軍各二人並置佐吏長史錄事參軍倉曹參軍兵曹參

軍騎曹參軍冑曹參軍 東晉有領曹參軍齊有左右領曹各一人唐改冑曹 左右親衛中郎將府

左右驍衛

漢有驍衛將軍謂之雜號將軍武帝以李廣爲之後省後漢改屯衛爲驍騎魏置中軍晉領營兵兼統宿衛梁天監六年置左右驍騎改舊驍騎曰雲騎後周有左右驍騎率上士隋置備身府煬帝改左右驍衛府所領軍士名曰豹騎備身府別置唐因隋置左右驍衛府龍朔二年去府字光宅元年改左右武威

### 左右武衛

後漢末曹公爲丞相有武衛營及魏文帝乃置武衛將軍以主禁旅晉宋齊梁陳隋又有建武奮武廣武等將軍至隋採諸武之名置左右武衛大將軍一人將軍各二人以總府事煬帝改所領軍士名熊騎唐光宅元年改左右鷹揚衛

### 左右威衛

隋初有領軍府煬帝改左右屯衛唐因之貞觀始置飛騎龍朔二年改左右威衛別置左右屯營尋改左右屯營爲羽林光宅元年改威衛爲豹韜衛

### 左右領軍衛

魏武相府自置領軍非漢官也建安十二年改中領軍文帝始置領軍將軍以曹休爲之主五校中壘武衛三營置北軍中候永嘉中改中軍爲中領軍宋置領軍將軍一人掌內軍護軍將軍一人掌外軍齊有領軍及中領軍梁領軍將軍與左右僕射爲一流中領軍與吏部尙書爲一流北齊以高歸彥爲領軍大將軍領軍加

大自歸彥始隋有左右領軍府不置將軍惟有長史司馬諸曹掾屬煬帝改領軍爲左右屯衛唐別置領軍衛分爲左右龍朔二年改左右戎衛光宅元年改左右玉鈴衛 宋爲環衛雖戚里子弟非戰功不除上謂宰相謂欲以此儲將才重環衛如文臣儲才於館閣也

左右金吾衛

秦有中尉漢武帝更名執金吾顏師古曰金吾鳥名也按起居注天子出聯魏爲中尉後周置武環率武侯率下大夫各二人隋置左右武侯府大將軍一人將軍三人煬帝大業三年改

左右武侯衛所領軍士名伙飛唐初又爲左右武侯府龍朔二年改左右金吾衛置大將軍一人所掌與隋同將軍二人副其事

左右千牛衛

千牛刀名後魏有千牛備身掌執御刀因以名職

左右羽林衛

漢武初置建章營騎後更名羽林象天文羽林星主車騎也宣帝令中郎將騎都尉監羽林謂之羽林中郎將領郎百人謂

之羽林郎一名殿郎後漢志曰言從遊擊宿殿階殿下室中故號殿郎又置羽林左右監取從軍死事之子孫養之羽林官教以五兵

號曰羽林孤兒光武復簡五營高手別爲左右監羽林父死子繼與虎賁同所居謂之寺後周有左右羽林率

屬大司馬唐置左右屯營以諸衛將軍領之其兵名飛騎又於飛騎中簡材力曉捷善戰者號爲百騎龍朔二年改左右羽林軍武后改百騎爲千騎天授中改軍爲衛中宗改千騎爲萬騎

### 左右龍武軍

唐開元二十六年析羽林軍置左右龍武軍以左右萬騎營隸焉

### 左右神策軍

唐上元中以北衙軍使衛伯玉爲神策軍節度使初哥舒翰破吐蕃臨洮西之磨環川卽其地置神策軍及神策故地淪沒卽詔伯玉所部兵號神策軍以伯玉爲節度使與陝州節度使郭英義皆鎮陝其後伯玉罷以英義兼神策軍節度英義入爲僕射軍遂統於觀軍容使代宗幸陝朝恩舉在陝兵與神策軍迎扈悉號神策軍天子幸其營京師平朝恩遂以軍歸禁中自將之永泰元年吐蕃復入寇朝恩又以神策軍屯苑中分爲左右兩勢居北軍右遂爲天子禁軍非他可比德宗出奔神策都虞候李晟與其軍他將皆自飛狐道西赴難遂爲神策行營節度屯渭北軍遂振貞元二年改神策左右兩爲左右神策軍繇是諸將多請遙隸神策軍往往稱神策行營皆內統於中人矣順宗卽位王叔文用事欲取神策兵柄以奪宦者權而不克僖宗幸蜀田令孜募神策新軍爲五十四都離爲十軍令孜自爲左右神策十軍兼十二衛觀軍容使以左右神策大將軍爲左右神策諸都指揮使諸都又領以都將亦曰都頭按神策雖萌芽於肅代之時實磐固於德宗幸奉天之後其

初也劫制天子專擅策立而其末也外石賊臣覆亡宗社蓋唐自中葉以後強藩擅兵禁衛衰弱而其僅存者復爲神策所併視同中人之私屬至昭宗時外不足以定寇而內徒以脅君逮中人誅神策廢而唐遂亡矣

### 殿前司

都指揮使副都指揮使都虞候使副都虞候掌殿前諸班直及步騎諸指揮之名籍及訓練之政宋初有都點檢副都點檢之名在都指揮使上後不復置 石林葉氏曰始唐制有十二衛兵後又有六軍十二衛兵爲南衙漢之南軍也六軍爲北衙漢之北軍也末年常以大臣一人總之都指揮使本方鎮軍校之名自梁起宣武軍乃以其鎮兵因仍舊號置在京馬步軍都指揮使而自將之蓋於唐六軍諸衛之外別爲私兵至後唐明宗遂改爲侍衛親軍以康義誠爲馬步軍都指揮使秦王從榮以河南尹爲大元帥典六軍此侍衛司所從始

### 知閤門使

卽古者賓相之職周禮大行人掌九儀及賓客之位漢有通事舍人宋橫班有內客省使引進使四方館使東上閤門使西上閤門使供職於內多用戚族號爲華要政和官制橫班使副之名既改爲大夫而其職任則命內外官知焉其後所除總名知閤門事仍兼客省四方館之職紹興五年詔右武大夫以上並稱知閤門事兼客省四方館事官未至者卽稱同知閤門事仍兼客省四方館事以除授爲序稱同知者在知閤門之下

### 閤門宣贊舍人

閤門祿候

故事閤門無通事舍人而通事舍人沿唐制自隸中書省如抽赴閤門並稱閤門祇候其後直授閤門通事舍人非舊制也天禧中去閤門二字政和六年改爲宣贊舍人又舊以閤門通事舍人閤門祇候二等謂之閤職蓋武臣之清選也

### 幹辦皇城司

周虎賁氏舍則守主閤王在國則守王宮漢北軍卽今之皇城司也宋因之舊號武德司太平興國詔改今名政和官制改皇城使爲武功大夫紹興三年詔皇城司係專掌禁庭出入不隸臺察

### 帶御器械

宋初嘗選三班以上武幹親信善佩藥韃御劍或以內臣爲之初是職止名御帶咸平元年改爲帶御器械乾道以來詔班在樞密院檢詳文字之上

原五十八